

ओं नमः परमात्मने, श्री महागणपतये नमः

श्री गुरुभ्यो नमः

हरिः ओं

कृष्ण यजुर्वेदीय तैत्तिरीय आरण्यकम्

प्रपाठकः 1 - 4

Version Notes:

This is now the current Version 2.0 dated April 30, 2025.

1. This replaces the earlier version 1.0 dated February 29, 2020.
2. This version has been updated with the errors found and reported till April 30, 2025.
3. Required convention, style and presentation improvements or standardisations has been done wherever applicable.
4. Notify your corrections / suggestions etc to our email id vedavms@gmail.com

Earlier Versions

1st Version Number	0.0 dated 31st December 2017
2nd Version Number	1.0 dated 29th February 2020

Table of Contents

1	कृष्ण यजुर्वेदीय तैत्तिरीय आरण्यके प्रथमः प्रपाठकः	8
1.1	प्रथमः प्रपाठकः- अरुणकेतुकचयनं.....	8
1.1.1	अनुवाकं-1.....	8
1.1.2	अनुवाकं-2	9
1.1.3	अनुवाकं-3	11
1.1.4	अनुवाकं-4	13
1.1.5	अनुवाकं-5	14
1.1.6	अनुवाकं-6	15
1.1.7	अनुवाकं-7	16
1.1.8	अनुवाकं-8	19
1.1.9	अनुवाकं-9	22
1.1.10	अनुवाकं-10	25
1.1.11	अनुवाकं-11.....	27
1.1.12	अनुवाकं-12	31
1.1.13	अनुवाकं-13.....	33
1.1.14	अनुवाकं-14	34
1.1.15	अनुवाकं-15.....	36
1.1.16	अनुवाकं-16	38
1.1.17	अनुवाकं-17	38

1.1.18 अनुवाकं-18	40
1.1.19 अनुवाकं-19	41
1.1.20 अनुवाकं-20	42
1.1.21 अनुवाकं-21	43
1.1.22 अनुवाकं-22	44
1.1.23 अनुवाकं-23	49
1.1.24 अनुवाकं-24	53
1.1.25 अनुवाकं-25	55
1.1.26 अनुवाकं-26	56
1.1.27 अनुवाकं-27	59
1.1.28 अनुवाकं-28	61
1.1.29 अनुवाकं-29	62
1.1.30 अनुवाकं-30	62
1.1.31 अनुवाकं-31	63
1.1.32 अनुवाकं-32	66
Appendix (of expansions)	70
Details of Dasini & Vaakyams for_ Prapaatakam 1_ TA 1.1	74
2 कृष्ण यजुर्वेदीय तैत्तिरीय आरण्यके द्वितीयः प्रपाठकः	76
2.1 द्वितीयः प्रपाठकः – स्वाध्यायब्राह्मणं	76
2.1.1 अनुवाकं – 1	76

2.1.2	अनुवाकं – 2.....	77
2.1.3	अनुवाकं – 3.....	78
2.1.4	अनुवाकं – 4.....	79
2.1.5	अनुवाकं – 5.....	81
2.1.6	अनुवाकं – 6.....	83
2.1.7	अनुवाकं – 7.....	86
2.1.8	अनुवाकं – 8.....	87
2.1.9	अनुवाकं – 9.....	88
2.1.10	अनुवाकं – 10	89
2.1.11	अनुवाकं – 11.....	90
2.1.12	अनुवाकं – 12	91
2.1.13	अनुवाकं – 13	92
2.1.14	अनुवाकं – 14	92
2.1.15	अनुवाकं – 15	93
2.1.16	अनुवाकं – 16	94
2.1.17	अनुवाकं – 17	95
2.1.18	अनुवाकं – 18	95
2.1.19	अनुवाकं – 19	96
2.1.20	अनुवाकं – 20.....	98
Appendix (of expansions)		100

3 कृष्ण यजुर्वेदीय तैत्तिरीय आरण्यके तृतीयः प्रपाठकः.....	106
3.1 तृतीयः प्रपाठकः – चातुर्होत्रचयनम्.....	106
3.1.1 अनुवाकं – 1	106
3.1.2 अनुवाकं – 2.....	106
3.1.3 अनुवाकं – 3.....	107
3.1.4 अनुवाकं – 4.....	107
3.1.5 अनुवाकं – 5.....	108
3.1.6 अनुवाकं – 6.....	108
3.1.7 अनुवाकं – 7.....	108
3.1.8 अनुवाकं – 8.....	110
3.1.9 अनुवाकं – 9.....	111
3.1.10 अनुवाकं – 10	112
3.1.11 अनुवाकं – 11.....	114
3.1.12 अनुवाकं – 12	120
3.1.13 अनुवाकं – 13	123
3.1.14 अनुवाकं – 14	124
3.1.15 अनुवाकं – 15	126
3.1.16 अनुवाकं – 16	127
3.1.17 अनुवाकं – 17	128
3.1.18 अनुवाकं – 18	128

3.1.19 अनुवाकं – 19	128
3.1.20 अनुवाकं – 20.....	129
3.1.21 अनुवाकं – 21	129
4 कृष्ण यजुर्वेदीय तैत्तिरीय आरण्यके प्रथमः प्रपाठकः	133
4.1 चतुर्थः प्रपाठकः – पितृमेधमन्त्राः	133
4.1.1 अनुवाकम् – 1.....	133
4.1.2 अनुवाकम् – 2.....	136
4.1.3 अनुवाकम् – 3.....	137
4.1.4 अनुवाकम् – 4	140
4.1.5 अनुवाकम् – 5.....	142
4.1.6 अनुवाकम् – 6.....	144
4.1.7 अनुवाकम् – 7.....	146
4.1.8 अनुवाकम् – 8.....	149
4.1.9 अनुवाकम् – 9.....	150
4.1.10 अनुवाकम् – 10.....	152
4.1.11 अनुवाकम् – 11	154
4.1.12 अनुवाकम् – 12.....	155
Appendix (of expansions)	159

=====

TAITTIRIYA ARANYAKAM

CHAPTER NUMBER	STARTING MANTRAM AS PER BOOK BY NARASHIMA PRIYA TRUS	STARTING MANTRAM AS PER BOOK FOR WHICH COMMENTARY BY SAYANYACHARYA EDITED BY SHRI HARI NARAYAN APTE (ANANDASHARM SERIES)	STARTING MANTRAM AS PER BOOK FOR WHICH COMMENTARY BY BHATTA BASKARA EDITED BY SHRI MADHAVA SHASTRI	STARTING MANTRAM As Per Grantha books	STARTING MANTRAM AS PER BOOK PUBLISHED BY VEDAVMS.IN
	PUBLISHED DURING 2014	DURING 1898	PUBLISHED DURING 1900	PUBLISHED DURING 1905	DURING 2019 & 2020
1	2	3	4	5	5
TA CHAPTER - 1	भद्रं कर्णेभिः —	भद्रं कर्णेभिः —	भद्रं कर्णेभिः —	भद्रं कर्णेभिः —	भद्रं कर्णेभिः —
TA CHAPTER - 2	सह वै देवानां — — —	सह वै देवानां — — —	सह वै देवानां — — —	सह वै देवानां — — —	सह वै देवानां — — —
TA CHAPTER - 3	चित्तिः सुक् । —	चित्तिः सुक् । —	चित्तिः सुक् । —	चित्तिः सुक् । —	चित्तिः सुक् । —
TA CHAPTER - 4	परेयुवा॒ऽसम् प्रवतो॑ — — —	नमो॑ वा॒चे या — — —	परेयुवा॒ऽसम् प्रवतो॑ — — —	नमो॑ वा॒चे या — — —	परेयुवा॒ऽसम् प्रवतो॑ — — —
TA CHAPTER - 5	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5	देवा वै सत्रमासत । — — —	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5	देवा वै सत्रमासत । — — —	शीक्षां व्याख्यास्यामः — Sheeksha valli+ Aanada valli + Brighu valli given together in Chapter 5
TA CHAPTER - 6	अ॒भस्य॑ पा॒रे भुव॑नस्य — — —	परेयुवा॒ऽसम् प्रवतो॑ — — —	अ॒भस्य॑ पा॒रे भुव॑नस्य — — —	परेयुवा॒ऽसम् प्रवतो॑ — — —	अ॒भस्य॑ पा॒रे भुव॑नस्य — — —
				contd in next page	

TAITTIRIYA ARANYAKAM					
CHAPTER NUMBER	STARTING MANTRAM AS PER BOOK BY NARASHIMA PRIYA TRUST	STARTING MANTRAM AS PER BOOK FOR WHICH COMMENTARY BY SAYANYACHARYA EDITED BY SHRI HARI NARAYAN APTE (ANANDASHARM SERIES)	STARTING MANTRAM AS PER BOOK FOR WHICH COMMENTARY BY BHATTA BASKARA EDITED BY SHRI MADHAVA SHASTRI	STARTING MANTRAM As Per Grantha books	STARTING MANTRAM AS PER BOOK PUBLISHED BY VEDAVMS.IN
	PUBLISHED DURING 2014	DURING 1898	PUBLISHED DURING 1900	PUBLISHED DURING 1905	DURING 2019 & 2020
1	2	3	4	5	5
TA CHAPTER - 7	नमो॑ वा॒चे या	शी॒क्षां व्या॒ख्यास्यामः॑ ।	Books ends at 6th Chapter. "namo vaache" + "devaa vai satramaasata" Chapters not given	शी॒क्षां व्या॒ख्यास्यामः॑ ।	नमो॑ वा॒चे या
TA CHAPTER - 8	दे॒वा वै स॒त्रमा॑सत ।	ब्र॒ह्मवि॑दा॒प्नोति॑ परं ॥	Books ends at 6th Chapter. "namo vaache" + "devaa vai satramaasata" Chapters not given	ब्र॒ह्मवि॑दा॒प्नोति॑ परं ॥	दे॒वा वै स॒त्रमा॑सत ।
TA CHAPTER - 9		भृ॒गुर्वै वा॑रुणिः ।		भृ॒गुर्वै वा॑रुणिः ।	
TA CHAPTER -10		अ॒भ॒स्य पा॑रे		अ॒भ॒स्य पा॑रे	

"Vedavms" have followed the order given , as per column 2 above, by "Nrushima Priya Trust".

dated 31st Mar 2020

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

1 कृष्ण यजुर्वेदीय तैत्तिरीय आरण्यके प्रथमः प्रपाठकः

1.1 प्रथमः प्रपाठकः– अरुणकेतुकचयनं

1.1.1 अनुवाकं-1

T.A.1.1.1

भ॒द्रं क॑र्णेभिः शृणु॒याम॑ दे॒वाः । भ॒द्रं प॑श्येमाक्षभिर् यज॑त्राः ।
स्थि॒रैरङ्गै॑स्तुष्टुवा॒ग्ँस॑ स्तनूभिः । व्य॑शेम देव॒हितं॑ यदायुः ॥
स्व॒स्ति न॒ इन्द्रो॑ वृ॒द्धश्र॑वाः । स्व॒स्ति नः॑ पू॒षा वि॒श्ववे॑दाः ।
स्व॒स्ति न॒स्ताक्ष॑र्यो अरि॒ष्टने॑मिः । स्व॒स्ति नो॒ बृह॑स्पतिर् दधातु ॥
आप॑मापामपः सर्वाः । अ॒स्मा-द॒स्मा-दि॒तोऽमु॑तः । 1 (10)

T.A.1.1.2

अ॒ग्नि॒र्वायु॑श्च सूर्यश्च । स॒ह सञ्च॑स्कर॒र्द्धिया॑ ॥
वा॒य्वश्चा॑ रश्मिप॒तयः॑ । मरी॑च्यात्मानो अ॒द्रुहः॑ । दे॒वीर् भुव॑न सू॒वरीः॑ ।
पु॒त्रव॑त्त्वाय मे सुत ॥ म॒हाना॑म्नीर् म॒हामा॑नाः । म॒हसो॑ म॒हसः॑ स्वः ।
दे॒वीः पर्ज॑न्य सू॒वरीः॑ । पु॒त्रव॑त्त्वाय मे सुत ॥ 2 (10)

T.A.1.1.3

अपा॑श्न्यु॒ष्णि-म॒पा रक्षः॑ । अपा॑श्न्यु॒ष्णि-म॒पा रघं॑ ॥
अपा॑घ्नामप॒ चावर्तिं॑ ॥ अप॑ दे॒वीरि॒तो हि॒त ॥ वज्रं॑ दे॒वीरजी॑ताञ्च ।
भुव॑नं दे॒वसू॒वरीः॑ । आ॒दि॒त्यान॑दि॒तिं दे॒वीं । योनि॑नोर्द॒ध्व-मु॒दीष॑त ॥
शि॒वा नः॑ श॒न्तमा॑ भवन्तु । दि॒व्या आप॑ ओष॒धयः॑() ।
सुमृ॑डी॒का सर॑स्वति । मा ते॒ व्योम॑ स॒न्दृशि॑ ॥ 3 (12)

(अ॒मु॒तः - सु॒ - तौष॑धयो द्वे च) (A1)

1.1.2 अनुवाकं-2

T.A.1.2.1

स्मृ॑तिः प्र॒त्यक्ष॑-मै॒तिह्यं॑ ॥ अनु॑मान-श्चतु॒ष्टयं॑ । ए॒तैरा॑दि॒त्य मण्ड॑लं ।
सर्वै॑रे॒व वि॒धास्य॑ते ॥ सूर्यो॑ मरी॒चिमा॑द॒ते । सर्व॑स्माद् भुव॑नाद॒धि ।
तस्याः॑ पा॒कवि॑शेषेण । स्मृ॑तं का॒लवि॑शेषणं ॥
नदी॑व प्र॒भवा॑त् का॒चित् । अ॒क्षय्या॑थ् स्यन्द॒ते यथा॑ । 4 (10)

T.A.1.2.2

तान्नद्योऽभि॑ स॒माय॑न्ति । सो॒रुः सती॑ न नि॒वर्त॑ते ॥
ए॒वन्ना॒नास॑मु॒त्थानाः॑ । का॒लाः स॒म्वँ॑त्सरञ्च श्रि॒ताः ।

अणु॑शश्च॒ मह॑शश्च॒ । सर्वे॑ सम॒वयन्ति॑ तं ॥

स तैः॑ सर्वैः॑ समा॒विष्टः॑ । ऊ॒रुः सन्न॑ नि॒वर्त॑ते ।

अधिसम्॑व॒थ्सरं॑ वि॒द्यात् । तदे॒व लक्ष॑णे ॥ 5 (10)

T.A.1.2.3

अणु॑भिश्च॒ मह॑द्भिश्च॒ । समा॒रूढः॑ प्र॒दृश्य॑ते । सम्॑व॒थ्सरः॑ प्र॒त्यक्षे॑ण ।

नाधि॑स॒त्त्वः प्र॒दृश्य॑ते ॥ प॒टरो॑ वि॒क्लि॑धः पि॒ङ्गः ।

ए॒तद् व॑रुणलक्ष॑णं । यत्रै॒त-दु॒प॒दृश्य॑ते । स॒हस्रं॑ तत्र॒ नीय॑ते ॥

ए॒कं हि॑ शिरो॒ नाना॑ मु॒खे । कृ॒थ्स्रं तदृ॑तुलक्ष॑णं । 6 (10)

T.A.1.2.4

उभय॑तः स॒प्तैन्द्रि॑याणि । ज॒ल्पितं॑ त्वे॒व दि॒ह्यते॑ ॥

शु॒क्लकृ॑ष्णे सम्॑व॒थ्सर॑स्य । दक्षि॑णवा॒मयोः॑ पा॒र्श्वयोः॑ ।

तस्यै॒षा भ॑वति ॥ शु॒क्रं ते॑ अ॒न्यद्य॑ज॒तं ते॑ अ॒न्यत् ।

विषु॑रूपे॒ अह॑नी॒ द्यौरि॑वासि । विश्वा॒ हि मा॒या अ॑वसि स्वधा॒वः ।

भ॒द्रा ते॑ पू॒षन्नि॒ह रा॒तिर॒स्त्विति॑ ॥

नात्र॑ भु॒वनं॑ () । न पू॒षा । न प॒शवः॑ ।

नादित्यः॑ सम्॑व॒थ्सर॑ ए॒व प्र॒त्यक्षे॑ण प्रि॒यत॑मं वि॒द्यात् ।

एतद्वै सम्वत्सरस्य प्रियतमं रूपं ।

योऽस्य महानर्थ उत्पत्स्यमानो भवति । इदं पुण्यं कुरुष्वेति ।

तमाहरणं दद्यात् ॥ 7 (17)

(यथा - लक्षण - ऋतुलक्षणं - भुवनं सप्त च (A2)

1.1.3 अनुवाकं-3

T.A.1.3.1

साकञ्जानां सप्तथमाहु-रेकजं । षडुद्यमा ऋषयो देवजा इति ।

तेषामिष्टानि विहितानि धामशः । स्थात्रे रेजन्ते विकृतानि रूपशः ॥

कोनु मर्या अमिथितः । सखा सखायमब्रवीत् । जहाको अस्मदीषते ॥

यस्तित्याज सखिविदं सखायं । न तस्य वाच्यपि भागो अस्ति ।

यदीं शृणोत्यलकं शृणोति । 8 (10)

T.A.1.3.2

न हि प्रवेद सुकृतस्य पन्थामिति ॥ ऋतुर् ऋतुना नुद्यमानः ।

विननादाभिधावः । षष्टिश्च त्रिंशका वल्गाः ।

शुक्लकृष्णौ च षष्टिकौ ॥ सारागवस्त्रैर् जरदक्षः ।

वसन्तो वसुभिः सह । सम्वत्सरस्य सवितुः ।

प्रै॒षकृ॒त् प्र॒थमः॑ स्मृतः॑ ॥

अ॒मूना॒दय॑-ते॒त्यन्यान्॑ । 9 (10)

T.A.1.3.3

अ॒मू॒श्च॑ परि॒रक्ष॑तः । ए॒ता वा॒चः प्र॑युज्यन्ते । यत्रै॑ तदु॒पदृ॑श्यते ॥
ए॒तदे॒व वि॑जानीयात् । प्र॒माणं॑ का॒लपर्य॑ये । वि॒शेष॑णं तु वक्ष्यामः ।
ऋ॒तूनां॑ तन्नि॒बोध॑त ॥ शु॒क्लवा॑सा रु॒द्रग॑णः । ग्री॒ष्मेणा॑वर्तते सह ।
नि॒जह॑न् पृथि॒वीं सर्वा॑ । 10 (10)

T.A.1.3.4

ज्योति॑षा ऽप्रति॒ख्येन॑ सः ॥ वि॒श्वरू॒पाणि॑ वा॒सां॒सि ।
आ॒दि॒त्यानां॑ नि॒बोध॑त । स॒म्व॑त्सरी॒णं क॑र्म॒फलं॑ ।
व॒र्षाभि॑र् द॒दतां॒ सह॑ ॥ अ॒दुःखो॑ दुःख॒चक्षु॑रिव ।
तद्वा॑ पी॒त इ॒व दृ॑श्यते । शी॒तेना॑ व्यथयन्नि॒व ।
रु॒रुद॑क्ष इ॒व दृ॑श्यते ॥ ह्ला॒दय॑ते ज्वल॒तश्चै॒व () ।
शा॒म्यत॑श्चा॒स्य चक्षु॑षी । यावै॑ प्र॒जा भ्र॑ञ्श्यन्ते ।
स॒म्व॑त्सरा॒त्ता भ्र॑ञ्श्यन्ते ॥ याः प्र॒ति॒तिष्ठ॑न्ति ।
स॒व॑त्सरे॒ ताः प्र॒ति॒तिष्ठ॑न्ति । व॒र्षाभ्य॑ इत्यर्थः ॥ 11 (16)

(शृ॒णो - त्य॒न्यान्त् - सर्वा - मे॒व षट्च) (A3)

1.1.4 अनुवाकं-4

T.A.1.4.1

अ॒क्षि॒दुःखो॒त्थि॒तस्यै॒व । वि॒प्रस॒न्ने क॒नी॒नि॒के । आ॒ङ्गे चा॒द्र॒णं ना॒स्ति ।
ऋ॒भू॒णां तन्नि॒बो॒धत ॥ क॒न॒का॒भा॒नि वा॒सा॒सि । अ॒ह॒ता॒नि नि॒बो॒धत ।
अ॒न्नम॑श्नी॒त मृ॒ज्मी॒त । अ॒हं वो॑ जी॒वन॑प्र॒दः ॥ ए॒ता वा॒चः प्र॑यु॒ज्यन्ते॑ ।
श॒र॒द्य॒त्रोप॑दृश्यते । 12 (10)

T.A.1.4.2

अ॒भि॒धू॒न्वन्तो-ऽभि॑घ्नन्त इ॒व । वा॒तव॑न्तो म॒रु॒द्ग॒णाः ॥
अ॒मु॒तो जे॑तुमिषुमु॒खमि॒व । स॒न्न॒ब्धाः स॒ह द॑दृ॒शे ह ।
अ॒प॒द्ध्व॒स्तैर् व॑स्तिव॒र्णैरि॒व । वि॒शि॒खा॒सः क॒प॒र्दि॒नः ॥
अ॒क्रु॒द्धस्य॑ यो॒त्स्य॑मा॒नस्य॑ । क्रु॒द्धस्यै॒व लो॒हि॒नी ।
हे॒म॒तश्च॑क्षु॒षी वि॒द्यात् । अ॒क्ष॒ण॒योः क्षि॒प॒णो॒रि॒व ॥ 13 (10)

T.A.1.4.3

दु॒र्भि॒क्षं दे॒वलो॒केषु॑ । म॒नू॒नामु॒द॒कं गृ॑हे । ए॒ता वा॒चः प्र॑व॒द॒न्तीः ।
वै॒द्यु॒तो या॒न्ति शै॑शिरीः ॥ ता अ॒ग्निः प॑व॒मा॒ना अ॒न्वै॒क्ष॒त ।

इ॒ह जी॒विका॑-म॒परि॑पश्यन् । तस्यै॒षा भ॑वति ॥ इ॒हेह॑ वः स्वत॒पसः॑ ।
मरु॒तः सूर्य॑त्वचः । शर्म॑ स॒प्रथा॑ आवृ॒णे () ॥ 14 (10)

(दृ॒श्यत॑ – इ॒वा – वृ॒णे) (A4)

1.1.5 अनुवाकं-5

T.A.1.5.1

अति॒ता॒म्राणि॑ वासा॒सि । अ॒ष्टिव॑ज्जि शत॒घ्नि च॑ ।
वि॒श्वे दे॒वा वि॑प्र॒हर॑न्ति । अ॒ग्निजि॑ह्वा अ॒सश्च॑त ॥ नै॒व दे॒वो न॑ म॒र्त्यः ।
न रा॒जा वरु॑णो वि॒भुः । ना॒ग्निर् ने॒न्द्रो न॑ पव॒मानः॑ ।
मा॒तृक्क॑च्च न वि॒द्यते॑ ॥ दि॒व्यस्यै॑का ध॒नुरा॑र्लिः ।
पृ॒थि॒व्याम॑परा श्रि॒ता । 15 (10)

T.A.1.5.2

तस्ये॒न्द्रो व॑मि॒रूपे॑ण । ध॒नुर्ज्या॑-म॒छिन॑त्स्वयं ॥ तदि॒न्द्र॒धनु॑रि॒त्यज्यं॑ ।
अ॒भ्रव॑र्णेषु चक्ष॑ते । ए॒तदे॒व श॑म्योर् बा॒र्हस्प॑त्यस्य ।
ए॒तद् रु॒द्रस्य॑ ध॒नुः ॥ रु॒द्रस्य॑ त्वे॒व ध॑नु॒रार्लिः॑ । शि॒र उ॒त्पि॑पेष ।
स प्र॒वर्ग्यो॑ऽभवत् । तस्मा॒द् यः स॑प्र॒वर्ग्ये॑ण य॒ज्ञेन॑ यज॑ते () ।

रु॒द्रस्य॑ स शि॒रः॑ प्र॒ति॒द॒धा॒ति । नै॒नꣳ रु॒द्र आ॒रु॒को भ॑वति ।

य ए॒वं वै॒द ॥ 16 (13)

(श्रि॒ता – य॒ज॒ते त्री॑णि॒ च) (A5)

1.1.6 अनुवाकं-6

T.A.1.6.1

अ॒त्यूर्ध्वा॑क्षो ऽति॒रश्वा॑त् । शि॒शि॒रः॑ प्र॒दृ॒श्य॑ते ।

नै॒व रू॒पं न॑ वा॒साꣳसि॑ ।

न चक्षुः॑ प्र॒ति॒दृ॒श्य॑ते ॥ अ॒न्यो॒न्यं तु॑ न हि॒ꣳस्रा॑तः ।

स॒त स्त॑द् दे॒व॒लक्ष॑णं । लो॒हि॒तोऽक्षि॑ण शार॒शी॒र्ष्णिः॑ ।

सू॒र्य॑स्यो॒दय॑नं प्र॒ति ॥

त्वं करो॑षि न्य॒ञ्ज॒लि॒कां । त्वं करो॑षि नि॒जा॒नु॒कां । 17 (10)

T.A.1.6.2

नि॒जा॒नु॒का मे॑ न्य॒ञ्ज॒लि॒का । अमी॑ वा॒च-मु॒पा॒स॒तामि॑ति ॥

तस्मै॑ सर्व॑ ऋ॒त॒वो न॑म॒न्ते । म॒र्या॒दा॒कर॑त्वात् प्र॒पु॒रो॒धां ।

ब्रा॒ह्म॒ण आ॒प्नो॑ति । य ए॒वं वै॒द ।

स ख॒लु स॒म्व॑त्स॒र ए॒तैः से॑ना॒नी॒भिः स॒ह ।

इन्द्राय॑ सर्वान्॑कामा-न॑भिव॒हति॑ । स द्र॒फ्सः॑ ।

तस्यै॑षा भवति ॥ 18 (10)

T.A.1.6.3

अव॑ द्र॒फ्सो अ॒ञ्शु॑मती॒मति॑ष्ठत् । इ॒या॒नः कृ॒ष्णो द॒शभिः॑ स॒हस्रैः॑ ।

आव॑र्त-मिन्द्रः॑ श॒च्या ध॑मन्तं । उप॒स्नुहि॑ तं नृम॑णा-मथ॑द्रामि॒ति ॥

एत॑यै वेन्द्रः॑ सला वृ॒क्या स॒ह । असु॑रान् परि॒वृश्च॑ति ।

पृथि॑व्यञ् शु॒मती॑ । ताम॒न्व-व॑स्थितः स॒म्व॑त्सरो दि॒वञ्च॑ ।

नै॒वं वि॑दुषाऽऽचा॒र्यान्ते॑वा॒सिनौ॑ । अ॒न्यो॒न्यस्मै॑ द्रु॒ह्यातां॑ () ।

यो द्रु॒ह्यति॑ । भ्र॒श्यते॑ स्व॒र्गाल् लो॒कात् । इत्यृ॑तुमण्ड॒लानि॑ ।

सूर्य॑मण्ड॒ला न्या॑ख्यायिकाः । अत॑ ऊ॒र्ध्वञ् स॑निर्व॒चनाः ॥ 19 (15)

(नि॒जानु॑कां - भव॑ति - द्रु॒ह्यातां॑ पञ्च॑ च) (A6)

1.1.7 अनुवाकं-7

T.A.1.7.1

आ॒रोगो॑ भ्राजः प॒टरः प॒तङ्गः॑ । स्व॒र्णरो॑ ज्योतिषी॒मान् वि॒भासः॑ ।

ते अ॒स्मै स॒र्वे दि॒वमा॑तप॒न्ति । ऊ॒र्जं दु॑हाना अ॒नप॑स्फुरन्त॒ इति॑ ॥

क॒श्यपो॑ऽष्ट॒मः । स म॒हामे॑रुं न जहा॒ति । तस्यै॑षा भवति ॥

य॒त्ते शि॒ल्पं क॒श्यप॑ रो॒चना॑वत् । इ॒न्द्रि॒या॒वत् पु॒ष्क॒लं चि॒त्रभा॑नु ।

यस्मिन् थ॒सू॒र्या अ॒र्पि॒ताः स॒प्त सा॒कं । 20 (10)

T.A.1.7.2

तस्मिन् राजान-मधिविश्रयेममिति ॥

ते अस्मै सर्वे कश्यपा-ज्ज्योतिर् लभन्ते ।

तान्थसोमः कश्यपादधि निर्द्धमति । भ्रस्ता कर्म कृदिवैवं ॥

प्राणो जीवानीन्द्रिय जीवानि । सप्त शीर्षण्याः प्राणाः ।

सूर्या इत्याचार्याः ॥ अपश्यमह मेतान्थ् सप्तसूर्यानिति ।

पञ्चकर्णो वाथस्यायनः । सप्तकर्णश्च प्लाक्षिः । 21 (10)

T.A.1.7.3

आनुश्रविक एव नौ कश्यप इति । उभौ वेदयिते ।

न हि शेकुमिव महामेरुं गन्तुं ॥

अपश्यमहमेतथ् सूर्यमण्डलं परिवर्तमानं ।

गार्ग्यः प्राणन्नातः । गच्छन्त महामेरुं । एकञ्चाजहतं ॥

भ्राजपटरपतङ्गा निहने । तिष्ठन्नातपन्ति ।

तस्मादिह तप्त्रितपाः । 22 (10)

T.A.1.7.4

अमु॒त्रे॒तरे । तस्मा॑दि॒हा तप्त्रि॑ तपाः ॥ तेषा॑मेषा॒ भव॑ति ॥
सप्त॑ सूर्या॒ दिव॒-मनु॑ प्रवि॒ष्टाः । तान॒न्वेति॑ प॒थिभिर् दक्षि॑णावान् ।
ते अस्मै॑ सर्वे॑ घृ॒तमा॑तपन्ति । ऊ॒र्जं दु॑हाना अनपस्फुरन्त॑ इति ॥
सप्त॑त्विजः सूर्या॒ इत्या॑चार्याः ॥ तेषा॑मेषा॒ भव॑ति ॥
सप्त॑ दि॒शो नाना॑सूर्याः । 23 (10)

T.A.1.7.5

सप्त॑ हो॒तार ऋ॒त्विजः॑ । दे॒वा आ॑दि॒त्या ये सप्त॑ ।
तेभिः॑ सोमा॒भी रक्ष॑ ण इति ॥ तद॑प्या॒म्नायः॑ । दिग्भ्राज॑ ऋतून् करोति ॥
एत॑यैवावृ॒ता ऽऽस॑हस्रसूर्यताया इति वैश॑म्पायनः ॥ तस्यै॒षा भव॑ति ॥
यद्द्याव॑ इन्द्र॒ ते श॒तꣳ श॒तं भू॑मीः । उ॒त स्युः॑ ।
न त्वा॑ वज्रिन्त् स॒हस्रꣳ सूर्याः॑ () । 24 (10)

T.A.1.7.6

अनु॑ न जा॒तमष्ट॑ रोदसी इति ॥ नाना॑ लिङ्ग॒त्वा-दृ॒तूनां॑ नाना॑ सूर्य॒त्वं ॥
अष्टौ॑ तु व्य॒वसि॑ता इति ॥ सूर्य॑मण्ड॒ला-न्य॑ष्टात ऊ॒र्ध्वं ॥
तेषा॑मेषा॒ भव॑ति ॥ चि॒त्रं दे॒वाना॑-मु॒दगा॑दनीकं ।

चक्षुर् मि॒त्रस्य॒ वरु॑णस्याग्नेः । आ॒प्ता द्या॒वा पृथि॒वी अ॒न्तरि॑क्षं ।

सूर्य॑ आ॒त्मा जग॑तस्तस्थुषश्चेति ॥ 25 (9) (सा॒कं - प्ला॒क्षि -
स्ता॒प्त्रित॑पा - ना॒नासू॑र्याः - सू॒र्या - +न॒व च) (A7)

1.1.8 अनुवाकं-8

T.A.1.8.1

क्वे॒दम॑भ्रं नि॒विश॑ते । क्वा॒यꣳ स॒म्वत्स॑रो मि॒थः ।

क्वा॒हः क्वे॒यन् दे॒व रा॒त्री । क्व मा॒सा ऋ॒तवः॑ श्रि॒ताः ॥

अ॒र्द्धमा॑सा मु॒हूर्ताः॑ । नि॒मेषा॑स्तु॒टिभिः॑ (नि॒मेषा॑स्तु॒टिभिः॑) स॒ह ।

क्वे॒मा आ॒पो नि॒विश॑न्ते । य॒दीतो॑ या॒न्ति संप्र॑ति ॥

का॒ला अ॒प्सु नि॒विश॑न्ते । आ॒पः सू॒र्ये स॒माहि॑ताः । 26 (10)

T.A.1.8.2

अ॒भ्राण्य॑पः प्र॒पद्य॑न्ते । वि॒द्युत्सू॑र्ये स॒माहि॑ता ॥ अ॒नव॑र्णे इ॒मे भू॒मी ।

इ॒यञ्चा॑सौ च रो॒दसी ॥ किꣳ स्वि॒दत्रा॑न्तरा भू॒तं । ये॒नेमे॑ वि॒धृते॑ उ॒भे ।

वि॒ष्णुना॑ वि॒धृते॑ भू॒मी । इ॒ति व॑त्स॒स्य वे॑दना ॥

इ॒राव॑ती धे॒नुम॑ती हि भू॒तं । सू॒यव॑सिनी म॒नुषे॑ द॒शस्ये॑ ॥ 27 (10)

T.A.1.8.3

व्यष्ट॑भ्ना-द्रो॑दसी॒ विष्ण॑वे॒ते । दा॒ध॒र्त्थं पृ॒थि॒वी-म॒भितो॑ म॒यू॒खैः ॥
कि॒न्त-द्वि॑ष्णोर्ब॒लमा॒हुः । का दी॒प्तिः किं॑ प॒राय॑णं ।
एको॑ य॒द्धा-र॒य दे॒वः । रे॒जती॑ रो॒दसी॑ उ॒भे ॥ वा॒ताद्वि॑ष्णोर् ब॒लमा॒हुः ।
अक्ष॑राद् दी॒प्ति रु॒च्यते॑ । त्रि॒पदा॒द्धार॒यद्दे॒वः ।
यद्वि॑ष्णोरे॒क-मु॒त्तमं॑ ॥ 28 (10)

T.A.1.8.4

अ॒ग्नयो॑ वा॒यवश्चै॒व । ए॒तद॑स्य प॒राय॑णं ॥ पृ॒च्छामि॑ त्वा प॒रं मृ॒त्युं ।
अ॒वमं॑ म॒द्ध्यम॑ञ्चतुं । लो॒कञ्च॑ पु॒ण्यपा॑पानां ।
ए॒तत् पृ॒च्छामि॑ संप्रति ॥ अ॒मुमा॑हुः प॒रं मृ॒त्युं । प॒वमा॑नं तु म॒द्ध्यमं॑ ।
अ॒ग्निरे॒वाव॑मो मृ॒त्युः । च॒न्द्रमा॑-श्चतु॒रुच्य॑ते ॥ 29 (10)

T.A.1.8.5

अ॒नाभो॒गाः प॒रं मृ॒त्युं । पा॒पाः स॒म्य॑न्ति॒ सर्व॑दा ।
आ॒भो॒गास्त्वे॒व स॒म्य॑न्ति । य॒त्र पु॒ण्यकृ॑तो ज॒नाः ॥
ततो॑ म॒द्ध्यम॑मा॒यन्ति॑ । च॒तुम॑ग्निञ्च संप्रति ॥
पृ॒च्छामि॑ त्वा पा॒पकृ॑तः । य॒त्र या॑तयते॒ यमः॑ ।

त्वन्नस्तद् -ब्रह्मन् प्रब्रूहि । यदि वेत्थाऽसतो गृहान् ॥ 30 (10)

T.A.1.8.6

कश्यपादुदिताः सूर्याः । पापान्निर्घ्नन्ति सर्वदा ।
रोदस्यो-रन्तरदेशेषु । तत्र न्यस्यन्ते वासवैः ॥ ते ऽशरीराः प्रपद्यन्ते ।
यथा ऽपुण्यस्य कर्मणः । अपाण्यपादकेशासः ।
तत्र तेऽयोनिजा जनाः ॥ मृत्वा पुनर्मृत्यु-मापद्यन्ते ।
अद्यमानाः स्वकर्मभिः । 31 (10)

T.A.1.8.7

आशातिकाः क्रिमय इव । ततः पूयन्ते वासवैः ॥
अपैतं मृत्युं जयति । य एवं वेद । स खल्वैवं विद्ब्राह्मणः ।
दीर्घश्रुत्तमो भवति । कश्यपस्यातिथिः सिद्धगमनः सिद्धगमनः ॥
तस्यैषा भवति ॥ आयस्मिन्-थ्सप्त वासवाः ।
रोहन्ति पूर्वा रुहः । 32 (10)

T.A.1.8.8

ऋषिर्ह दीर्घश्रुत्तमः । इन्द्रस्य घर्मो अतिथिरिति ॥
कश्यपः पश्यको भवति । यथ्सर्वं परिपश्यतीति सौक्ष्म्यात् ॥

अथाग्ने॑रष्ट॑पुरु॒षस्य॑ । तस्यै॒षा भव॑ति ॥

अग्ने॑ नय॑ सु॒पथा॑ रा॒ये अ॒स्मान् ।

विश्वा॑नि देव॑ व॒युनानि॑ वि॒द्वान् । यु॒योद्ध्य॑स्म-ज्जु॑हु॒राणमे॑नः ।

भूयि॑ष्ठान्ते नमउ॒क्तिं वि॒धेमे॒ति () ॥ 33 (10) समा॑हि॒ता – द॒शस्यै॑ –
उ॒त्तम॑-मु॒च्यते॑-गृ॒हान्-थ॒स्वकर्म॑भिः-पू॒र्व्या रु॒ह-इति॑) (A8)

1.1.9 अनुवाकं-9

T.A.1.9.1

अग्नि॑श्च जा॒तवे॒दाश्च॑ । स॒होजा॑ अ॒जिरा॒प्रभुः॑ । वैश्वा॑नरो न॒र्यापा॒श्च ।

प॒ङ्क्ति॑रा॒धाश्च॑ स॒प्तमः॑ । वि॒सर्पे॑ वा॒ष्टमो॒ऽग्नीनां॑ ।

ए॒तेऽष्टौ॑ व॒सवः॑ क्षि॒ता इति॑ ॥ यथ॑र्त्वे-वाग्ने-र॒र्चिर्वर्ण॑वि॒शेषाः॑ ।

नी॒लार्चि॑श्च पी॒तका॑र्चिश्चेति॑ ॥

अथ॑ वा॒यो-रे॒काद॑शपुरु॒षस्यै॒काद॑शस्त्री॒कस्य॑ ॥

प्र॒भ्राज॑मा॒ना व्य॑व॒दाताः॑ । 34 (10)

T.A.1.9.2

याश्च॑ वा॒सुकि॑वै॒द्युताः॑ । रज॑ताः प॒रुषाः॑ श्या॒माः ।

क॒पिला॑ अ॒तिलो॒हिताः॑ । ऊ॒र्द्ध्वा अ॒वप॑तन्ताश्च । वै॒द्युत॑ इत्ये॒काद॑श ॥

नैनं॑ वैद्यु॒तो हि॒नस्ति॑ । य॒ एवं॑ वै॒द ॥ स॒ होवा॑च व्या॒सः पा॒राश॒र्यः ।
विद्यु॒द्वध॑मेवा॒हं मृ॒त्युमै॑च्छमि॒ति ॥ न त्वका॑म॒ं ह॒न्ति । 35 (10)

T.A.1.9.3

य॒ एवं॑ वै॒द ॥ अथ॑ गन्ध॒र्वग॑णाः । स्वा॒न भ्रा॑ट् । अ॒ङ्घा॒रिर् ब॑भारिः ।
हस्तः॑ सु॒हस्तः॑ । कृ॒शानु॑र् वि॒श्वाव॑सुः । मूर्द्ध॑न्वान्थ॒ सूर्य॑वर्चाः ।
कृ॒तिरि॒त्येका॑दश॒ गन्ध॒र्वग॑णाः ॥ दे॒वाश्च॑ म॒हादे॒वाः ।
रश्म॑यश्च दे॒वा गर॑गिरः ॥ 36 (10)

T.A.1.9.4

नैनं॑ ग॒रो हि॒नस्ति॑ । य॒ एवं॑ वै॒द ॥ गौ॒री मि॑माय स॒लिला॑नि तक्ष॒ती ।
एक॑पदी द्वि॒पदी॒ सा चतु॑ष्पदी । अ॒ष्टा॒पदी॒ नव॑पदी ब॒भूवु॑षी ।
सह॑स्राक्षरा पर॒मे व्यो॑मन्नि॒ति ॥ वा॒चो वि॒शेष॑णं ॥
अथ॑ नि॒गद॑व्याख्या॒ताः । तान॑नु॒क्रमि॑ष्यामः ॥
व॒राह॑वः—स्व॒तप॑सः । 37 (10)

T.A.1.9.5

वि॒द्युन् मह॑सो धू॒पयः॑ । श्वा॒पयो॑ गृ॒हमे॑धाश्चेत्ये॒ते ।
ये चे॒मेऽशि॑मि॒विद्वि॑षः ॥ पर्ज॑न्याः सप्त॒ पृथि॑वीम॒भिवर्ष॑न्ति ।

वृष्टि॑भिरिति । एत॑यैव विभक्ति॑विपरीताः । सप्त॑भिर्वा॒तै-रुदी॑रिताः ।

अमून् ँलो॒का-नभि॑वर्ष॒न्ति । तेषा॑मेषा॒ भव॑ति ॥

स॒मा॒न-मे॒तदु॑दकं । 38 (10)

T.A.1.9.6

उच्चै॑त्यव॒ चाह॑भिः । भूमिं॑ पर्जन्या॒ जिन्व॑न्ति ।

दिवं॑ जिन्वन्-त्य॒ग्नय॑ इति ॥ यदक्ष॑रं भू॒तकृ॑तं । विश्वे॑ दे॒वा उपा॑सते ।

म॒हर्षि॑मस्य गो॒प्तारं॑ । ज॒मद॑ग्नि-मकु॑र्वत ॥ ज॒मद॑ग्नि-रा॒प्याय॑ते ।

छन्दो॑भि-श्चतु॒रुत्तरैः॑ । राज्ञः॑ सोम॒स्य तृ॒प्तासः॑ । 39 (10)

T.A.1.9.7

ब्रह्म॑णा वी॒र्या॑वता । शि॒वा नः॑ प्र॒दिशो॑ दि॒शः ॥ तच्छ॑य्यो॒रा वृ॑णीमहे ।

गा॒तुं य॒ज्ञाय॑ । गा॒तुं य॒ज्ञप॑तये । दैवी॑ स्व॒स्तिरस्तु॑ नः ।

स्व॒स्तिर् मानु॑षेभ्यः । ऊ॒र्द्ध्वं जि॑गातु भेष॒जं । शन्नो॑ अस्तु द्वि॒पदे॑ ।

शञ्च॑तुष्पदे () ॥ सोम॑पा(३) असोम॑पा(३) इति निगद॑व्याख्या॒ताः ॥

40 (11) (व्य॒वदा॒ता - ह॒न्ति - गर॑गिर - स्त॒पस - उद॑कं-

तृ॒प्तास - श्वतु॑ष्पद॒ एकं॑ च) (A9)

1.1.10 अनुवाकं-10

T.A.1.10.1

स॒ह॒स्र॒वृ॒दि॒यं॑ भू॒मिः॑ । प॒रं॑ व्यो॒म॑ स॒ह॒स्र॒वृ॒त् ।
अ॒श्वि॒ना॑ भु॒ज्यू॑ ना॒स॒त्या । वि॒श्व॒स्य॑ जग॒त॒स्प॒ती ॥
जा॒या भू॒मिः॑ प॒ति॒व्यो॒म॑ । मि॒थु॒न॒न्ता॑ अ॒तु॒र्य॒थुः॑ ।
पु॒त्रो बृ॒ह॒स्प॒ती रु॒द्रः॑ । स॒र॒मा इति॑ स्त्री॒पु॒मं ॥
शु॒क्रं वा॑म॒न्य॒द्य॒ज॒तं॑ वा॒म॒न्य॒त् । वि॒षु॒रूपे॑ अ॒ह॒नी द्यौ॑रि॒व स्थः॑ । 41 (10)

T.A.1.10.2

वि॒श्वा हि॑ मा॒या अ॒व॒थः॑ स्व॒धा॒व॒न्तौ॑ । भ॒द्रा वा॑ पू॒ष॒णा॒वि॒ह रा॒ति॒र॒स्तु ॥
वा॒सा॒त्यौ चि॒त्रौ जग॑तो नि॒धानौ॑ । द्या॒वा॒भू॒मी च॒र॒थः॑ स॒ꣳ स॒खा॒यौ ।
ता॒व॒श्वि॒ना रा॒स॒भा॒श्वा ह॒वं मे॑ । शु॒भ॒स्प॒ती आ॒ग॒तꣳ सूर्य॑या स॒ह ॥
त्यु॒ग्रो ह॑ भु॒ज्यु-म॑श्वि॒नो॒द मे॒घे । र॒यि॒न्न क॑श्चिन् म॒मृ॒वाँ(२) अ॒वा॒हाः ।
त॒मू॒ह॒थुर्-नौ॑भि॒रा॒त्म॒न्-व॒ती॒भिः॑ ।
अ॒न्त॒रि॒क्ष पु॒ङ्भि॒र-पो॑द॒का॒भिः॑ ॥ 42 (10)

T.A.1.10.3

ति॒स्रः॑ क्ष॒प॒स्त्रि॒र॒हा ऽति॑व्रज॒द्भिः॑ । ना॒स॒त्या भु॒ज्यु॒मू॒ह॒थुः॑ प॒त॒ङ्गैः॑ ।
स॒मु॒द्र॒स्य ध॑न्व॒न्ना॒र्द्र॒स्य पा॒रे । त्रि॒भी र॒थैः॑ श॒त॒प॒द्भिः॑ ष॒ड॒श्वैः॑ ॥

स॒वि॒तारं॑ वि॒तन्व॑न्तं । अनु॒ब॒ध्ना॑ति शा॒म्बरः॑ । आप॒पूर॑. षं॒बरश्चै॒व ।

स॒वि॒ता ऽरे॒प॒सो ऽभ॑वत् ॥ त्य॒ञ् सु॒तृप्तं॑ वि॒दित्वै॒व ।

ब॒हु॒सोम॑ गिरं॑ व॒शी । 43 (10)

T.A.1.10.4

अ॒न्वे॒ति तु॒ग्रो व॑क्रि॒यान्तं॑ । आ॒य॒सू॒यान्त् सोम॑तृ॒प्सुषु॑ ॥

स स॒ङ्ग्राम॑-स्तमो॒द्योऽत्यो॑तः । वा॒चो गाः पि॑पा॒ति तत् ।

स तद्गो॑भिः स्तवा॑ ऽत्ये॒त्यन्ये॑ । र॒क्षसा॑ ऽन॒न्विता॑श्च ये ॥

अ॒न्वे॒ति परि॑वृ॒त्याऽस्तः॑ । ए॒वमे॒तौ स्थो॑ अ॒श्विना॑ ।

ते ए॒ते द्युःपृ॑थि॒व्योः । अ॒हर॒हर् गर्भ॑न्द॒धाथे॑ ॥ 44 (10)

T.A.1.10.5

तयो॑ रे॒तौ व॒थ्सा व॑हो॒रात्रे॑ । पृ॒थि॒व्या अ॒हः । दि॒वो रा॒त्रिः ।

ता अ॒वि॒सृष्टौ॑ । दं॒पती॑ ए॒व भ॑वतः ॥ तयो॑ रे॒तौ व॒थ्सौ॑ ।

अ॒ग्निश्चा॑-दि॒त्यश्च॑ । रा॒त्रेर्व॒थ्सः॑ ।

श्वे॒त आ॒दि॒त्यः । अ॒होऽग्निः॑ । 45 (10)

T.A.1.10.6

ता॒म्रो अ॒रुणः॑ । ता अ॒वि॒सृ॒ष्टौ । द॒म्प॒ती ए॒व भ॒वतः॑ ॥
 तयो॑ रे॒तौ व॒थ्सौ । वृ॒त्रश्च॑ वै॒द्युत॑श्च । अ॒ग्नेर्वृ॒त्रः । वै॒द्युत॑ आ॒दि॒त्यस्य॑ ।
 ता अ॒वि॒सृ॒ष्टौ । द॒म्प॒ती ए॒व भ॒वतः॑ ॥ तयो॑ रे॒तौ व॒थ्सौ । 46 (10)

T.A.1.10.7

उ॒ष्मा च॑ नी॒हारश्च॑ । वृ॒त्रस्यो॒ष्मा । वै॒द्युत॑स्य नी॒हारः॑ ।
 तौ ता॒वे॒व प्र॒ति॒पद्ये॑ते ॥ से॒यꣳ रा॒त्री ग॒र्भिणी॑ पु॒त्रेण॑ स॒म्व॑सति ।
 तस्या॒ वा ए॒तदु॒ल्बणं॑ ॥ यद्वा॒त्रौ र॒श्मयः॑ । यथा॒ गोर्ग॒र्भिण्या॑ उ॒ल्बणं॑ ।
 ए॒वमे॒तस्या॑ उ॒ल्बणं॑ ॥ प्र॒जयि॑ष्णुः प्र॒जया॑ च प॒शुभि॑श्च भ॒वति॑ () ।
 य ए॒वं वे॒द । ए॒तमु॒द्यन्त॑-म॒पिय॑न्तञ्चेति । आ॒दि॒त्यः पु॒ण्यस्य॑ व॒थ्सः॑ ।
 अथ॑ प॒वि॒त्राङ्गि॑रसः ॥ 47 (14) (स्थो - ऽपो॑दकाभिर् - व॒शी -
 द॒धाथे॑ - अ॒ग्नि - स्तयो॑ रे॒तौ व॒थ्सौ - भ॒वति॑ च॒त्वारि॑ च) (A10)

1.1.11 अनुवाकं-11

T.A.1.11.1

प॒वि॒त्रव॑न्तः प॒रि वा॒जमा॑सते । पि॒तैषां॑ प्र॒त्नो अ॒भिर॑क्षति व्र॒तं ।
 म॒हस्स॑मु॒द्रं व॑रुण स्ति॒रोद॑धे । धी॒रा इ॒च्छेकु॑र्द्ध॒रुणे॑ष्वार॒भं ॥
 प॒वि॒त्रं ते॑ वि॒ततं॑ ब्र॒ह्मण॑स्पते । प्र॒भुर्गा॑त्राणि प॒र्येषि॑ विश्व॒तः ।

अ॒त॒प्त॒त॒नूर् न त॒दामो॑ अ॒श्नु॒ते । श्रु॒ता॒स इ॒द्वह॒न्त॒स्तथ् स॒मा॒शत॑ ॥

“ब्र॒ह्मा दे॒वानां॑{१}” ॥ अ॒सतः॑ स॒द्ये त॒तक्षुः॑ । 48 (10)

T.A.1.11.2

ऋ॒षयः॑ स॒प्ता॒त्रि॒श्च यत् । स॒र्वेऽत्र॑यो अ॒गस्त्य॑श्च ।

नक्ष॑त्रैः शङ्क॑तो ऽव॒सन् ॥ अथ॑ स॒वितुः॑ श्या॒वाश्च॒स्या ऽव॑र्त्तिकाम॒स्य ॥

अमी॑ य ऋ॒क्षा नि॒हिता॑ स उ॒च्चा । न॒क्तं द॑दृ॒श्रे कु॒हचि॑द्दि॒वैयुः॑ ।

अद॑ब्धानि वरु॒णस्य॑ व्र॒तानि॑ । वि॒चाक॑श-च॒न्द्रमा॑ नक्ष॒त्रमे॑ति ॥

तथ् स॒वितुर् व॑रे॒ण्यं । भर्गो॑ दे॒वस्य॑ धीम॒हि । 49 (10)

T.A.1.11.3

धि॒यो यो नः॑ प्रचो॒दया॑त् ॥ तथ्स॒वितुर् वृ॑णीमहे ।

वयं॑ दे॒वस्य॑ भो॒जनं॑ । श्रेष्ठ॑र्त्तुः स॒र्वधा॑त॒मं । तुरं॑ भग॒स्य धी॑म॒हि ॥

अपा॑गू॒हत॑ स॒विता॑ तृ॒भीन् । स॒र्वान् दि॒वो अ॒न्धसः॑ ।

न॒क्तन्ता॑न्यभ॒वन् दृ॒शे । अ॒स्थ्य॒स्थ्ना सं॑भविष्यामः ॥

नाम॑ नामै॒व नाम॑ मे॒ । 50 (10)

T.A.1.11.4

नपु॑ऽसकं॑ पु॒मा॒ऽस्त्र्यस्मि॑ । स्था॒वरो॑ऽस्म्यथ॑ जङ्ग॑मः ।
यजे॑ऽयक्षि॒ यष्टा॑हे च ॥ मया॑ भू॒तान्य॑यक्षत । प॒शवो॑ मम॑ भू॒तानि॑ ।
अ॒नूब॑न्ध्यो ऽस्म्यहं॑ वि॒भुः ॥ स्त्रियः॑ स॒तीः । ता उ॑ मे पु॒ऽस आ॑हुः ।
पश्य॑दक्ष॒ण्वान्न॑-वि॒चेत॑दन्धः । क॒विर्यः॑ पु॒त्रः स इ॒मा चि॑केत । 51 (10)

T.A.1.11.5

यस्ता॑ वि॒जाना॑त् स॒वितुः॑ पि॒ताऽस॑त् ॥ अ॒न्धो म॑णिमविन्दत् ।
तम॑नङ्गुलि-राव॑यत् । अ॒ग्रीवः॑ प्रत्यमुञ्चत् । तम॑जिह्वा अ॒सश्च॑त ॥
ऊर्ध्व॑मूल-मवा॑क्छाखं । वृ॒क्षं यो॑ वेद॒ संप्र॑ति ।
न स॑ जातु॒ जनः॑ श्रद्द॒द्ध्यात् । मृ॒त्युर्मा॑ मा॒रया॑दितिः ॥
हसि॑तऽरु॒दित॑ङ्गीतं । 52 (10)

T.A.1.11.6

वी॒णा प॑णवलासितं । मृ॒तञ्जीव॑ञ्च यत्किञ्चित् ।
अ॒ङ्गानि॑ स्नेव॒ विद्धि॑ तत् ॥ अ॒तृष्य॑ऽस्तृष्य॒ध्याय॑त् ।
अ॒स्माज्जा॑ता मे॒ मिथू॑ चरन् । पु॒त्रो निर्ऋ॑त्या वैदे॒हः ।
अ॒चेता॑ यश्च॒ चेत॑नः ॥ स॒ तं म॑णिमविन्दत् ।

सोऽनङ्गुलि॒राव॑यत् ।

सोऽग्री॒वः प्र॑त्यमु॒न्चत् ॥ 53 (10)

T.A.1.11.7

सोऽजि॒ह्वो अ॒सश्च॑त ॥ नै॒तमृ॑षिं वि॒दित्वा॑ न॒गरं प्र॑वि॒शेत् ।

यदि॑ प्र॒वि॒शेत् । मि॒थौ च॑रित्वा प्र॒वि॒शेत् । तथ्सं॑भ॒वस्य॑ व्र॒तं ॥

आ तम॑ग्ने रथ॒न्तिष्ठ॑ । ए॒काश्च॑मे॒कयो॑जनं । ए॒कच॑क्र-मे॒कधु॑रं ।

वा॒तध्रा॑जि॒गतिं॑ वि॒भो ॥ न रि॑ष्यति न व्य॒थते॑ () ॥ 54 (10)

T.A.1.11.8

ना॒स्याक्षो॑ या॒तु स॑ज्जति । यच्छ्वे॒तान् रोहि॑ताञ्चाग्नेः ।

रथे॑ यु॒क्त्वाऽधि॑तिष्ठति ॥ ए॒कया॑ च द॒शभि॑श्च स्व॒भूते॑ ।

द्वा॒भ्या मि॑ष्टये वि॒श॒त्या च॑ । ति॒सृभि॑श्च व॒हसे॑ त्रि॒श॒ता च॑ ।

नियु॒द्धिर्-वा॒यवि॑ह ता वि॒मुञ्च॑ ॥ 55 (7)

(त॒तक्षु॑र् - धी॒महि॑ - ना॒म मे॑ - चि॒केत॑ - गी॒तं - प्र॑त्यमु॒ञ्चद् -

व्य॒थते॑ - +स॒प्त च॑) (A11)

1.1.12 अनुवाकं-12

T.A.1.12.1

आ॒तनु॒ष्व प्र॒तनु॒ष्व । उ॒द्ध॒मा॒ध॒म॒ स॒न्ध॒म॒ । आ॒दि॒त्ये च॒न्द्र॒वर्णा॑नां ।
ग॒र्भ॒ मा धे॑हि॒ यः पु॒मान् ॥ इ॒तः सि॒क्तꣳ सूर्य॑गतं । च॒न्द्र॒म॒से र॒सङ्क॑धि ।
वा॒रा॒दं ज॒नया॑-ग्रेऽग्निं । य ए॒को रु॒द्र उ॒च्य॑ते ॥
अ॒सं ख्या॑ताः स॒हस्रा॑णि । स्म॒र्यते॑ न च दृ॒श्य॑ते । 56 (10)

T.A.1.12.2

ए॒वमे॒तन्नि॒बो॒धत ॥ आ म॒न्द्रै-रि॒न्द्र ह॑रिभिः । या हि म॒यूर॑रोमभिः ।
मा॒त्वा के॒चिन्नि॒ये मु॒रि॒न्न पा॒शि॒नः । द॒ध॒न्वे॒व ता इ॑हि ॥
मा म॒न्द्रै-रि॒न्द्र ह॑रिभिः । या॒मि म॒यूर॑रोमभिः ।
मा मा के॒चिन्नि॒ये मु॒रि॒न्न पा॒शि॒नः । नि॒ध॒न्वे॒व ताँ(२) इ॑मि ॥
अ॒णुभि॑श्च म॒हद्भि॑श्च । 57 (10)

T.A.1.12.3

नि॒घृ॒ष्वै-र॒स॒मा॒यु॒तैः । का॒लैर् ह॑रि॒त्व॒मा॒प॒न्नैः । इ॒न्द्रा॒या॒हि स॒हस्र॑युक् ॥
अ॒ग्निर् वि॒भ्रा॒ष्टि॒व॒सनः॑ । वा॒युः श्वे॑त॒सि॒क॒द्रु॒कः ।
स॒म्-व॑त्स॒रो वि॒षू॒वर्णैः॑ । नि॒त्या॒स्ते ऽनु॑च॒रा॒स्त॒व ॥

सु॒ब्रह्म॑ण्यो॒ सु॒ब्रह्म॑ण्यो॒ सु॒ब्रह्म॑ण्यो॒ ।

इन्द्रा॑गच्छ॒ हरि॑व आ॒गच्छ॒ मे॒धाति॑थेः । मे॒ष वृ॑षणश्च॒स्य मे॒ने । 58 (10)

T.A.1.12.4

गौ॒राव॑स्क॒न्दि॒न्न-ह॑ल्यायै जा॒र । कौ॒शि॒कब्रा॑ह्मण॒ गौ॒तम॑ब्रु॒वाण॑ ॥

अ॒रु॒णाश्वा॑ इ॒हाग॑ताः । व॒स॒वः पृ॑थि॒वि क्षि॑तः ।

अ॒ष्टौ दि॒ग्वा॒स॒सो ऽग्न॑यः । अ॒ग्निश्च॑ जा॒तवे॑दाश्चे॒त्येते॑ ॥

ता॒म्राश्वा॑-स्ता॒म्रर॑थाः । ता॒म्रव॑र्णा स्त॒थाऽसि॑ताः ।

दण्ड॑ह॒स्ताः खा॒द॒ग्द॒तः । इ॒तो रु॒द्राः प॒राङ्ग॑ताः । 59 (10)

T.A.1.12.5

उ॒क्तञ् स्थानं॑ प्र॒माणञ्च॑ पु॒र इ॒त ॥ बृ॒ह॒स्प॒तिश्च॑ स॒वि॒ता च॑ ।

वि॒श्वरू॑पै-रि॒हाग॑तां । रथे॑नो॒द॒क॒व॒र्त्म॑ना । अ॒प्सुषा॑ इति॒ तद्द्व॑योः ॥

उ॒क्तो वे॑षो वा॒साञ् सि॒ च । का॒ला॒व॒य॒वा॒ना-मि॑तः प्र॒ती॒ज्या ।

वा॒सा॒त्या इ॒त्य॒श्वि॒नोः । को॒ऽन्त॒रि॒क्षे श॒ब्द॒ङ्क॒रो॒तीति॑ ।

वा॒सि॒ष्ठो रौ॒हि॒णो मी॒माञ्सां॑ च॒क्रे () । त॒स्यै॒षा भ॑वति ॥

“वा॒श्रे॒व वि॒द्यु{2}” दि॒ति ॥ ब्र॒ह्म॒ण उ॒द॒रण॑म॒सि । ब्र॒ह्म॒ण उ॒दी॒रण॑म॒सि ।

ब्र॒ह्म॒ण आ॒स्तर॑णम॒सि । ब्र॒ह्म॒ण उ॒प॒स्तर॑णम॒सि ॥ 60 (16)

(दृश्यते - च - मेने - परां गता - श्चक्रे षट् च) (A12)

1.1.13 अनुवाकं-13

T.A.1.13.1 [अपक्रामत गर्भिण्यः]

अष्टयो॑नी-मष्टपु॑त्रां । अष्टप॑त्नी-मिमां म॒हीं । अ॒हं वैद॑ न मे मृत्युः ।

न चामृत्यु॑रघा॒हरत् ॥ अष्टयो॑न्यष्ट पु॒त्रं । अष्टप॑दिद-मन्तरि॑क्षं ।

अ॒हं वैद॑ न मे मृत्युः । न चामृत्यु॑रघा॒हरत् ।

अष्टयो॑नी-मष्टपु॑त्रां । अष्टप॑त्नी-ममू॒न्दिवं ॥ 61 (10)

T.A.1.13.2

अ॒हं वैद॑ न मे मृत्युः । न चामृत्यु॑रघा॒हरत् ॥

“सु॒त्रामा॑णं {3}” “म॒हीमू॒षु” {4} ॥ अदि॑तिर्द्यौ-रदि॑ति-रन्तरि॑क्षं ।

अदि॑ति मा॒ता स पि॒ता स पु॒त्रः । विश्वे॑ दे॒वा अदि॑तिः पञ्चज॒नाः ।

अदि॑तिर् जा॒त-मदि॑तिर् जनि॒त्वं ॥ अष्टौ॑ पु॒त्रासो॑ अदि॑तेः ।

ये जा॒ता स्तन्वः॑ परि॑ । दे॒वाँ (2) उप॑प्रैथ् सप्त॒भिः । 62 (10)

T.A.1.13.3

परा॑ मा॒र्ताण्ड॑मास्यत् ॥ सप्त॒भिः पु॒त्रै-रदि॑तिः । उप॑ प्रैत् पू॒र्व्यं यु॑गं ।

प्रजा॑यै मृत्य॒वे तत् । परा॑ मा॒र्ताण्ड॑-माभ॑रदि॒ति ॥ ताननु॑क्रमिष्यामः ॥

मि॒त्रश्च॑ वरु॒णश्च॑ । धा॒ता चा॒र्य॒मा च॑ । अ॒ञ्शश्च॑ भ॒गश्च॑ ।

इन्द्रश्च॑ वि॒वस्वाञ्श्चेत्ये॒ते () ॥

"हि॒र॒ण्य॒ग॒र्भो{५}" "ह॒ञ्सःशु॒चिष॑त्{६}" ।

"ब्र॒ह्म ज॒ज्ञानं॑{७}" "तदि॒त् प॒द{८}" मि॒ति ॥

ग॒र्भः प्रा॒जाप॑त्यः । अथ॑ पु॒रुषः॑ स॒प्तपु॑रुषः ॥ 63 (14)

(अ॒मूं दि॒वञ् – स॒प्तभि॑ – रे॒ते च॒त्वारि॑ च) (A13)

1.1.14 अनुवाकं-14

[य॒था॒स्थानं॑ ग॒र्भि॒ण्यः॑]

T.A.1.14.1

योऽसौ॑ त॒पन्नु॑देति । स सर्वे॑षां भू॒तानां॑ प्रा॒णाना॑दायोदेति ।

मा मे॑ प्र॒जाया॑ मा प॒शूनां॑ । मा म॑म प्रा॒णाना॑दायोदगाः ॥

अ॒सौ यो॑ ऽस्त॒मेति॑ । स सर्वे॑षां भू॒तानां॑ प्रा॒णाना॑दायास्तमेति ।

मा मे॑ प्र॒जाया॑ मा प॒शूनां॑ । मा म॑म प्रा॒णाना॑दाया स्त॒ङ्गाः ॥

अ॒सौ य॑ आ॒पूर्य॑ति । स सर्वे॑षां भू॒तानां॑ प्रा॒णैरा॒पूर्य॑ति । 64 (10)

T.A.1.14.2

मा॒ मे॒ प्र॒जा॒या॒ मा॒ प॒शू॒नां॑ । मा॒ म॒म॒ प्रा॒णै॒-र॒प॒रि॒ष्ठाः॑ ॥
अ॒सौ योऽप॒क्षी॑यति । स॒ सर्वे॑षां भू॒तानां॑ प्रा॒णै॒-र॒प॒क्षी॑यति ।
मा॒ मे॒ प्र॒जा॒या॒ मा॒ प॒शू॒नां॑ ।
मा॒ म॒म॒ प्रा॒णै॒-र॒प॒क्षे॑ष्ठाः ॥ अ॒मू॒नि॒ नक्ष॑त्राणि ।
स॒र्वे॑षां भू॒तानां॑ प्रा॒णैर॒प॒प्र॒स॒र्प॒न्ति॒ चो॒त्स॒र्प॒न्ति॒ च॒ ।
मा॒ मे॒ प्र॒जा॒या॒ मा॒ प॒शू॒नां॑ ।
मा॒ म॒म॒ प्रा॒णैर॒प॒प्र॒सृ॒प॒त॒ मो॒त्स॒प॒त॒ ॥ 65 (10)

T.A.1.14.3

इ॒मे मा॒सा॒-श्चा॒र्द्ध॒मा॒सा॒श्च॑ ।
स॒र्वे॑षां भू॒तानां॑ प्रा॒णैर॒प॒प्र॒स॒र्प॒न्ति॒ चो॒त्स॒र्प॒न्ति॒ च॒ ।
मा॒ मे॒ प्र॒जा॒या॒ मा॒ प॒शू॒नां॑ ।
मा॒ म॒म॒ प्रा॒णैर॒प॒प्र॒सृ॒प॒त॒ मो॒त्स॒प॒त॒ । इ॒म॒ ऋ॒त॒वः॑ ।
स॒र्वे॑षां भू॒तानां॑ प्रा॒णैर॒प॒प्र॒स॒र्प॒न्ति॒ चो॒त्स॒र्प॒न्ति॒ च॒ ।
मा॒ मे॒ प्र॒जा॒या॒ मा॒ प॒शू॒नां॑ ।

मा॒ म॒म॒ प्रा॒णै॒र॒प॒प्र॒सृ॒प॒त॒ मो॒थ्सृ॒प॒त॒ ॥ अ॒य॒ञ् स॒म्व॑थ्स॒रः॒ ।

स॒र्वे॑षां भू॒तानां॑ प्रा॒णै॒र॒प॒प्र॒स॒र्प॒ति॒ चो॒थ्स॒र्प॒ति॒ च॒ । 66 (10)

T.A.1.14.4

मा॒ मे॒ प्र॒जा॒या॒ मा॒ प॒शू॒नां॑ । मा॒ म॒म॒ प्रा॒णै॒र॒प॒प्र॒सृ॒प॒ मो॒थ्सृ॒प॒ ॥

इ॒द॒म॒हः॑ । स॒र्वे॑षां भू॒तानां॑ प्रा॒णै॒र॒प॒प्र॒स॒र्प॒ति॒ चो॒थ्स॒र्प॒ति॒ च॒ ।

मा॒ मे॒ प्र॒जा॒या॒ मा॒ प॒शू॒नां॑ । मा॒ म॒म॒ प्रा॒णै॒र॒प॒प्र॒सृ॒प॒ मो॒थ्सृ॒प॒ ।

इ॒य॒ञ् रा॒त्रिः॑ । स॒र्वे॑षां भू॒तानां॑ प्रा॒णै॒र॒प॒प्र॒स॒र्प॒ति॒ चो॒थ्स॒र्प॒ति॒ च॒ ।

मा॒ मे॒ प्र॒जा॒या॒ मा॒ प॒शू॒नां॑ । मा॒ म॒म॒ प्रा॒णै॒र॒प॒ प्र॒सृ॒प॒ मो॒थ्सृ॒प॒ () ॥

ॐ॒ भूर्भु॑व॒स्स्वः॑ ॥ ए॒त॒द्वो॑ मि॒थु॒नं॑ मा॒ नो॑ मि॒थु॒नञ् री॒ढ्वं॑ ॥ 67 (12)

(प्रा॒णै॒रा॒पूर्य॑ति-मो॒थ्सृ॒प॒त-चो॒थ्स॒र्प॒ति॒ च॒ - मो॒थ्सृ॒प॒ द्वे॑ च॒) (A14)

Special Korvai

(यो॒सौ॒ षोड॑शा॒मू॒नि॒ द्वा॒द॒शा॒यं॒ च॒तु॑र्द॒श)

(उ॒दे-त्य॑स्त॒मे-त्या॑पूर्य-त्य॒पक्षी॑य-त्य॒मू॒नि॒ नक्ष॑त्रा॒णी-मे॒ मा॒सा॑
- इ॒म ऋ॒त॒वो-ज्य॑ञ् स॒म्व॑थ्स॒र - इ॒द॒म॒ह- रिय॑ञ् रा॒त्रि॒र्द॒श)

1.1.15 अनुवाकं-15

T.A.1.15.1

अथादित्यस्याष्टपुरुषस्य ॥

वसूना मादित्यानाञ्च स्थाने स्वतेजसा भानि ॥

रुद्राणा-मादित्यानाञ्च स्थाने स्वतेजसा भानि ॥

आदित्याना-मादित्यानाञ्च स्थाने स्वतेजसा भानि ॥ सताञ्चसत्यानां ।

आदित्यानाञ्च स्थाने स्वतेजसा भानि ॥ अभिधून्वता-मभिघ्नतां ।

वातवतां मरुतां । आदित्यानाञ्च स्थाने स्वतेजसा भानि ॥

ऋभूणा-मादित्यानाञ्च स्थाने स्वतेजसा भानि () ॥ विश्वेषां देवानां ।

आदित्यानाञ्च स्थाने स्वतेजसा भानि ॥ सम्वत्सरस्य सवितुः ।

आदित्यस्य स्थाने स्वतेजसा भानि ॥ ॐ भूर्भुवस्स्वः ।

रश्मयो वो मिथुनं मा नो मिथुनञ्च रीद्वं ॥ 68 (16)

(ऋभूणामादित्यानाञ्च स्थाने स्वतेजसा भानि षट्च) (A15)

1.1.16 अनुवाकं-16

T.A.1.16.1

आ॒रोग॑स्य॒ स्थाने॑ स्व॒तेज॑सा भानि । भ्राज॑स्य॒ स्थाने॑ स्व॒तेज॑सा भानि ।
पट॑रस्य॒ स्थाने॑ स्व॒तेज॑सा भानि । पत॑ङ्गस्य॒ स्थाने॑ स्व॒तेज॑सा भानि ।
स्व॑र्णरस्य॒ स्थाने॑ स्व॒तेज॑सा भानि ।
ज्यो॑तिषी॒मतस्य॑ स्थाने स्व॒तेज॑सा भानि ।
वि॒भास॑स्य॒ स्थाने॑ स्व॒तेज॑सा भानि ।
कश्य॑पस्य॒ स्थाने॑ स्व॒तेज॑सा भानि । ॐ भूर्भुव॑स्स्वः ।
आपो॑ वो मिथु॒नं मा नो॑ मिथु॒नं री॒द्वं ॥ 69 (10)

(आ॒रोग॑स्य॒ दश॑) (A16)

1.1.17 अनुवाकं-17

T.A.1.17.1

अथ॑ वा॒यो-रे॒काद॑श-पु॒रुष॑स्यै॒काद॑श॒स्त्रीक॑स्य ॥
प्र॒भ्राज॑मा॒नानां॑ रु॒द्राणां॑ स्थाने स्व॒तेज॑सा भानि ।
व्य॒वदा॑तानां॑ रु॒द्राणां॑ स्थाने स्व॒तेज॑सा भानि ।
वा॒सुकि॑वैद्यु॒तानां॑ रु॒द्राणां॑ स्थाने स्व॒तेज॑सा भानि ।

रज॒ताना॑ꣳ रु॒द्राणा॑ꣳ स्था॒ने स्व॒तेज॑सा भानि ।
परु॒षाणा॑ꣳ रु॒द्राणा॑ꣳ स्था॒ने स्व॒तेज॑सा भानि ।
श्या॒माना॑ꣳ रु॒द्राणा॑ꣳ स्था॒ने स्व॒तेज॑सा भानि ।
कपि॒लाना॑ꣳ रु॒द्राणा॑ꣳ स्था॒ने स्व॒तेज॑सा भानि ।
अति॒लोहि॑तानाꣳ रु॒द्राणा॑ꣳ स्था॒ने स्व॒तेज॑सा भानि ।
ऊर्ध्वा॑नाꣳ रु॒द्राणा॑ꣳ स्था॒ने स्व॒तेज॑सा भानि । 70 (10)

T.A.1.17.2

अव॒पत॑न्तानाꣳ रु॒द्राणा॑ꣳ स्था॒ने स्व॒तेज॑सा भानि ।
वैद्यु॑तानाꣳ रु॒द्राणा॑ꣳ स्था॒ने स्व॒तेज॑सा भानि ।
प्रभ्रा॑जमानीनाꣳ रु॒द्राणी॑नाꣳ स्था॒ने स्व॒तेज॑सा भानि ।
व्यव॑दातीनाꣳ रु॒द्राणी॑नाꣳ स्था॒ने स्व॒तेज॑सा भानि ।
वासु॑किवैद्युतीनाꣳ रु॒द्राणी॑नाꣳ स्था॒ने स्व॒तेज॑सा भानि ।
रज॒ताना॑ꣳ रु॒द्राणी॑नाꣳ स्था॒ने स्व॒तेज॑सा भानि ।
परु॒षाणा॑ꣳ रु॒द्राणी॑नाꣳ स्था॒ने स्व॒तेज॑सा भानि ।
श्या॒माना॑ꣳ रु॒द्राणी॑नाꣳ स्था॒ने स्व॒तेज॑सा भानि ।

कपिलाना॑ꣳ रुद्राणीना॑ꣳ स्थाने॑ स्वतेजसा॑ भानि॑ ।

अतिलोहितीना॑ꣳ रुद्राणीना॑ꣳ स्थाने॑ स्वतेजसा॑ भानि॑ () ।

ऊर्द्ध्वाना॑ꣳ रुद्राणीना॑ꣳ स्थाने॑ स्वतेजसा॑ भानि॑ ।

अवपतन्तीना॑ꣳ रुद्राणीना॑ꣳ स्थाने॑ स्वतेजसा॑ भानि॑ ।

वैद्युतीना॑ꣳ रुद्राणीना॑ꣳ स्थाने॑ स्वतेजसा॑ भानि॑ ।

ॐ भूर्भुवस्स्वः॑ ।

रूपाणि वो मिथुनं मा नो मिथुन॑ꣳ रीढ्वं॑ ॥ 71 (15)

(ऊर्द्ध्वाना॑ꣳ रुद्राणा॑ꣳ स्थाने॑ स्वतेजसा॑ भा – न्यतिलोहितीना॑ꣳ

रुद्राणीना॑ꣳ स्थाने॑ स्वतेजसा॑ भानि॑ पञ्च॑ च (A17)

1.1.18 अनुवाकं-18

T.A.1.18.1

अथाग्नेरष्टपुरुषस्य॑ ॥ अग्नेः॑ पूर्वदिश्यस्य॑ स्थाने॑ स्वतेजसा॑ भानि॑ ।

जातवेदस उपदिश्यस्य॑ स्थाने॑ स्वतेजसा॑ भानि॑ ।

सहोजसो दक्षिणदिश्यस्य॑ स्थाने॑ स्वतेजसा॑ भानि॑ ।

अजिराप्रभव उपदिश्यस्य॑ स्थाने॑ स्वतेजसा॑ भानि॑ ।

वैश्वानरस्यापरदिश्यस्य स्थाने स्वतेजसा भानि ।

नर्यापस उपदिश्यस्य स्थाने स्वतेजसा भानि ।

पङ्क्तिराधस उदग्दिश्यस्य स्थाने स्वतेजसा भानि ।

विसर्पिण उपदिश्यस्य स्थाने स्वतेजसा भानि ।

ॐ भूर्भुवस्स्वः() ।

दिशो वो मिथुनं मा नो मिथुनं रीढ्वं ॥ 72 (11)

(स्वरेकम् च) (A18)

Special Korvai

(एतद् रश्मय आपो रूपाणि दिशः पञ्च)

1.1.19 अनुवाकं-19

T.A.1.19.1

दक्षिणपूर्व-स्यान्दिशि विसर्पी नरकः । तस्मान्नः परिपाहि ॥

दक्षिणा-परस्या-न्दिश्य विसर्पी नरकः । तस्मान्नः परिपाहि ॥

उत्तर-पूर्वस्या-न्दिशि विषादी नरकः । तस्मान्नः परिपाहि ॥

उत्तरा-परस्या-न्दिश्य विषादी नरकः । तस्मान्नः परिपाहि ॥

”आ यस्मिन्त्सप्त वासवा{9}” “इन्द्रियाणि शतक्रत{10}”

वित्येते ॥ 73 (9) (दक्षिणपूर्वस्याम् नव) (A19)

1.1.20 अनुवाकं-20

T.A.1.20.1

इन्द्र॑ घोषा॑ वो वसु॑भिः पुरस्ता॑-दुप॑दधतां ।

मनो॑जवसो वः पित॑रुभिर् दक्षिण॑त उप॑दधतां ।

प्रचे॑ता वो रुद्रैः पश्चा॑-दुप॑दधतां ।

विश्व॑कर्मा व आदित्यै॑-रुत्तर॑त उप॑दधतां ।

त्वष्टा॑ वो रूपै॑-रुपरि॑ष्टा-दुप॑दधतां । सं॒ज्ञानं॑ वः पश्चा॑दिति ॥

आदित्यः॑ सर्वो॑ऽग्निः पृथि॑व्यां । वायु॑रन्तरि॑क्षे । सूर्यो॑ दिवि ।

चन्द्र॑मा दिक्षु () । नक्ष॑त्राणि स्वलो॑के ॥ ए॒वा ह्ये॒व । ए॒वा ह्यग्ने॑ ।

ए॒वा हि वा॒यो । ए॒वा हीन्द्र॑ । ए॒वा हि पू॒षन् ।

ए॒वा हि दे॒वाः ॥ 74 (17) दिक्षु॑ सप्त॑ च) (A20)

1.1.21 अनुवाकं-21

T.A.1.21.1

आ॒प॒मा॒पा॒म॒पः॑ सर्वाः॑ । अ॒स्मा-द॒स्मादि॒तोऽमु॑तः ।
अ॒ग्नि॒र्वा॒युश्च॑ सूर्यश्च॑ । स॒ह स॑ञ्चस्कर॒र्द्धि॒या ॥ वा॒य्वश्चा॑ र॒श्मि प॑तयः ।
म॒री॒च्या॒त्मा॒नो अ॒द्रुहः॑ । दे॒वी भु॑व॒न सू॒वरीः॑ । पु॒त्रव॑त्त्वाय॒ मे सु॑त ॥
म॒हा॒ना॒म्नी॒र् महा॑मा॒नाः । म॒ह॒सो म॒ह॒स॒स्स्वः॑ । 75 (10)

T.A.1.21.2

दे॒वीः प॑र्जन्य सू॒वरीः॑ । पु॒त्रव॑त्त्वाय॒ मे सु॑त ॥
अ॒पा॒श्न्यु॒ष्णि-म॒पा र॑क्षः । अ॒पा॒श्न्यु॒ष्णि-म॒पा र॑घं ।
अ॒पा॒घ्रा॒म॒प चा॒वर्ति॑ । अ॒प दे॒वीरि॒तो हि॑त ॥ व॒ज्रं दे॒वीर॑जी॒ताञ्च॑ ।
भु॒व॒नं दे॒व सू॒वरीः॑ । आ॒दि॒त्या॒नदि॑तिं दे॒वीं ।
यो॒नि॒नो॒र्ध्व-मु॒दी॒षत॑ ॥ 76 (10)

T.A.1.21.3

भ॒द्रं क॑र्णेभिः शृणु॒याम॑ दे॒वाः । भ॒द्रं प॑श्येमा॒क्षभि॑र्-यज॒त्राः ।
स्थि॒रैरङ्गै॑ स्तुष्टु॒वाञ् स॑स्त॒नूभिः॑ । व्य॒शेम॑ दे॒वहि॑तं य॒दायुः॑ ॥
स्व॒स्ति न॒ इन्द्रो॑ वृ॒द्धश्च॑वाः । स्व॒स्ति नः॑ पू॒षा वि॒श्ववे॑दाः ।

स्व॒स्ति न॒स्ताक्ष॒र्यो अरि॑ष्टनेमिः । स्व॒स्ति नो बृ॒हस्प॑तिर् दधातु ॥
के॒तवो अ॒रुणा॑सश्च । ऋ॒षयो वा॑तर॒शनाः() । प्र॒तिष्ठा॑ श॒तधा॑ हि ।
स॒माहि॑तासो स॒हस्र॑धाय॒सं ॥ शि॒वा नः॑ श॒न्तमा॑ भवन्तु ।
दि॒व्या आप॑ ओष॒धयः॑ ॥ सु॒मृ॒डीका॑ सर॒स्वति॑ ।
मा॒ते व्यो॑म स॒न्दृशि॑ ॥ 77 (16)

(स्व – रु॒दी॒षत – वा॑तर॒शनाः षट्च॑) (A21)

1.1.22 अनुवाकं-22

T.A.1.22.1

यो॒ऽपां पु॒ष्पं वै॑द । पु॒ष्पवान् प्र॒जावान् प॒शुमान् भ॑वति ।
च॒न्द्रमा॒ वा अ॒पां पु॒ष्पं ॥ पु॒ष्पवान् प्र॒जावान् प॒शुमान् भ॑वति ।
य ए॒वं वै॑द ॥ यो॒ऽपामा॑य॒तनं॑ वै॑द । आ॒यत॑नवान् भवति ।
अ॒ग्निर्वा अ॒पामा॑य॒तनं॑ । आ॒यत॑नवान् भवति ।
यो॒ऽग्नेरा॑य॒तनं॑ वै॑द । 78 (10)

T.A.1.22.2

आ॒यत॑नवान् भवति । आपो॒ वा अ॒ग्नेरा॑य॒तनं॑ । आ॒यत॑नवान् भवति ।
य ए॒वं वै॑द ॥ यो॒ऽपामा॑य॒तनं॑ वै॑द । आ॒यत॑नवान् भवति ।

वा॒युर्वा॑ अ॒पामा॒यत॑नं । आ॒यत॑नवान् भवति । यो वा॒योरा॒यत॑नं वै॒द ।

आ॒यत॑नवान् भवति । 79 (10)

T.A.1.22.3

आपो॑ वै वा॒योरा॒यत॑नं । आ॒यत॑नवान् भवति । य ए॒वं वै॒द ॥

योऽपामा॒यत॑नं वै॒द । आ॒यत॑नवान् भवति । अ॒सौ वै तप॑न्नपा-मा॒यत॑नं ।

आ॒यत॑नवान् भवति । योऽमु॒ष्य तप॑त आ॒यत॑नं वै॒द ।

आ॒यत॑नवान् भवति । आपो॑वा अ॒मुष्य॑ तप॑त आ॒यत॑नं । 80 (10)

T.A.1.22.4

आ॒यत॑नवान् भवति । य ए॒वं वै॒द ॥ योऽपामा॒यत॑नं वै॒द ।

आ॒यत॑नवान् भवति । च॒न्द्रमा॒ वा अ॒पामा॒यत॑नं । आ॒यत॑नवान् भवति ।

यश्च॒न्द्रम॑स आ॒यत॑नं वै॒द । आ॒यत॑नवान् भवति ।

आपो॑ वै च॒न्द्रम॑स आ॒यत॑नं । आ॒यत॑नवान् भवति । 81 (10)

T.A.1.22.5

य ए॒वं वै॒द ॥ योऽपामा॒यत॑नं वै॒द । आ॒यत॑नवान् भवति ।

नक्ष॑त्राणि वा अ॒पामा॒यत॑नं । आ॒यत॑नवान् भवति ।

यो नक्ष॑त्राणा-मा॒यत॑नं वै॒द । आ॒यत॑नवान् भवति ।

आपो॑ वै नक्ष॑त्राणा॑-मा॒यत॑नं । आ॒यत॑नवान् भवति ।

य ए॒वं वै॑द ॥ 82 (10)

T.A.1.22.6

योऽपामा॑यत॑नं वै॑द । आ॒यत॑नवान् भवति । पर्जन्यो॑ वा अ॒पामा॑यत॑नं ।

आ॒यत॑नवान् भवति । यः पर्जन्य॑-स्या॒यत॑नं वै॑द ।

आ॒यत॑नवान् भवति । आपो॑ वै पर्जन्य॑-स्या॒यत॑नं ।

आ॒यत॑नवान् भवति । य ए॒वं वै॑द ॥ योऽपामा॑यत॑नं वै॑द ॥ 83 (10)

T.A.1.22.7

आ॒यत॑नवान् भवति । सम्॑व॒त्सरो॑ वा अ॒पामा॑यत॑नं ।

आ॒यत॑नवान् भवति । यः सम्॑व॒त्सर॑-स्या॒यत॑नं वै॑द ।

आ॒यत॑नवान् भवति । आपो॑ वै सम्॑व॒त्सर॑-स्या॒यत॑नं ।

आ॒यत॑नवान् भवति । य ए॒वं वै॑द ॥

योऽप्सु॑ ना॒वं प्र॑ति॒ष्ठितां॑ वै॑द । प्र॒त्ये॒व ति॑ष्ठति । 84 (10)

T.A.1.22.8

इ॒मे वै लो॒का अ॒प्सु प्र॑ति॒ष्ठिताः॑ । तदे॒षाऽभ्य॑नू॒क्ता ॥

अ॒पाँ र॒समु॑द॒यँ स॒न् । सूर्ये॑ शु॒क्रँ स॒माभृ॑तं ।

अपा॑ꣳ रस॑स्य यो रसः॑ । तं॑ वो॑ गृह्णा॑-म्यु॒त्तम॑मिति ॥

इ॒मे वै लो॒का अ॒पाꣳ रसः॑ । तेऽमु॑ष्मिन्-ना॒दित्ये॑ स॒माभृ॑ताः ॥

जा॒नुद॒घ्नी-मु॑त्तर-वे॒दीङ्घ्रा॑त्वा । अ॒पां पू॑रयि॒त्वा गु॑ल्फद॒घ्नं । 85 (10)

T.A.1.22.9

पु॒ष्कर॑पर्णैः पु॒ष्कर॑दण्डैः पु॒ष्करै॑श्च स॒ꣳस्तीर्य॑ । तस्मि॑न् विहा॒यसे॑ ।

अ॒ग्निं प्र॒णीयो॑प-स॒माधा॑य ॥ ब्र॒ह्मवा॑दिनो॒ वद॑न्ति ।

कस्मा॑त् प्र॒णीतेऽय॑म॒ग्निश्ची॒यते॑ ॥ साप्प्र॑णी॒तेऽय॑म॒प्सु ह्य॑य॒ञ्ची॒यते॑ ॥

अ॒सौ भु॑वनेऽप्य-ना॒हिता॑ग्नि-रे॒ताः ।

तम॑भित॒ एता॑ अ॒बीष्ट॑का॒ उप॑दधाति ॥

अ॒ग्निहो॒त्रे दर्॑.श॒पूर्ण-मा॑सयोः॑ ।

प॒शुब॑न्धे चा॒तुर्मा॑स्येषु । 86 (10)

T.A.1.22.10

अथो॑ आहुः । सर्वे॑षु य॒ज्ञक्र॑तुष्विति ॥ ए॒तद्ध॑ स्म॒ वा आ॑हुः श॒ण्डि॒लाः ।

कम॑ग्निज्चि॒नुते॑ ॥ स॒त्रिय॑-म॒ग्निज्चि॑न्वानः ।

सम्व॑त्सरं प्र॒त्यक्षे॑ण ॥ कम॑ग्निज्चि॒नुते॑ । सा॒वित्र॑-म॒ग्निज्चि॑न्वानः ।

अ॒मुमा॑दि॒त्यं प्र॒त्यक्षे॑ण ॥ कम॑ग्निज्चि॒नुते॑ । 87 (10)

T.A.1.22.11

ना॒चि॒के॒त-म॒ग्नि॒ज्चि॒न्वा॒नः । प्रा॒णान् प्र॒त्यक्षे॑ण ॥ क॒म॒ग्नि॒ज्चि॒नु॒ते ।
चा॒तुर्.हो॒त्रि॒य-म॒ग्नि॒ज्चि॒न्वा॒नः । ब्र॒ह्म प्र॒त्यक्षे॑ण ॥ क॒म॒ग्नि॒ज्चि॒नु॒ते ।
वै॒श्व॒सृ॒ज-म॒ग्नि॒ज्चि॒न्वा॒नः । शरी॑रं प्र॒त्यक्षे॑ण ॥ क॒म॒ग्नि॒ज्चि॒नु॒ते ।
उ॒पा॒नु॒वा॒क्य॒मा॒शु-म॒ग्नि॒ज्चि॒न्वा॒नः । 88 (10)

T.A.1.22.12

इ॒मान् लो॒कान् प्र॒त्यक्षे॑ण ॥ क॒म॒ग्नि॒ज्चि॒नु॒ते ।
इ॒म॒मा॒रु॒णके॒तु॒क॒म॒ग्नि॒ज्चि॒न्वा॒न इति॑ । य ए॒वा॒सौ ।
इ॒तश्चा॒-मु॒तश्चा॒व्य॒ती॒पा॒ती । तमि॑ति ॥ यो॒ऽग्ने॑र्मि॒थू॒या वे॑द ।
मि॒थु॒न॒वान् भ॑वति । आ॒पो वा अ॒ग्नेर्मि॒थू॒याः ।
मि॒थु॒न॒वान् भ॑वति () । य ए॒वं वे॑द ॥ 89 (11)
(वे॑द - भ॒व - त्या॒य॒त॒नं - भ॑वति - वे॑द - वे॑द - ति॒ष्ठति -
गुल्फ॑द॒घ्नं - चा॒तुर्मा॒स्ये - ष्व॒मु॒मा॒दि॒त्यं प्र॒त्यक्षे॑ण क॒म॒ग्निं चि॑नुत -
उ॒पा॒नु॒वा॒क्य॒मा॒शु॒म॒ग्निं चि॑न्वा॒नो - मि॒थू॒या मि॒थु॒न॒वान्
भ॑वत्ये॒कं च) (A22)

Special Korvai

(पु॒ष्प-म॒ग्नि-वा॒यु-र॒सौ वै तप॑-ञ्च॒न्द्रमा॒ नक्ष॑त्राणि-प॒र्जन्यः॑
सम्व॑त्सरो-योऽप्सु॑-नाव॑
मे॒तद्ध॑ स्म॒ वै-स॑त्रिय॒-सम्व॑त्सर॒-सा॑वि॒त्र-म॒मुं-ना॑चिके॒तं
प्रा॒णा-श्चा॑तुर्हो॒त्रियं॑-ब्र॒ह्म-वै॑श्वसृ॒ज-शरी॑र-मु॒पानु॑वा॒क्यमा॒शु-
मि॒मान् लो॒का-नि॒ममा॑रुणके॒तुकं॑-य॒ ए॒वासौ)

1.1.23 अनुवाकं-23

T.A.1.23.1

आपो॑ वा इ॒दमा॑सन्थ् स॒लिल॑मे॒व ।
स प्र॒जाप॑तिरेकः पु॒ष्कर॑पर्णे॒ सम॑भवत् ।
तस्या॑न्तर् मन॑सि का॒मः सम॑वर्तत । इ॒दं सृ॑जे॒यमि॑ति ।
तस्मा॑द्यत् पु॒रुषो॑ मन॑साऽभि॒गच्छ॑ति । तद्वा॒चा व॑दति ।
तत्क॑र्मणा॒ करो॑ति । तद्दे॒षाऽभ्य॑नू॒क्ता ॥ का॒मस्त॑द॒ग्रे सम॑वर्त॒ताधि॑ ।
मन॑सो॒ रेतः॑ प्रथ॒मं य॑दासीत् । 90 (10)

T.A.1.23.2

स॒तो ब॒न्धुम॑सति॒ निर॑विन्दन् । ह॒दि प्र॒ती॒ष्या क॒वयो॑ मनी॒षेति॑ ॥
उ॒पै॒नन्त॑दुप॒नम॑ति । यत् का॒मो भ॑वति । य ए॒वं वै॑द ॥ स तपो॑ऽतप्यत ।
स तप॑स्तप्त्वा । शरी॑रमधू॒नुत । तस्य॑ यन् मा॒ऽसमा॑सीत् ।
ततो॑ऽरुणाः के॒तवो॑ वा॒तर॑श॒ना ऋ॒षय॑ उ॒दति॑ष्ठन् । 91 (10)

T.A.1.23.3

ये न॒खाः । ते वै॑खान॒साः । ये वा॒लाः । ते वा॒लखि॑ल्याः । यो र॒सः ।
सो॒ऽपां ॥ अ॒न्तर॑तः कू॒र्म भू॒तः सर्प॑न्तं । तम॑ब्रवीत् ।
मम॑ वै त्वङ्मा॒ऽसा । सम॑भूत् । 92 (10)

T.A.1.23.4

नेत्य॑ब्रवीत् । पूर्॒वमे॒वाह॑-मि॒हास॑मिति । तत्पु॑रुषस्य पु॒रुष॑त्वं ।
स स॒हस्र॑शी॒र्षा पु॑रुषः । स॒हस्रा॑क्षः स॒हस्र॑पात् ।
भू॒त्वोद॑तिष्ठत् । तम॑ब्रवीत् । त्वं वै पूर्॒वः सम॑भूः ।
त्वमि॒दं पूर्॑वः कुरु॒ष्वेति॑ ॥ स इ॒त आ॒दाया॑पः । 93 (10)

T.A.1.23.5

अ॒ज्जलि॑ना पु॒रस्ता॑-दु॒पाद॑धात् । ए॒वा ह्ये॒वेति॑ ।
तत॑ आ॒दित्य॑ उ॒दति॑ष्ठत् । सा प्रा॒ची दिक्॑ ॥

अथारु॒णः के॒तुर् दक्षि॑णत उ॒पाद॑धात् । ए॒वा ह्यग्नि॑ इति ।

ततो॑ वा अ॒ग्निरु॑दतिष्ठत् । सा दक्षि॑णा दिक् ।

अथारु॒णः के॒तुः पश्चा॑दु॒पाद॑धात् ।

ए॒वा हि वा॒यो इति॑ । 94 (10)

T.A.1.23.6

ततो॑ वा॒युरु॑दतिष्ठत् । सा प्र॒तीची॑ दिक् ।

अथारु॒णः के॒तु-रु॑त्तरत उ॒पाद॑धात् । ए॒वा ही॒न्द्रेति॑ ।

ततो॑ वा इन्द्र॑ उ॒दति॑ष्ठत् । सोदी॑ची दिक् ।

अथारु॒णः के॒तुर् म॒द्ध्य उ॒पाद॑धात् । ए॒वा हि पू॒षन्नि॑ति ।

ततो॑ वै पू॒षोद॑तिष्ठत् । से॒यन्दिक् । 95 (10)

T.A.1.23.7

अथारु॒णः के॒तुरु॑परि॒ष्टा-दु॒पाद॑धात् । ए॒वा हि दे॒वा इति॑ ।

ततो॑ दे॒वमनु॑ष्याः पि॒तरः । ग॒न्धर्वा॑-फ॒सर॒सश्चो॑द-तिष्ठन् ।

सोर्द्ध्वा॑ दिक् ॥ या वि॒प्रुषो॑ वि॒परा॑पतन् ।

ताभ्योऽसु॑रा रक्षा॑ंसि पि॒शाचा॑श्चो॒दति॑ष्ठन् । तस्मा॑त्ते प॒राभ॑वन् ।

वि॒पु॒ङ्भ्यो॑ हि ते सम॑भवन् ॥

तदे॒षाऽभ्य॑नू॒क्ता ॥ 96 (10)

T.A.1.23.8

आपो॑ ह॒ यद् बृ॒हती॑र् गर्भ॑मायन् । दक्षं॑ दधा॑ना ज॒नय॑न्तीः स्वय॑म्भुं ।

तत॑ इ॒मेऽद्ध्य॑सृ॒ज्यन्त॑ सर्गाः॑ । अद्भ्यो॑ वा इ॒दं सम॑भूत् ।

तस्मा॑दि॒दं सर्वं॑ ब्र॒ह्म स्वयं॑भ्विति ॥

तस्मा॑दि॒दं सर्वं॑ शिथि॑लमिवाध्रु॑वमिवाभवत् ॥

प्र॒जाप॑तिर् वाव॑ तत् । आ॒त्मना॑ऽऽत्मानं॑ वि॒धाय॑ ।

तदे॒वानु॑ प्रावि॑शत् ॥ तदे॒षाऽभ्य॑नू॒क्ता () ॥ 97 (10)

T.A.1.23.9

वि॒धाय॑ लो॒कान् वि॒धाय॑ भू॒तानि॑ । वि॒धाय॑ सर्वाः॑ प्र॒दिशो॑ दि॒शश्च॑ ।

प्र॒जाप॑तिः प्रथ॑म॒जा ऋ॒तस्य॑ । आ॒त्मना॑ऽऽत्मा-न॑मभिस॑म्विवे॒शेति॑ ॥

सर्व॑मे॒वेद॑माप्त्वा । सर्व॑-मव॒रुद्ध्य॑ । तदे॒वानु॑ प्रवि॑शति ।

य ए॒वं वे॑द ॥ 98 (8) (आसी॑ - दति॑ष्ठन् - न॒भू - दपो॑ - वायो॑

इति॑ - से॒यं दि॒ग - भ्य॑नू॒क्ता - ऽभ्य॑नू॒क्ता -+ऽष्टौ॑ च) (A23)

1.1.24 अनुवाकं-24

T.A.1.24.1

च॒तु॒ष्टय्य॒ आपो॑ गृ॒ह्णाति॑ । च॒त्वारि॒ वा अ॒पाꣳ रू॒पाणि॑ । मे॒घो वि॒द्युत् ।
स्त॒नयि॒नुर् वृ॒ष्टिः । तान्ये॒वा वरु॑न्धे ॥ आ॒तप॑ति॒ वर्ष्या॑ गृ॒ह्णाति॑ ।
ताः पु॒रस्ता॒-दुप॑दधाति । ए॒ता वै ब्र॑ह्मवर्च॒स्या आपः॑ ।
मु॒खत॒ एव॑ ब्र॒ह्मवर्च॑स-मव॒रुन्धे॑ ।
तस्मान्-मु॒खतो॑ ब्र॒ह्मवर्च॑सितरः ॥ 99 (10)

T.A.1.24.2

कू॒प्या गृ॒ह्णाति॑ । ता दक्षि॑णत॒ उप॑दधाति । ए॒ता वै ते॒जस्वि॒नीरा॒पः ।
तेज॑ ए॒वास्य॑ दक्षि॑णतो॒ दधा॑ति । तस्मा॒द् दक्षि॑णोर्दध॒ ऽस्तेज॑स्वितरः ॥
स्था॒वरा गृ॒ह्णाति॑ । ताः प॒श्चादु॑पदधाति । प्र॒तिष्ठि॑ता॒ वै स्था॑वराः ।
प॒श्चादे॒व प्र॒तिष्ठि॑ति ॥ वह॑न्तीर् गृ॒ह्णाति॑ । 100 (10)

T.A.1.24.3

ता उत्तर॑त॒ उप॑दधाति ।
ओज॑सा॒ वा ए॒ता वह॑न्तीरि॒वोद्ग॑तीरि॒व आ॒कूज॑तीरि॒व धा॑वन्तीः ।
ओज॑ ए॒वास्यो॑त्तरतो॒ दधा॑ति ।

तस्मा॒दुत्तरो॑ऽर्ध॒ ओज॑स्वितरः ॥ सं॒भार्या॑ गृह्णाति ।
 ता म॒द्ध्य॑ उप॒दधा॑ति । इ॒यं वै सं॒भार्याः॑ । अ॒स्यामे॒व प्र॑ति॒तिष्ठ॑ति ॥
 प॒ल्व॒ल्या गृ॑ह्णाति । ता उप॒रि॒ष्टा-दु॒पाद॑धाति । 101 (10)

T.A.1.24.4

असौ॑ वै प॒ल्व॒ल्याः । अ॒मुष्या॑मे॒व प्र॑ति॒तिष्ठ॑ति ॥ दि॒क्षूप॑दधाति ।
 दि॒क्षु वा आपः॑ । अ॒न्नं वा आपः॑ । अ॒द्भ्यो वा अ॒न्नञ्जा॑यते ।
 यदे॒वाद्भ्यो॑-ऽन्नं॑ जा॒यते॑ । तद॑व॒रुन्धे॑ ॥
 तं वा ए॒तम॑रुणाः के॒तवो॑ वा॒तर॑श॒ना ऋ॑षयो-ऽचि॒न्वन् ।
 तस्मा॑-दा॒रुण॑ के॒तुकः॑ () ॥
 तदे॒षाऽभ्य॑नू॒क्ता ॥ के॒तवो॑ अ॒रुणा॑सश्च । ऋ॒षयो वा॒तर॑श॒नाः ।
 प्र॒ति॒ष्ठां श॒तधा॑ हि । स॒माहि॑तासो स॒हस्र॑धा॒यस॑मि॒ति ॥
 श॒तश॑श्चै॒व ऽस॒हस्र॑शश्च प्र॒ति॒तिष्ठ॑ति । य ए॒तम॑ग्निञ्चि॒नुते॑ ।
 य उ॒चैन॑मे॒वं वैद॑ ॥ 102 (18)

(ब्र॒ह्मव॑र्च॒सित॑रो – वह॑न्तीर् गृह्णाति – ता उप॒रि॒ष्टादु॒पाद॑धा –
 त्या॒रुण॑के॒तुको॑ऽष्टौ च) (A24)

1.1.25 अनुवाकं-25

T.A.1.25.1

जा॒नु॒द॒ध्नी॑-मु॒त्तर॑वे॒दी॒ङ्घ्रा॒त्वा । अ॒पां पू॑रयति । अ॒पाꣳ स॑र्व॒त्वाय॑ ।
पु॒ष्कर॑प॒र्णꣳ रु॒क्मं पु॑रुष-मि॒त्युप॑दधाति । तपो॒ वै पु॑ष्कर॒प॒र्णं ।
स॒त्यꣳ रु॒क्मः । अ॒मृतं॑ पु॑रुषः । ए॒ताव॑द्वा वा॒स्ति । या॑व॒दे॒तत् ।
या॑व॒दे॒वास्ति॑ । 103 (10)

T.A.1.25.2

तद॑वरु॒न्धे ॥ कूर्म॑मुप॑दधाति । अ॒पामे॒व मे॒धम॑वरु॒न्धे ।
अथो॑ स्व॒र्गस्य॑ लो॒कस्य॑ सम॒ष्ट्यै ॥ आ॒पमा॑पाम॒पः सर्वाः॑ ।
अ॒स्माद॒स्मादि॒तोऽमु॑तः । अ॒ग्नि॒र्वायु॑श्च सूर्य॑श्च ।
सह॑ सञ्च॒स्कर॑र्द्धि॒या इति॑ । “वा॒य्वश्चा॑ र॒श्मिप॑तयः{11}” ॥
लो॒कं पृ॑ण॒च्छि॒द्रं पृ॑ण । 104 (10)

T.A.1.25.3

या॒स्ति॒स्रः पर॑म॒जाः ॥
“इ॒न्द्र॒घोषा॑ वो वसु॑भि{12}” “रे॒वा ह्ये॒वे{13}” ति॑ ॥
पञ्च॑ चि॒तय॑ उप॑दधाति । पा॒ङ्क्तो॑ऽग्निः ।

या॒वा॒ने॒वा॒ग्निः॑ । त॒ज्जि॒नु॒ते ॥ लो॒कं॑ पृ॒णया॑ द्वितीया॒-मु॒प॒द॒धा॒ति ।
 प॒ञ्च॒प॒दा॒ वै वि॒राट् । तस्या॒ वा इ॒यं पा॒दः । अ॒न्त॒रि॒क्षं पा॒दः () ।
 द्यौः पा॒दः । दि॒शः पा॒दः । प॒रोर॒जाः पा॒दः ॥ वि॒राज्ये॒व प्र॒ति॒ति॒ष्ठति॑ ।
 य ए॒त॒म॒ग्नि॒ज्जि॒नु॒ते । य उ॒चै॒नमे॒वं वै॒द ॥ 105 (16)

(अ॒स्ति - पृ॒णा - न्त॒रि॒क्षम् पा॒दः षट्च॑) (A25)

1.1.26 अनुवाकं-26

T.A.1.26.1

अ॒ग्निं प्र॒णीयो॒प॒स॒मा॒धाय॑ । त॒म॒भित॑ ए॒ता अ॒बी॒ष्टका॑ उ॒प॒द॒धा॒ति ।
 अ॒ग्नि॒हो॒त्रे द॒र्श॒पूर्ण॑-मा॒स॒योः । प॒शु॒ब॒न्धे चा॒तु॒र्मा॒स्ये॒षु ।
 अथो॑ आहुः । स॒र्वे॒षु य॒ज्ञक्र॒तुष्वि॒ति ॥
 अथ॑ ह स्मा॒हारु॒णः स्वा॒य॒म्भु॒वः ।

सा॒वि॒त्रः स॒र्वो॒ऽग्नि॑-रि॒त्यन॑नु॒षङ्गं॑ म॒न्याम॑हे ।

ना॒ना वा ए॒तेषां॑ वी॒र्या॑णि ॥ क॒म॒ग्नि॒ज्जि॒नु॒ते । 106 (10)

T.A.1.26.2

स॒त्रि॒य॒म॒ग्नि॒ज्जि॒न्वा॒नः । क॒म॒ग्नि॒ज्जि॒नु॒ते । सा॒वि॒त्र॒म॒ग्नि॒ज्जि॒न्वा॒नः ।
 क॒म॒ग्नि॒ज्जि॒नु॒ते । ना॒चि॒के॒त॒म॒ग्नि॒ज्जि॒न्वा॒नः । क॒म॒ग्नि॒ज्जि॒नु॒ते ।

चा॒तुर्॒हो॒त्रि॒यम॒ग्नि॒ज्चि॒न्वा॒नः । क॒म॒ग्नि॒ज्चि॒नु॒ते ।

वै॒श्व॒सृ॒जम॒ग्नि॒ज्चि॒न्वा॒नः । क॒म॒ग्नि॒ज्चि॒नु॒ते । 107 (10)

T.A.1.26.3

उ॒पा॒नु॒वा॒क्य॒मा॒शु॒म॒ग्नि॒ज्चि॒न्वा॒नः । क॒म॒ग्नि॒ज्चि॒नु॒ते ।

इ॒म॒मा॒रु॒णके॒तु॒क॒म॒ग्नि॒ज्चि॒न्वा॒न इति ॥ वृ॒षा वा अ॒ग्निः ।

वृ॒षा॒णौ स॒स्फा॒लये॒त् । ह॒न्येता॑स्य य॒ज्ञः ॥ तस्मा॑न्ना॒नु॒ष॒ज्यः ॥

सो॒त्तर॑वे॒दिषु॑ क॒र्तुषु॑ चि॒न्वी॒त । उ॒त्तर॑वे॒द्याँ ह्य॒ग्निश्ची॒यते ॥

प्र॒जा॒का॒मश्चि॒न्वी॒त । 108 (10)

T.A.1.26.4

प्रा॒जा॒प॒त्यो वा ए॒षोऽग्निः॑ । प्रा॒जा॒प॒त्याः प्र॒जाः । प्र॒जा॒वा॒न् भ॒वति॑ ।

य ए॒वं वै॒द ॥ प॒शु॒का॒मश्चि॒न्वी॒त । सं॒ज्ञा॒नं॑ वा ए॒तत् प॒शूनां॑ ।

यदा॒पः । प॒शूना॑मे॒व सं॒ज्ञा॒ने ऽग्नि॒ज्चि॒नु॒ते । प॒शु॒मा॒न् भ॒वति॑ ।

य ए॒वं वै॒द ॥ 109 (10)

T.A.1.26.5

वृ॒ष्टि॒का॒मश्चि॒न्वी॒त । आ॒पो वै वृ॒ष्टिः । प॒र्जन्यो॑ व॒र्षु॒को भ॒वति॑ ।

य ए॒वं वै॒द ॥ आ॒म॒या॒वी चि॒न्वी॒त । आ॒पो वै भे॒ष॒जं ।

भेषज-मेवास्मै करोति । सर्वमायुरेति ॥

अभिचर७ श्रिन्वीत । वज्रो वा आपः । 110 (10)

T.A.1.26.6

वज्रमेव भ्रातृव्येभ्यः प्रहरति । स्तृणुत एनं ॥ तेजस्कामो यशस्कामः ।

ब्रह्मवर्चस्कामः स्वर्गकामश्चिन्वीत । एतावद्वावास्ति । यावदेतत् ।

यावदेवास्ति । तदवरुन्धे ॥ तस्यै तद्व्रतं ।

वर्षति न धावेत् । 111 (10)

T.A.1.26.7

अमृतं वा आपः । अमृतस्या-नन्तरित्यै ॥ नाप्सु-मूत्रपुरीषङ्कुर्यात् ।

न निष्ठीवेत् । न विवसनः स्नायात् । गुह्यो वा एषोऽग्निः ।

एतस्याग्ने रनति दाहाय ॥ न पुष्करपर्णानि हिरण्यं वाऽधितिष्ठेत् ।

एतस्याग्ने-रनभ्यारोहाय ॥ न कूर्मस्याश्नीयात् () ।

नोदकस्या-घातुकान्येन-मोदकानि भवन्ति । अघातुका आपः ।

य एतमग्निञ्चिनुते । य उचैनमेवं वेद ॥ 112 (14)

(चिनुते - चिनुते - प्रजाकामश्चिन्वीत - य एवं वेदा - पो -

धावे - दश्नीयाच्चत्वारि च) (A26)

1.1.27 अनुवाकं-27

T.A.1.27.1

इ॒मा नु॒कं॑ भुव॑ना सी॒षधे॑म । इन्द्र॑श्च वि॒श्वेच॑ दे॒वाः ॥
य॒ज्ञञ्च॑ नस्त॒न्वञ्च॑ प्र॒जाञ्च॑ । आ॒दि॒त्यैरिन्द्रः॑ स॒ह सी॒षधा॑तु ॥
आ॒दि॒त्यैरिन्द्रः॑ सग॑णो-म॒रुद्भिः॑ । अ॒स्माकं॑ भू॒त्ववि॒ता त॒नूनां॑ ॥
आ॒प्लव॑स्व प्र॒प्लव॑स्व । आ॒ण्डी भव॑ ज॒ मा मु॒हुः ।
सु॒खादी॑न्दुःख॒निध॑नां । प्र॒तिमु॑ञ्चस्व॒ स्वां पु॒रं ॥ 113 (10)

T.A.1.27.2

मरी॑चयः स्वायं॑भु॒वाः । ये शरी॑राण्य॒कल्प॑यन् । ते ते दे॒हङ्क॑ल्पयन्तु ।
मा च॑ ते ख्या॒ स्म ती॑रिषत् ॥ उत्तिष्ठ॑त मा स्व॒प्त ।
अ॒ग्नि-मि॑च्छ॒ध्वं भा॑रताः । रा॒ज्ञः सोम॑स्य तृ॒प्तासः॑ ।
सूर्ये॑ण स॒युजो॑षसः ॥ “यु॒वा सु॒वासाः{14}” ॥
अ॒ष्टाच॑क्रा नव॒द्वारा ॥ 114 (10)

T.A.1.27.3

दे॒वानां॑ पू॒रयो॑द्ध्या । तस्या॑ हिर॒ण्मयः॑ को॒शः ।
स्व॒र्गो लो॒को ज्यो॑तिषा ऽऽवृ॑तः ॥ यो वै तां ब्र॒ह्म॑णो वे॒द ।

अ॒मृ॒ते॒ना॒वृ॒तां॑ पु॒रीं॑ । तस्मै॑ ब्र॒ह्म च॑ ब्र॒ह्मा च॑ ।
 आ॒युः की॒र्तिं प्र॒जान्द॑दुः ॥ वि॒भ्राज॑मा॒नां॒ हरि॑णीं ।
 यश॑सा संप॒रीवृ॑तां । पु॒रं॑ हि॒रण्म॑यीं ब्र॒ह्मा । 115 (10)

T.A.1.27.4

वि॒वेशा॑पराजिता ॥ पराङ्गे॑त्य॒ज्याम॑यी (पराङेत्य) ।
 पराङ्गे॑त्यनाशकी (पराङेत्य) ।
 इ॒ह चा॑मु॒त्र चान्वे॑ति । वि॒द्वान् दे॒वासु॑रा॒नुभ॑यान् ॥ यत्कु॑मा॒री म॒न्द्रय॑ते ।
 यद्योषि॑द्य-त्पति॒व्रता॑ । अ॒रिष्टं॑ यत्किञ्च॑ क्रि॒यते॑ ।
 अ॒ग्नि-स्तद॑नु वे॒धति॑ ॥ अ॒शृता॑सः शृ॒तास॑श्च । 116 (10)

T.A.1.27.5

यज्वानो॑ येऽप्य॑यज्वनः । स्वर्य॑न्तो नापेक्ष॑न्ते ।
 इन्द्र॑-म॒ग्निञ्च॑ ये वि॒दुः ॥ सि॒कता॑ इव स॒म्यन्ति॑ ।
 रश्मि॑भिः स॒मुदी॑रिताः ।
 अ॒स्माल्लो॑काद॒-मुष्मा॑च्च । ऋषि॑भि-र॒दात्-पृ॒श्निभिः॑ ॥
 अपे॑त वी॒त वि च॑ सर्प॒तातः॑ । येऽत्र॑ स्थ पु॒राणा॑ ये च नू॒तनाः॑ ।
 अ॒होभि॑-र॒द्धि-र॒क्तुभिर्व्य॑क्तं । 117 (10)

T.A.1.27.6

य॒मो द॒दात्व॑-व॒सान॑म॒स्मै ॥ नृ॑ मु॒णन्तु॑ नृ॒ पा॒त्व॒र्यः॑ ।
 अ॒कृ॒ष्टा ये च॒ कृ॒ष्ट॒जाः । कु॒मा॒रीषु॑ क॒नी॒नीषु॑ ।
 जा॒रिणी॑षु च॒ ये हि॒ताः ॥ रे॒तःपी॑ता आ॒ण्डपी॑ताः ।
 अ॒ङ्गा॒रेषु॑ च॒ ये हु॒ताः । उ॒भ॒या॒न् पु॒त्रपौ॑त्र॒कान् ।
 यु॒वेऽहं॑ य॒मरा॑ज॒गान् ॥ “श॒तमि॒न्नु श॒रदः{15}” () ॥
 अ॒दो यद्ब्र॑ह्म॒ विल॑बं । पि॒तृणाञ्च॑ य॒मस्य॑ च ।
 व॒रुण॑-स्या॒श्विनो॑-र॒ग्नेः । म॒रुताञ्च॑ विहा॒यसां॑ ॥
 का॒मप्र॑यव॒णं मे॑ अ॒स्तु । स ह्ये॒वास्मि॑ स॒नात॑नः ।
 इति॑ ना॒को ब्र॑ह्मि॒श्रवो॑ रा॒यो ध॒नं । पु॒त्रा॒नापो॑ दे॒वीरि॒हाहि॑ता ॥ 118 (18)
 (पु॒रं - न॒वद्वारा॑ - ब्र॒ह्मा - च - व्य॑क्त॒ - श॒रदोऽष्टौ॑ च॒ (A27)

1.1.28 अनुवाकं-28

T.A.1.28.1

वि॒शी॒र्ष्णीं॑ गृ॒द्ध्रशी॑र्ष्णीञ्च । अ॒पे॒तो निर्ऋ॑ति॒ ह॒थः ।
 परि॑बाध॒ श्वेत॑कु॒क्षं । नि॒जङ्घ॑ श॒बलो॑द॒रं ॥ स॒ तान् वा॒च्याय॑या स॒ह ।
 अ॒ग्ने ना॑श॒य स॒न्दृशः॑ । ई॒र्ष्या॒सूये॑ बु॒भुक्षां॑ । म॒न्युं कृ॒त्यां च॑ दी॒धिरे॑ ।

रथेन कि॒ञ्शु॒काव॑ता ।

अग्ने॑ नाशाय॑ स॒न्दृशः॑ ॥ 119 (10)

(वि॒शी॒र्ष्णीं॑ द॒श) (A28)

1.1.29 अनुवाकं-29

T.A.1.29.1

प॒र्जन्या॑य॒ प्रगा॑यत । दि॒वस्पु॒त्राय॑ मी॒ढुषे॑ ॥ स नो॑ य॒वस॑मिच्छतु ॥

इदं॑ वचः॒ प॒र्जन्या॑य॒ स्वरा॑जे ॥ हृदो॑ अ॒स्त्वन्त॑रन्त-द्यु॒योत॑ ।

मयो॒भूर्वातो॑ वि॒श्वकृ॑ष्टयः सन्त्व॒स्मे । सु॒पिप्प॒ला ओष॑धीर् दे॒वगो॑पाः ॥

यो गर्भ॑-मोष॒धीनां॑ । गवा॑ङ्कृ॒णोत्य॑र्वतां । प॒र्जन्यः॑ पु॒रुषी॑णां ॥ 120 (10)

(प॒र्ज॒न्या॑य द॒श) (A29)

1.1.30 अनुवाकं-30

T.A.1.30.1

पुन॑र्मा॒मैत्वि॒न्द्रियं॑ । पुन॑रायुः पुन॑र्भगः । पुन॑र् ब्रा॒ह्मण॑-मैतु मा ।

पुन॑र् द्र॒विण॑ मैतु मा ॥ यन्मे॒ऽद्य॑ रे॒तः पृ॑थि॒वीम॑स्कान् ।

यदोष॑धीर॒प्यस॑रद्-यदापः॑ । इद॑न्तत् पुन॑राददे ।

दी॒र्घायु॑त्वाय॒ वर्च॑से ॥ यन्मे॒ रे॒तः प्र॑सि॒च्यते॑ ।

यन्म॒ आ॒जा॒य॒ते पु॒नः॑() । ते॒न मा॒म॒मृ॒तं कुरु॑ ।

ते॒न सु॒प्र॒ज॒सङ्क॑रु ॥ 121 (12)

(पु॒न॒र्द्धे च॑) (A30)

1.1.31 अनुवाकं-31

T.A.1.31.1

अ॒द्भ्य-स्ति॒रो॒धा जा॒य॒त । तव॑ वै॒श्रव॑णः स॒दा । ति॒रो धे॒हि स॒प॒त्नान्नः॑ ।

ये अ॒पोऽश्न॑न्ति के॒चन॑ ॥ त्वा॒ष्ट्रीं मा॒यां वै॒श्रव॑णः ।

रथ॑ꣳ स॒हस्र॑ व॒न्धुरं॑ । पु॒रु॒श्च॒क्रꣳ स॒हस्रा॑श्वं ।

आ॒स्था॒या॒या॒हि नो॑ ब॒लिं ॥ यस्मै॑ भू॒तानि॑ ब॒लि॒मा॒व॒ह॒न्ति ।

ध॒न॒ङ्गा॒वो ह॒स्ति हि॒र॒ण्य॒म॒श्वान् । 122 (10)

T.A.1.31.2

अ॒साम॑ सु॒म॒तौ य॒ज्ञि॒य॒स्य । श्रि॒यं बि॒भ्र॒तो ऽन्न॑मु॒खीं वि॒राजं॑ ॥

सु॒दर्श॑ने च क्कौ॒ञ्चे च॑ । मै॒ना॒गे च॑ म॒हा॒गि॒रौ ।

श॒त॒द्वा॒ट्टा॒र॒ग॒म॒न्ता (स॒त॒द्वा॒ट्टा॒र॒ग॒म॒न्ता) ।

सꣳहा॒र्यं न॒गरं॑ तव॑ ॥ इति॑ म॒न्त्राः । क॒ल्पो॑ऽत ऊ॒र्ध्वं ॥

यदि बलि॑ हरेत् ।

हिरण्यनाभये॑ वितुदये॑ कौबेरायायं॑ बलिः । 123 (10)

T.A.1.31.3

सर्वभूताधिपतये॑ नम इति । अथ बलि॑ हत्वोपतिष्ठेत् ॥

क्षत्रं॑ क्षत्रं॑ वैश्रवणः॑ । ब्राह्मणा॑ वय॑ स्मः ।

नमस्ते॑ अस्तु मा मा हि॑सीः । अस्मात् प्रविश्यान्नमद्धीति॑ ॥

अथ तमग्नि-मादधीत॑ । यस्मिन्ने॑ तत्कर्म प्रयुञ्जीत॑ ॥

तिरोधा॑ भूः । तिरोधा॑ भुवः । 124 (10)

T.A.1.31.4

तिरोधाः॑ स्वः । तिरोधा॑ भूर्भुवस्स्वः॑ ।

सर्वेषां॑ लोकाना-माधिपत्ये॑ सीदेति ॥ अथ तमग्नि-मिन्धीत॑ ।

यस्मिन्ने॑ तत्कर्म प्रयुञ्जीत॑ ॥ तिरोधा॑ भूः स्वाहा॑ ।

तिरोधा॑ भुवः स्वाहा॑ । तिरोधाः॑ स्वः स्वाहा॑ ।

तिरोधा॑ भूर्भुवस्स्वस्स्वाहा॑ ॥

यस्मिन्नस्य॑ काले सर्वा आहुतीर् हुता॑ भवेयुः । 125 (10)

T.A.1.31.5

अपि ब्राह्मणमुखीनाः । तस्मिन्नहः काले प्रयुञ्जीत ।
 परः सुप्तजनाद्वेपि ॥ मा स्म प्रमाद्यन्त-माद्ध्यापयेत् ।
 सर्वार्थाः सिद्ध्यन्ते । य एवं वेद । क्षुद्ध्य-न्निदमजानतां ।
 सर्वार्था न सिद्ध्यन्ते ॥ यस्ते विघातुको भ्राता ।
 ममान्तर- हृदये श्रितः । 126 (10)

T.A.1.31.6

तस्मा इममग्रपिण्डञ्जुहोमि । स मेऽर्थान् मा विवधीत् । मयि स्वाहा ॥
 राजाधिराजाय प्रसह्यसाहिने ॥ नमो वयं वैश्रवणाय कुर्महे ।
 स मे कामान् कामकामाय मह्यं । कामेश्वरो वैश्रवणो ददातु ।
 कुबेराय वैश्रवणाय । महाराजाय नमः । केतवो अरुणासश्च () ।
 ऋषयो वातरशनाः । प्रतिष्ठाञ् शतधा हि ।
 समाहितासो सहस्रधायसं । शिवा नः शन्तमा भवन्तु ।
 दिव्या आप ओषधयः । सुमृडीका सरस्वति ।
 मा ते व्योम सन्दृशि ॥ 127 (17)

(अ॒श्वान्-ब॒लिर्-भु॒वो - भ॒वेयुः - श्रित - श्र॑ स॒प्त च) (A31)

1.1.32 अनुवाकं-32

T.A.1.32.1

सम्व॑त्सरमेतद् व्रत॑ञ्चरेत् । द्वौ वा मा॒सौ ॥ नियमः स॒मासे॒न ॥

तस्मिन् नियमविशेषाः । त्रिषवण-मुदकोपस्पर्शी ।

चतुर्थकालपानभक्तः स्यात् । अहरहर्वा भैक्षमश्नीयात् ।

औदुम्बरीभिः समिद्धि-रग्निं परिचरेत् ।

पुनर्मा मैत्विन्द्रिय-मित्येतेना-ऽनुवाकेन ।

उद्धृत परिपूताभिरद्धिः कार्यं कुर्वीत । 128 (10)

T.A.1.32.2

असञ्चयवान् । अग्नये वायवे सूर्याय । ब्रह्मणे प्रजापतये ।

चन्द्रमसे नक्षत्रेभ्यः । ऋतुभ्यः सम्व॑त्सराय ।

वरुणा-यारुणायेति व्रतहोमाः । प्रवर्ग्यवदादेशः ।

अरुणाः काण्डऋषयः ॥ अरण्येऽधीयीरन् ।

भद्रं कर्णेभिरिति द्वे जपित्वा । 129 (10)

T.A.1.32.3

म॒हाना॒म्नीभि॒-रु॒द॒क॒ꣳ स॒ꣳस्पर्श॑ । त॒माचा॑र्यो द॒द्यात् ।
शि॒वानः श॑न्त॒मे-त्योष॑धी॒राल॑भ॒ते । सु॒मृ॒डीके॑ति भू॒मिं । ए॒वम॑प॒वर्गे ।
धे॒नुर् द॒क्षिणा॑ । क॒ꣳ स॒म्व॑ासश्च क्षौ॒मं । अ॒न्यद्वा शु॒क्लं ।
य॒थाश॑क्ति॒ वा । ए॒वꣳ स्वा॑द्द॒ध्याय॑ध॒र्मेण॑ () । अ॒र॒ण्येऽधी॑य॒त ।
त॒प॒स्वी पु॒ण्यो भ॑वति त॒प॒स्वी पु॒ण्यो भ॑वति ॥ 130 (12)

(कु॒र्वी॒त - ज॑पि॒त्वा - स्वा॑द्द॒ध्याय॑ध॒र्मेण॑ द्वे च) (A32)

तैत्तिरीय आरण्यके प्रथमः प्रपाठकः – (TA 1)

Prapaataka Korvai with starting Padams of 1 to 32 Anuvaakams :-

(भ॒द्र॒७ – स्मृ॑तिः – सा॒क॒ञ्जाना॑ – म॒क्ष्य- ति॑ता॒म्रा – ण्य॑त्यु॒र्द्ध्वाक्ष॑
– आ॒रोगः – क्वे॑द – म॒ग्निश्च॑ – स॒हस्र॑वृत् – प॒वित्र॑वन्त –
आ॒तनु॑ष्वा – ष्ट्यो॑नीं – यो॑ऽसा – व॒थादि॑त्य – स्या॒रोग-स्या॑थ
वा॒यो- रथा॑ग्नेर् – दक्षि॑णपूर्वस्या – मि॒न्द्रघो॑षा व-आ॒पमा॑पां-
यो॑ऽसा – मा॒पो वै – चतु॑ष्टय्यो – जा॒नुद॒घ्नी – म॒ग्निं प्र॑णीये –
मा नु॑ कं – वि॒शी॒र्ष्णीं – प॒र्जन्या॑य – पुन॑ – र॒द्भ्यः – स॒म्व॑त्सरं
द्वा॒त्रिं॒शत्)

Korvai with starting Padams of 1, 11, 21 Series of Dasinis :-

(भ॒द्रं – ज्यो॑तिषा – तस्मिन् राजा॑नं – क॒श्यपा॑थ-स॒हस्र॑वृ॒दियं॑-
नपु॒॑ंसक॑ – म॒ष्ट्यो॑नी – म॒वप॑तन्ताना – मा॒यत॑नवान् भवति –
स॒तो ब॑न्धुं – ता उत्त॑रतो – व॒ज्रमे॑व – पुन॑र्मामैतु
त्रिं॒शदु॑त्तरशतम्)

First and Last Padam in TA, 1st Prapaatakam :-

(भद्रं – तपस्वी पुण्यो भवति तपस्वी पुण्यो भवति)

॥ हरिः ओम् ॥

॥ कृष्ण यजुर्वेदीय तैत्तिरीय आरण्यके प्रथमः प्रपाठकः समाप्तः ॥

=====

Appendix (of expansions)

T.A.1.11.1 – ब्रह्मा देवानां[॥]{1}

ब्रह्मा देवानां[॥] पदवीः कवीनामृषिर्विप्राणां महिषो मृगाणां[॥] ।

श्येनो गृध्राणां स्वधितिर् वनानां सोमः पवित्रमत्येति रेभन् ॥ {1}

(Appearing in T.S.3.4.11.1)

T.A.1.12.5 – वाश्रेव विद्यु[॥]{2}

वाश्रेव विद्युन्मिमाति वथ्सं न माता सिषक्ति ।

यदेषां वृष्टिरसर्जि ॥ {2} (Appearing in T.S.3.1.11.5)

T.A.1.13.2 – सुत्रामाणं[॥]{3} महीमूषु[॥]{4}

सुत्रामाणं पृथिवीं द्यामनेहसं सुशर्माण मदिति सुप्रणीति ।

दैवीं नाव स्वर्ित्रामनागसमस्रवन्तीमा रुहेमा स्वस्तये ॥ {3}

महीमूषु मातरं सुव्रतानामृतस्य पत्नीमवसे हुवेम ।

तुविक्षत्रामजरन्तीमुरूची सुशर्माणमदिति सुप्रणीति ॥ {4}

(Both {3} and {4} appearing in T.S.1.5.11.5)

T.A.1.13.3 – "हिरण्यगर्भो{5}

हिरण्यगर्भः समवर्तताग्रे भूतस्य जातः पतिरेक आसीत् ।
स दाधार पृथिवीं द्या मुतेमां कस्मै देवाय हविषा विधेम ॥ {5}
(Appearing in T.S.4.1.8.3)

T.A.1.13.3 – ह॒सः शुचिषत्{6}

ह॒सः शुचिषद् वसुरन्तरिक्ष-सद्भोता वेदिषदतिथि दुरोणसत् ।
नृषद् वरसदृतसद् व्योमसदब्जा गोजा ऋतजा अद्रिजा
ऋतं-बृहत् ॥ {6} (Appearing in T.S.1.8.15.2)

T.A.1.13.3 – ब्रह्म जज्ञानं{7}

ब्रह्म जज्ञानं प्रथमं पुरस्ताद्वि सीमतः सुरुचो वेन आवः ।
स बुध्निया उपमा अस्य विष्ठाः सतश्च योनिमसतश्च विवः ॥ {7}
(Appearing in T.S.4.2.8.2)

T.A.1.13.3 – तदित् पद{8}

तदित्पदं न विचिकेत विद्वान् । यन्मृतः पुनरप्येति जीवान् ।
त्रिवृद्यद् भुवनस्य रथवृत् । जीवो गर्भो न मृतः स जीवात् ॥ {8}
(Appearing in T.B.3.7.10.6)

T.A.1.19.1 – आ यस्मिन्थ्सप्त वासवा{9} इन्द्रियाणि शतक्रत{10}

आयस्मिन् थ्सप्तवासवा स्तिष्ठन्ति स्वारुहो यथा ।
ऋषिर्ह दीर्घश्रुत्तम इन्द्रस्य घर्मो अतिथिः ॥ {9}
(Appearing in T.S.1.6.12.2)

इन्द्रियाणि शतक्रतो या ते जनेषु पञ्चसु ।
इन्द्र तानि त आ वृणे ॥ {10} (Appearing in T.S.1.6.12.1)

T.A.1.25.2 – वाय्वश्वा रश्मिपतयः{11}

वाय्वश्वा रश्मिपतयः । मरीच्यात्मानो अद्रुहः । देवीर् भुवन सूवरीः ।
पुत्रवत्वाय मे सुत ॥ {11} (Appearing in T.A.1.1.2)

T.A.1.25.3 – इन्द्र॑घो॒षा वो॒ वसु॑भिः{12} रे॒वा ह्ये॒वे{13}

इन्द्र॑ घो॒षा वो॒ वसु॑भिः पु॒रस्ता॒-दुप॑दधतां ॥ {12}

ए॒वा ह्ये॒व ॥ {13} (*short and long form are the same in {13}*)
(Both appearing in T.A.1.20.1)

T.A.1.27.2 – यु॒वा सु॒वासाः{14}

यु॒वा सु॒वासाः॑ परि॒वीत॑ आ॒गात् । स उ॒ श्रेया॑न् भवति जा॒यमानः॑ ।
तं धी॒रासः॑ क॒वय॑ उन्नयन्ति । स्वा॒धियो॑ मन॒सा दे॒वय॑न्तः ॥ {14}
(Appearing in T.B.3.6.1.3)

T.A.1.27.6 – श॒तमि॒त्रु श॒रदः{15}

श॒तमि॒त्रु श॒रदो॑ अ॒न्ति दे॒वा यत्रा॑ नश्च॒क्रा ज॒रसं॑ त॒नूनां॑ ।
पु॒त्रासो॑ यत्र पि॒त्रो भव॑न्ति मा नो म॒ध्या री॒रिष॑तायु॒र्गन्तोः॑ ॥ {15}

(This expansion is appearing in "Apastambeeya Mantra Bagam (APMB)", also known as "EkagnikAdam", in 2nd Prasnam, 4th Section as 3rd Mantra.)

(This is an odd expansion as the Expanded Mantra is not appearing in any of conventional Taittiriya texts like "Samhita", "Brahmanam" "Aranyakam")

Details of Dasini & Vaakyams for Prapaatakam 1 (TA 1.1)

	Dasini	Vaakyams
Anuvakam 1	3	32
Anuvakam 2	4	47
Anuvakam 3	4	46
Anuvakam 4	3	30
Anuvakam 5	2	23
Anuvakam 6	3	35
Anuvakam 7	6	59
Anuvakam 8	8	80
Anuvakam 9	7	71
Anuvakam 10	7	74
Anuvakam 11	8	77
Anuvakam 12	5	56
Anuvakam 13	3	34
Anuvakam 14	4	42
Anuvakam 15	1	16
Anuvakam 16	1	10
Anuvakam 17	2	25
Anuvakam 18	1	11
Anuvakam 19	1	9
Anuvakam 20	1	17
Anuvakam 21	3	36

तैत्तिरीय आरण्यकं — अरुणप्रश्नं — (TA 1)

Anuvakam 22	12	121
Anuvakam 23	9	88
Anuvakam 24	4	48
Anuvakam 25	3	36
Anuvakam 26	7	74
Anuvakam 27	6	68
Anuvakam 28	1	10
Anuvakam 29	1	10
Anuvakam 30	1	12
Anuvakam 31	6	67
Anuvakam 32	3	32
Total →	130	1396

Total as per grantha books	132	1396
---------------------------------------	------------	-------------

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

2 कृष्ण यजुर्वेदीय तैत्तिरीय आरण्यके द्वितीयः प्रपाठकः

2.1 द्वितीयः प्रपाठकः – स्वाध्यायब्राह्मणं

2.1.1 अनुवाकं – 1

T.A. 2.1.1

सह॑ वै दे॒वानां॑ चा॒सुराणां॑ च य॒ज्ञौ प्र॑त॒तावा॑स्तां व॒यं॑ स्व॒र्गं
लोक॑मै॒ष्यामो व॒यमै॑ष्याम॒ इति॑ तेऽसुराः स॒न्नह्य॑ सह॒सैवा॑चरन्
ब्रह्म॑चर्येण॒ तप॑सैव दे॒वास्तेऽसुरा॑ अमु॒ह्यस्ते॑ न प्रा॒जान॑स्ते
परा॑भवन्ते न स्व॒र्गं लोक॑मायन्, प्र॒सृतेन॑ वै य॒ज्ञेन॑ दे॒वाः स्व॒र्गं
लोक॑मायन् न प्र॒सृतेना॑सुरान् पराऽभा॒वयन्, प्र॒सृतो॑ ह वै
य॒ज्ञोप॑वीतिनो य॒ज्ञोऽप्र॒सृतोऽनु॑पवीतिनो यत्किञ्च॑ ब्राह्म॒णो
य॒ज्ञोप॑वीत्यधी॒ते य॒जत॑ ए॒व तत् तस्मा॑द् य॒ज्ञोप॑वीत्ये॒वाधी॑यीत या॒जये॑द्
य॒जत॑ वा य॒ज्ञस्य॑ प्र॒सृत्या॑, अ॒जिनं॑ वा॒सो वा दक्षि॑णत॒ उप॑वीय
दक्षि॑णं बा॒हुमु॑द्धरतेऽव॒ धत्ते॑ स॒व्यमि॑ति य॒ज्ञोप॑वीतमे॒तदे॒व वि॑परीतं
प्राची॑नावीतं॒ सम्॑वी॒तं मा॒नुषम्॑ ॥ 1 (1)

(No Korvai for this Anuvaakam) (A1)

2.1.2 अनुवाकं – 2

T.A. 2.2.1

रक्षा॑सि॒ ह॒वा॒ पु॒रो॒नु॒वा॒के॒ त॒पोऽग्र॑मतिष्ठन्त॒ तान् प्र॒जा॒प॒तिर्
व॒रे॒णो॒पा॒म॒न्त्र॒य॒त॒ तानि॒ व॒र॒म॒वृ॒णी॒ता॒दि॒त्यो नो॒ यो॒द्धा॒ इति॒ तान्
प्र॒जा॒प॒ति-र॒ब्र॒वी॒द्-यो॒ध॒य॒द्ध्व॒मि॒ति॒ तस्मा॑दुत्तिष्ठन्त॒ ह॒वा॒ तानि॒
रक्षा॑स्य॒दि॒त्यं यो॒ध॒य॒न्ति॒ याव॑दस्त॒मन्व॑गात्॒ तानि॒ ह॒ वा ए॒तानि॒
रक्षा॑सि॒ गाय॑त्रिया॒ ऽभि॑मन्त्रि॒तेना॑भ॒सा शा॒म्य॒न्ति॒ तदु॒ ह॒ वा ए॒ते
ब्र॒ह्म॒वा॒दि॒नः॒ पूर्वा॑भि॒मु॒खाः स॒न्ध्या॑यां गाय॑त्रिया॒ ऽभि॑मन्त्रि॒ता आप॑
ऊ॒र्ध्वं वि॑क्षिपन्ति॒ ता ए॒ता आपो॑ व॒ज्री॑भू॒त्वा तानि॒ रक्षा॑सि
म॒न्दे॒हाऽरु॑णे॒ द्वी॒पे प्र॑क्षिपन्ति॒ यत् प्र॑दक्षि॒णं प्र॑क्रमन्ति॒ तेन॑
पा॒प्मान॑म॒व धू॑न्वन्त्यु॒द्यन्त॑मस्तं॒ यन्त॑मा॒दि॒त्य-म॑भि॒द्ध्य॒यन्
कु॒र्वन् ब्रा॑ह्म॒णो वि॒द्वान्त् सक॑लं॒ भद्र॑मश्नुते॒ ऽसा॑वा॒दि॒त्यो ब्र॒ह्मेति॒
ब्र॒ह्मै॒व सन् ब्र॑ह्मा॒प्येति॒ य ए॒वं वे॑द ॥ 2 (1)

(No Korvai for this Anuvaakam) (A2)

2.1.3 अनुवाकं – 3

T.A. 2.3.1

यद्-दे॒वा दे॒वहे॒ळनं॑ दे॒वासश्च॑ कृ॒मा व॒यम् ।
आदि॒त्यास्तस्मा॑न्मा मुञ्च॒तर्तस्य॑र्तेन॒ मामि॒त ॥
दे॒वा जी॒वनका॑म्या यद्-वा॒चाऽनृ॑तमूदि॒म ।
तस्मा॑न्न इ॒ह मुञ्च॑त विश्वे॑ दे॒वाः स॒जोष॑सः ॥
ऋ॒तेन॑ द्या॒वापृ॑थि॒वी ऋ॒तेन॑ त्व॒ऽसर॑स्वति ।
कृ॒तान्नः॑ पा॒ह्येन॑सो यत् किञ्चानृ॑तमूदि॒म ॥
इन्द्रा॑ग्नी मि॒त्रावरु॑णौ सोमो॑ धा॒ता बृ॒हस्प॑तिः ।
ते नो॑ मुञ्च॒न्त्वेन॑सो यद॒न्यकृ॑तमा॒रिम ॥
स॒जा॒तश॒ऽसा॒दुत॑ जा॒मिश॒ऽसाज्ज्या॑यसः श॒ऽसा॒दुत॑ वा क॒नीय॑सः ।
अना॑धृष्टं दे॒वकृ॑तं य॒देन॑स्तस्मा॒त् त्वम॑स्माञ् जा॒तवे॑दो मुमु॒ग्धि () ॥
यद्वा॒चा यन् मन॑सा बा॒हुभ्या॑-मू॒रुभ्या॑म॒ष्टीव॑द्भ्या॒ऽशि॒श्नैर्य॑द॒नृतं॑
च॒कृ॒मा व॒यम् ।
अ॒ग्निर्मा॑ तस्मा॒देन॑सो गा॒र्हप॑त्यः प्रमुञ्च॑तु च॒कृ॒म या॒नि दु॒ष्कृ॒ता ॥

तैत्तिरीय आरण्यकं— चातुर्होत्रचयनम् –(TA 3)

येन त्रितो अर्णवान् निर्बभूव येन सूर्यं तमसो निर्मुमोच ।
येनेन्द्रो विश्वा अजहादरातीस्तेनाहं ज्योतिषा ज्योतिरानशान आक्षि ॥
यत् कुसीदमप्रतीतं मयेह येन यमस्य निधिना चरामि ।
एतत्तदग्ने अनृणो भवामि जीवन्नेव प्रति तत्ते दधामि ॥
"यन्मयि माता{17}" "यदा पिपेष{18}" "यदन्तरिक्षं{19}"
"यदाशसा{20}" "ऽतिक्रामामि{21}" "त्रिते देवा{22}"
"दिवि जाता{23}" "यदाप{24}" "इमं मे वरुण{25}"
"तत्त्वा यामि{26}" "त्वं नो अग्ने{27}" "सत्त्वं नो अग्ने{28}"
"त्वमग्ने अयासि{29}" ॥ 3 (17)

(मुमुग्धि सप्त च) (A3)

2.1.4 अनुवाकं - 4

T.A. 2.4.1

यददीव्यन्नृणमहं बभूवादित् सन्वा सञ्जगर जनेभ्यः ।
अग्निर्मा तस्मादिन्द्रश्च सम्विदानौ प्रमुञ्चताम् ॥
यद्धस्ताभ्यां चकर किल्बिषाण्यक्षाणां वग्नमुपजिघ्नमानः ।

उ॒ग्र॒म्प॒श्या॒ च॒ रा॒ष्ट्र॒भृ॒च्च॒ ता॒न्य॒प्स॒र॒सा॒ व॒नु॒द॒त्ता॒-मृ॒णानि॑ ॥
 उ॒ग्रं॒प॒श्ये॒ रा॒ष्ट्र॒भृ॒त् कि॒ल्बि॒षाणि॑ य॒दक्ष॑वृ॒त्त॒म॒नु॒द॒त्त॒मे॒तत् ।
 ने॒त्र ऋ॒णानृ॒णव॑ इ॒त्थ॒स्मा॒नो॒ य॒म॒स्य॒ लो॒के॒ अधि॑ र॒ज्जु॒राय॑ ॥
 "अ॒व ते॒ हे॒ड (हेळ) {30}" "उ॒दु॒त्त॒म{31}" "मि॒मं मे॒ वरु॒ण{32}"
 "त॒त्त्वा॒ या॒मि{33}" "त्वं नो॑ अ॒ग्ने{34}" "स॒त्वं नो॑ अ॒ग्ने{36} ॥
 स॒ङ्कु॒सु॒को॒ वि॒कु॒सु॒को॒ निर्॒ऋ॒थो॒ यश्च॑ नि॒स्व॒नः ।
 तेऽ(१)स्म॒द्-य॒क्ष॒म॒ना॒ग॒सो॒ दू॒रा॒द्-दू॒र॒म॒ची॒च॒त॒म् ॥
 नि॒र्य॒क्ष॒म॒ची॒च॒ते॒ कृ॒त्यां॒ निर्॒ऋ॒तिं॒ च () ।
 ते॒न योऽ(१)स्म॒त्स॒मृ॒च्छा॒तै॒ त॒म॒स्मै॒ प्र॒सु॒वा॒म॒सि ॥
 दु॒श्श॒ञ्सा॒नु॒श॒ञ्सा॒भ्यां॒ घ॒णे॒ना॒नु॒घ॒णे॒न॒ च ।
 ते॒ना॒न्योऽ(१)स्म॒त् स॒मृ॒च्छा॒तै॒ त॒म॒स्मै॒ प्र॒सु॒वा॒म॒सि ॥
 स॒म्व॑र्च॒सा॒ प॒य॒सा॒ स॒न्त॒नू॒भि॒र॒ग॒न्म॒हि॒ मन॑सा॒ सञ् शि॒वे॒न ।
 त्व॒ष्टा नो॑ अ॒त्र वि॒द॒धा॒तु॒ रा॒योऽनु॑मा॒र्षु॒ त॒न्वो(१)॒ यद्-वि॒लि॒ष्ट॒म् ॥ 4 (15)
 (कृ॒त्यां॒ निर्॒ऋ॒तिं॒ च॒ प॒ञ्च॒ च (A4)

2.1.5 अनुवाकं – 5

T.A. 2.5.1a

आ॒यु॒ष्टे वि॒श्वतो॑ द॒ध॒द॒य॒म॒ग्निर्व॑रे॒ण्यः॑ ।
पुन॑स्ते प्रा॒ण आ॒याति॑ परा॒ यक्ष्म॑ सु॒वामि॑ ते ॥
आ॒यु॒र्दा अ॒ग्ने ह॒विषो॑ जुषा॒णो घृ॒तप्र॑ती॒को घृ॒तयो॑निरे॒धि ।
घृ॒तं पी॒त्वा मधु॑ चा॒रु ग॒व्यं पि॒तेव॑ पु॒त्रम॒भि र॑क्ष॒तादि॒मम् ॥
इ॒मम॑ग्न॒ आयु॑ष्टे वर्च॑से कृ॒धि ति॒ग्ममो॑जो वरु॒ण सञ्शि॑शा॒धि ।
मा॒तेवा॑स्मा अ॒दिते॑ श॒र्म यच्छ॑ वि॒श्वे दे॒वा ज॑रद॒ष्टिर् यथा॑ऽस॒त् ॥
अ॒ग्न आ॒यूँषि॑ पव॒स आ॒सुवो॑र्ज॒मिषं॑ च नः ।
आ॒रे बा॑धस्व दु॒च्छुना॑म् ॥
अ॒ग्ने पव॑स्व स्व॒पा अ॒स्मे वर्चः॑ सु॒वीर्य॑म् ।
द॒ध॒द् र॒यिं म॒यि पो॑षम् ॥ 5.1a (10)

T.A. 2.5.1b

अ॒ग्निर् ऋ॒षिः प॑व॒मानः॑ पाञ्च॒जन्यः॑ पु॒रोहि॑तः । तमी॑महे म॒हाग॒यम् ॥
अ॒ग्ने जा॒तान् प्र॑णु॒दा नः॑ स॒पत्नान्॑ प्र॒त्यजा॑ताञ्जा॒तवे॑दो नुद॒स्व ।

अ॒स्मे दी॒दि॒हि सु॒मना॒ अहे॒ळ॒ञ्छर्म॑न्ते स्याम त्रि॒वरू॑थ उ॒द्भौ ॥
सह॑सा जा॒तान् प्र॑णु॒दा नः स॒पत्नान् प्रत्य॑जा॒ताञ्जा॑तवेदो नुदस्व ।
अधि॑ नो ब्रू॒हि सु॒मन॑स्यमा॒नो वय॑ञ् स्याम प्र॑णु॒दा नः स॒पत्नान् ॥
अग्ने॑ यो नोऽभि॒तो ज॒नो वृ॒को वा॒रो जि॒घाञ्॑सति ।
ताञ्स्त्वं वृ॑त्रह॒ञ्जहि॑ वस्व॒स्मभ्य॑मा भ॒र ॥
अग्ने॑ यो नोऽभि॒दास॑ति स॒मानो यश्च॑ नि॒ष्ट्यः ।
तं वय॑ञ् स॒मिधं॑ कृ॒त्वा तु॒भ्यम॒ग्नेऽपि॑द॒ध्मसि॑ ॥ 5.1b (10)

T.A. 2.5.1c

यो नः॑ श॒पाद॑श॒पतो॑ यश्च॑ नः॑ श॒पतः॑ श॒पात् ॥
उषा॑श्च तस्मै॑ नि॒मृक्च॑ सर्वं॑ पा॒पञ् स॒मूह॑ताम् ॥
यो नः॑ स॒पत्नो॑ यो र॒णो म॒र्तोऽभि॑दासति दे॒वाः ।
इ॒ध्मस्ये॑व प्र॒क्षाय॑तो मा तस्यो॒च्छे॑षि किं॒चन॑ ॥
यो मा॒न्द्वेष्टि॑ जा॒तवे॒दो यं चा॒हं द्वे॒ष्मि यश्च॑ मा॒म् ।
सर्वा॑ञ्स्ता॒नग्ने॑ स॒न्दह॑ याञ्श्चा॒हं द्वे॒ष्मि ये च॑ मा॒म् ॥
यो अ॒स्मभ्य॑मरा॒तीया॑द्-यश्च॑ नो द्वे॒षते॑ ज॒नः ।

निन्दाद्यो अस्मान् दिप्साच्च सर्वाऽस्तान्मष्मषा कुरु ॥
 सञ्शितं मे ब्रह्म सञ्शितं वीर्या (1) म्बलम् ।
 सञ्शितं क्षत्रं मे जिष्णु यस्याहमस्मि पुरोहितः () ॥
 उदेषां बाहू अतिरमुद्-वर्चो अथो बलम् ।
 क्षिणोमि ब्रह्मणाऽमित्रानुन्नयामि स्वाँ(2) अहम् ॥
 पुनर्मनः पुनरायुर्म आगात् पुनश्चक्षुः पुनः श्रोत्रं म आगात्
 पुनः प्राणः (पुनराकूतं म आगात् पुनश्चित्तं) पुनराधीतं म आगात् ।
 वैश्वानरो मेऽदब्धस्तनूपा अवबाधतां दुरितानि विश्वा ॥ 5.1c (14)
 (पोषं – दद्धमसि – पुरोहितश्चत्वारि च) (A5)

2.1.6 अनुवाकं – 6

T.A. 2.6.1a

वैश्वानराय प्रतिवेदयामो यदीनृणः सङ्गरो देवतासु ।
 स एतान् पाशान् प्रमुचन् प्रवेद स नो मुञ्चातु दुरितादवद्यात् ॥
 वैश्वानरः पवयान्नः पवित्रैर्यथ सङ्गर-मभिधावाम्याशाम् ।
 अनाजानन् मनसा याचमानो यदत्रैनो अव तथ सुवामि ॥

अमी॑ ये सु॒भगे॑ दि॒वि वि॒चृतौ॑ ना॒म ता॒रके॑ ।
 प्रे॒हामृ॑तस्य यच्छता-मे॒तद्-ब॑द्धक॒मोच॑नम् ॥
 वि॒जिही॑र्ष्व लो॒कान् कृ॑धि ब॒न्धान् मु॑ञ्चासि ब॒द्धक॑म् ।
 यो॒नेरि॑व प्र॒च्युतो॑ गर्भः॒ सर्वा॑न् प॒थो अ॑नुष्व ॥
 स प्र॒जान॑न् प्र॒तिगृ॑ष्णीत वि॒द्वान् प्र॒जाप॑तिः प्रथ॒मजा॑ ऋ॒तस्य॑ ।
 अ॒स्माभि॑र्दत्तं ज॒रसः॑ प॒रस्ता॑दच्छिन्नं तन्तु॑मनु संच॑रेम ॥ 6.1a (10)

T.A. 2.6.1b

त॒तं त॑न्तु॒मन्वे॑के अ॒नु संच॑रन्ति येषां॑ द॒त्तं पि॒त्र्यमा॑यनवत् ।
 अ॒बन्ध्वे॑के द॒दतः॑ प्र॒यच्छा॑द्-दातु॒ञ्चेच्छ॑क्नवा॒ऽसः॑ स्व॒र्ग ए॑षाम् ॥
 आ॒रभे॑थाम॒नु स॒ऽरभे॑था॒ऽसमा॑नं प॒न्थाम॑वथो घृ॒तेन॑ ।
 यद्वां॑ पू॒र्तं प॑रि॒विष्टं॑ य॒दग्नौ॑ तस्मै॒ गोत्रा॑येह जा॒याप॑ती स॒ऽरभे॑थाम् ॥
 यद॒न्तरि॑क्षं पृ॒थि॒वीमु॑त द्यां॑ य॒न्मा॒तरं॑ पि॒तरं॑ वा जि॒हिऽसि॑म ।
 अ॒ग्निर्मा॑ तस्मा॒देन॑सो गा॒र्हप॑त्य उ॒न्नो न॑ेषद्-दु॒रिता॑ या॒नि च॑कृ॒म ॥
 भू॒मिर्मा॑ताऽदि॒तिर्नो॑ ज॒नित्रं॑ भ्रा॒तान्तरि॑क्ष-म॒भि॒शस्त॑ ए॒नः ।
 द्यौर्नः॑ पि॒ता पि॑तृ॒याच्छं॑ भ॒वासि॑ जा॒मि मि॒त्वा मा॑ वि॒विथि॑सि लो॒कात् ॥

तैत्तिरीय आरण्यकं— चातुर्होत्रचयनम् –(TA 3)

यत्र सु॒हार्दः॑ सु॒कृतो॑ म॒दन्ते॑ वि॒हाय॑ रोगं त॒न्वा(१)॑ स्वा॒याम्॑ ।
अ॒श्लो॒णाङ्गैर॑हु॒ताः स्व॒र्गे तत्र॑ पश्ये॒म पि॒तरं॑ च पु॒त्रम् () ॥
यद॒न्नम॑द्म्य॒नृते॑न दे॒वा दा॒स्यन्न॑दा॒स्यन्नु॑त वा क॒रिष्य॑न् ।
यद्-दे॒वानां॑ चक्षु॒ष्यागो॑ अ॒स्ति यदे॒व किञ्च॑ प्र॒तिज॑ग्राह॒मग्नि॑र्मा
तस्मा॑दनृ॒णं कृ॑णोतु ॥
यद॒न्नम॑द्भि॒ बहु॑धा वि॒रूपं॑ वा॒सो हि॑र॒ण्यमु॑त गा॒मजा॑मवि॒म् ।
यद्-दे॒वानां॑ चक्षु॒ष्यागो॑ अ॒स्ति यदे॒व किञ्च॑ प्र॒तिज॑ग्राह॒मग्नि॑र्मा
तस्मा॑दनृ॒णं कृ॑णोतु ॥
यन्म॑या (यन्मे)॑ म॒नसा॑ वा॒चा कृ॑तमे॒नः कदा॑चन ।
सर्व॑स्मान् मेळि॒तो (सर्व॑स्मात् तस्मान् मेळि॒तो) मो॒ग्धि त्व॑ हि
वे॒त्थ यथा॑तथम् ॥ 6.1b (16)

(च॒रेम॑ – पु॒त्रं षट्च॑ (A6)

2.1.7 अनुवाकं – 7

T.A. 2.7.1

वा॒तर॒श॒ना॒ ह॒ वा॒ ऋ॒ष॒यः॑ श्र॒म॒णा॒ ऊ॒र्ध्व॒म॒न्थि॒नो॑
ब॒भू॒वु॒स्ता-नृ॒ष॒यो॒ऽर्थ-मा॒य॒स्ते॒ नि॒ला॒य-म॒च॒र॒स्ते-ऽनु॒प्र॒वि॒शुः॑
कू॒श्मा॒ण्डा॒नि॒ ता-स्ते॒ष्वन्व॒वि॒न्द-ज्छ॒द्भ्या॑ च॒ तप॒सा॒ च ,
ता॒नृ॒ष॒यो॒ऽब्रु॒वन् क॒था॒ नि॒ला॒यं च॒र॒थेति॑ त ऋ॒षी॒न॒ब्रु॒वन्मो॑ वो॒ऽस्तु॑
भ॒ग॒व॒न्तो॒ऽस्मिन् धा॒म्नि॒ के॒न॒ वः॑ स॒पर्या॒मेति॑ ता॒नृ॒ष॒यो॒ऽब्रु॒वन् प॒वि॒त्रं नो॑
ब्रू॒त॒ येना॒रेप॒सः॑ स्या॒मेति॑ त ए॒तानि॑ सू॒क्तान्य॑पश्यन् . ,
यद्-दे॒वा दे॒व॒हे॒ड॒नं॑ (दे॒व॒हे॒ळ॒नं॑) य॒ददी॑व्य॒नृ॒णम॒हं ब॒भू॒वायु॑ष्टे वि॒श्वतो॑
दध॒दि॒त्ये॒तैरा॒ज्यं जुहु॑त वै॒श्वान॒राय॑ प्र॒ति॒वे॒दया॑म इत्यु॒पति॑ष्ठत
यद॒र्वा॒ची॒नमे॒नो॑ भ्रू॒णह॒त्याया॑स्तस्मा॒न् मोक्ष्य॑द्ध्व इति॑ ,
त ए॒तै-र॒जुह॑वु॒स्तेऽरे॒पसो॑ऽभवन् क॒र्मा॒दिष्वे॒तैर्-जुहु॑यात् पू॒तो
दे॒वलो॒कान् थ्स॑मश्नुते ॥ 7(1)

(No Korvai for this Anuvaakam) (A7)

2.1.8 अनुवाकं – 8

T.A. 2.8.1

कू॒श्मा॒ण्डैर् जु॒हु॒याद्-योऽपू॒त इ॒व म॒न्येत॒ यथा॑ स्ते॒नो यथा॑
 भ्रू॒णहै॒वमेष॑ भ॒वति॒ योऽयो॒नौ रे॒तः सि॒ञ्चति॒, यद॒र्वाची॒नमे॒नौ
 भ्रू॒णह॒त्याया॒स्तस्मा॑न् मु॒च्यते॒ याव॒दे॒नो दी॒क्षामु॑पैति दी॒क्षित॒ ए॒तैः
 स॒तति॒ जु॒होति॒ सम्॑व॒त्सरं॑ दी॒क्षितो॑ भ॒वति॒ सम्॑व॒त्सरा॒दे॒वात्मानं॑
 पु॒नीते॒ मासं॑ दी॒क्षितो॑ भ॒वति॒ यो मा॒सः स॒ सम्॑व॒त्सरः
 सम्॑व॒त्सरा॒दे॒वात्मानं॑ पु॒नीते॒ चतु॑र्वि॒ंशति॑ र॒ात्रीर्दी॒क्षितो॑ भ॒वति॒
 चतु॑र्वि॒ंशति॑-॒र्द्धमा॒साः सम्॑व॒त्सरः॒ सम्॑व॒त्सरा॒दे॒वात्मानं॑ पु॒नीते॒
 द्वा॒दश॒ रात्री॑र्दी॒क्षितो॑ भ॒वति॒ द्वा॒दश॒ मा॒साः सम्॑व॒त्सरः
 सम्॑व॒त्सरा॒दे॒वात्मानं॑ पु॒नीते॒ षड्॑रात्रीर्दी॒क्षितो॑ भ॒वति॒ षड्॑वा
 ऋ॒तवः॑ सम्॑व॒त्सरः॒ सम्॑व॒त्सरा॒दे॒वात्मानं॑ पु॒नीते॒ तिस्रो॑ रात्रीर्-
 दी॒क्षितो॑ भ॒वति॒ त्रि॒पदा॑ गा॒यत्री॑ गा॒यत्रि॒या ए॒वात्मानं॑ पु॒नीते॒ न
 मा॒सम॑श्नी॒यान्न॑ स्त्रि॒यमु॑पे॒यान्नो॑प॒र्यासी॑त् जु॒गुप्से॒तानृ॑ता॒त्पयो॑
 ब्रा॒ह्म॒णस्य॑ व्र॒तं य॑वा॒गू रा॒ज॒न्यस्या॑मि॒क्षा वै॒श्यस्या॑थो सौ॒म्येऽप्य॑द्ध॒वर

ए॒तद्ब्र॒तं ब्रू॒याद् यदि॒ मन्ये॑-तो॒पद॒स्यामी॒त्यो॒दनं॑

धा॒नाः स॒क्तूं॑ घृ॒तमि॒त्यनु॑ब्र॒तये॒दा॒त्मनो॑ऽनु॒पदा॒साय॑ ॥ 8 (1)

(No Korvai for this Anuvaakam) (A8)

2.1.9 अनुवाकं – 9

T.A. 2.9.1

अ॒जान्. ह॒ वै पृ॒श्नी॑ऽस्त॒पस्य॑मा॒नान् ब्र॒ह्म स्व॒यंभ्व॑भ्या॒नर्ष॑त्त
ऋ॒षयो॑ऽभ॒वन् तदृ॑षी॒णा-मृ॑षि॒त्वं तां॑ दे॒वता॒मुपा॑तिष्ठन्त॒ यज्ञ॑का॒मास्त॑ ए॒तं
ब्र॒ह्मय॑ज्ञ-म॒पश्य॑न्-त॒माऽह॑रन्-ते॒नाय॑जन्त॒ यदृ॑चो॒ऽद्ध्यगी॑ष॒त ताः॑
प॒यआ॑हु॒तयो॑ दे॒वाना॑म॒भवन्. यद्-यजू॑षि॒ घृ॒ताहु॑तयो॒ यथ् सामा॑नि
सो॒माहु॑तयो॒ यदथ॑र्वाङ्गि॒रसो॑ म॒ध्वाहु॑तयो॒ यद्ब्रा॑ह्म॒णानी॑तिहा॒सान्-
पु॒राणा॑नि॒ कल्पा॑न् गा॒था ना॒राश॑ऽसी॒र्मदा॑हु॒तयो॑ दे॒वाना॑-म॒भवन्ता॑भिः
क्षु॒धं पा॑प्मान-म॒पाघ्न॑न्-न॒पहत॑पाप्मानो॒ देवाः॑ स्व॒र्गं लो॑क॒माय॑न्
ब्र॒ह्मणः॑ सा॒युज्य॑-मृ॒षयो॑ऽगच्छन् ॥ 9 (1)

(No Korvai for this Anuvaakam) (A9)

2.1.10 अनुवाकं – 10

T.A. 2.10.1

पञ्च॑ वा ए॒ते म॒हाय॒ज्ञाः स॒तति॑ प्र॒ताय॑न्ते स॒तति॑ स॒न्तिष्ठ॑न्ते दे॒वय॒ज्ञः
 पि॒तृय॒ज्ञो भू॑तय॒ज्ञो म॒नुष्य॑य॒ज्ञो ब्र॑ह्मय॒ज्ञ इति॑ यद॒ग्नौ जु॑होत्य॒पि
 स॒मिधं॑ तद्-दे॒वय॒ज्ञः स॒न्तिष्ठ॑ते यत् पि॒तृभ्यः॑ स्व॒धा क॑रोत्य॒प्यप॑स्तत्
 पि॒तृय॒ज्ञः स॒न्तिष्ठ॑तेयद्-भू॒तेभ्यो॑ ब॒लिं ह॑रति तद्-भू॒तय॒ज्ञः स॒न्तिष्ठ॑ते
 यद्ब्रा॑ह्म॒णेभ्योऽन्नं॑ द॒दाति॑ तन्म॒नुष्य॑य॒ज्ञः स॒न्तिष्ठ॑ते यथ्स्वा॑द्ध्य॒याय-
 म॒धीयी॑-तै॒काम॑प्यृ॒चं य॑जुः-सा॒म वा॒ तद्ब्र॑ह्मय॒ज्ञः स॒न्तिष्ठ॑ते
 यदृ॒चोऽधी॑ते प॒यसः॑ कू॒ल्या अ॒स्य पि॒तृन् थ॑स्व॒धा अ॒भिव॑हन्ति
 यद्-यजू॑षि घृ॒तस्य॑ कू॒ल्या यथ् सा॒मानि॑ सोम॑ ए॒भ्यः प॑वते
 यदथ॑र्वाङ्गि॒रसो॑ म॒धोः कू॒ल्या यद्ब्रा॑ह्म॒णा-नी॑तिहा॒सान्-पु॒राणा॑नि
 क॒ल्पान् गा॑था ना॒राश॑सी॒र्-मे॒दसः॑ कू॒ल्या अ॒स्य पि॒तृन् थ॑स्व॒धा
 अ॒भिव॑हन्ति यदृ॒चोऽधी॑ते प॒यआ॑हुतिभिरे॒व तद्-दे॒वाऽस्त॑र्पयति
 यद्-यजू॑षि घृ॒ताहु॑तिभि॒र्यथ् सा॒मानि॑ सोमा॑हुतिभि॒र्-यदथ॑र्वाङ्गि॒रसो॑
 म॒ध्वाहु॑तिभि॒र्-यद्ब्रा॑ह्म॒णा-नी॑तिहा॒सान्-पु॒राणा॑नि क॒ल्पान् गा॑था

नारा॒श॒सी॒र्-मे॒दा॒हु॒तिभि॒रेव॒ तद्-दे॒वा॒स्तर्प॑यति॒ त ए॒नन् तृ॒प्ता
आयु॑षा तेज॑सा वर्च॑सा श्रि॒या यश॑सा ब्रह्म॑वर्च॒सेना॒न्नाद्ये॑न च

तर्पयन्ति ॥ 10 (1) (No Korvai for this Anuvaakam) (A10)

2.1.11 अनुवाकं – 11

T.A. 2.11.1

ब्रह्म॑यज्ञेन॒ यक्ष्य॑माणः प्रा॒च्यां दि॒शि ग्रा॒मा-द॒छदि॑र्द्श उदी॑च्यां
प्रा॒गुदी॑च्यां वो॒दित॑ आ॒दित्ये॑ दक्षि॒णत॑ उप॒वीयो॑पविश्य ह॒स्ताव॑वनिज्य
त्रि॒राचा॑मेदि॒द्वः परि॑मृज्य सकृ॑दुपस्पृश्य शि॒रश्चक्षु॑षी ना॒सिके॑ श्रो॒त्रे
हृद॑यमा॒लभ्य॑ यत् त्रि॒राचा॑मति तेन ऋचः॑ प्रीणाति॒ यदि॒द्वः परि॑मृजति
तेन॒ यजू॑षि यथ् सकृ॑दुपस्पृशति तेन सामा॑नि (यथ् स॒व्यं पा॑णिं
पादौ॑ प्रोक्षति) यच्छि॒रश्चक्षु॑षी ना॒सिके॑ श्रो॒त्रे हृद॑यमा॒लभते
तेनाथ॑र्वाङ्गि॒रसो॑ ब्राह्म॑णा-नीतिहा॒सान् पु॒राणा॑नि क॒ल्पान् गा॑था
नारा॒श॒सीः प्री॑णाति द॒र्भाणां॑ म॒हदु॑पस्तीर्योपस्थं कृ॒त्वा प्रा॒डासी॑नः
स्वा॒द्ध्याय॑मधीयीतापां वा ए॒ष ओष॑धीना॒ रसो॑ यद्-द॒र्भाः
सर॑समेव ब्रह्म कुरुते दक्षि॒णोत्त॑रौ पा॒णी (पा॒दौ) कृ॒त्वा
सप॑वि॒त्रावो॑मिति प्रतिपद्यत ए॒तद्वै यजु॑स्त्रयीं वि॒द्यां प्रत्ये॑षा

तैत्तिरीय आरण्यकं— चातुर्होत्रचयनम् –(TA 3)

वा॒गे॒त॒त्प॒र॒म॒म॒क्ष॒रं॑ त॒दे॒त॒दृ॒चा॒ऽभ्यु॒क्त॒मृ॒चो॑ अ॒क्ष॒रे॑ प॒र॒मे॑ व्यो॒म॒न् यस्मि॑न्
दे॒वा अ॒धि वि॒श्वे॑ नि॒षे॒दु॒र्य॒स्त॒न्न वे॒द कि॒मृ॒चा क॑रिष्यति य इ॒त्तद्वि॒दु॒स्त
इ॒मे स॒मा॒स॒त इति॑ त्री॒ने॒व प्रा॒यु॒ङ्क्षु॑ भूर्भु॒वः॑स्व॒रि॒त्या॒है॒तद्वै॑ वा॒चः स॒त्यं
य॒दे॒व वा॒चः स॒त्यं तत् प्रा॒यु॒ङ्क्षाथ॑ सा॒वि॒त्रीं गा॒य॒त्रीं त्रि॒र॒न्वा॒ह
प॒च्छो॑ऽर्द्ध॒र्च॒शो॒ऽन॒वा॒न् स॒वि॒ता श्रि॒यः प्र॒स॒वि॒ता श्रि॒यमे॒वा॒प्नो॒त् यथो॑
प्र॒ज्ञा॒त॒यै॒व प्र॒ति॒प॒दा छ॒न्दा॑ऽसि॒ प्र॒ति॒प॒द्य॒ते ॥ 11 (1)

(No Korvai for this Anuvaakam) (A11)

2.1.12 अनुवाकं – 12

T.A. 2.12.1

ग्रा॒मे म॒न॒सा स्वा॒द्ध्य॒ाय॒म॒धी॒यी॒त दि॒वा न॒क्तं॑ वै॒ति ह॑ स्मा॒ह शौ॒च
आ॒हे॒य उ॒ता॒र॒ण्ये॒ऽब॒ल उ॒त वा॒चो॒त ति॒ष्ठ॒न्नु॒त ब्र॒ज॒न्नु॒ता॒सी॒न उ॒त
श॒या॒नो॒ऽधी॒यी॒तै॒व स्वा॒द्ध्य॒ायं त॒प॒स्वी पु॒ण्यो॑ भ॒व॒ति य ए॒वं वि॒द्वान्थ्
स्वा॒द्ध्य॒ाय॒म॒धी॒ते न॒मो ब्र॒ह्म॒णे न॒मो अ॒स्त्व॒ग्नये॑ न॒मः पृ॒थि॒व्यै
न॒म ओष॑धीभ्यः ।

न॒मो वा॒चे न॒मो वा॒च॒स्प॒तये॑ न॒मो वि॒ष्णा॒वे बृ॒ह॒ते क॑रोमि ॥ 12 (2)

(No Korvai for this Anuvaakam) (A12)

2.1.13 अनुवाकं – 13

T.A. 2.13.1

म॒द्ध्यन्दि॑ने प्र॒बल॑म॒धीयी॑तासौ खलु॒ वावै॑ष आ॒दित्यो॑
यद्ब्रा॒ह्मण॑स्तस्मात्त॒र्हि ते॑क्षि॒ष्ठं तप॑ति त॒देषा॑ऽभ्यु॒क्ता ॥
चि॒त्रं दे॒वाना॑मु॒दगा॑दनी॒कं चक्षु॑र्मि॒त्रस्य॑ वरु॒णस्या॑ग्नेः ।
आऽप्रा॒द्यावा॑पृथि॒वी अ॒न्तरि॑क्ष॒ञ् सूर्य॑ आ॒त्मा जग॑तस्त॒स्थुष॑श्चेति
स वा ए॒ष य॒ज्ञः स॒द्यः प्र॑तायते स॒द्यः सन्ति॑ष्ठते तस्य
प्रा॒ख्सा॒यम॑वभृ॒थो नमो॑ ब्र॒ह्मण॑ इति परि॒धानी॑यां त्रि॒रन्वा॑हाप॒ उप॑स्पृश्य
गृ॒हाने॑ति ततो॒ यत्किं॑च द॒दाति॑ सा दक्षि॒णा ॥ 13 (3)

(No Korvai for this Anuvaakam) (A13)

2.1.14 अनुवाकं – 14

T.A. 2.14.1

तस्य॑ वा ए॒तस्य॑ य॒ज्ञस्य॑ मे॒घो ह॒विर्द॑धानं वि॒द्युद॑ग्निर्व॒र्षञ् ह॒विः
स्तन॑यि॒तुर्-व॑षट्कारो यद॒वस्फू॑र्जति सोऽनु॑वषट्कारो
वा॒युरा॒त्माऽमा॑वास्या॒ स्विष्ट॑कृ॒द्य ए॒वं वि॒द्वान्मे॒घे व॒र्षति॑ वि॒द्योत॑माने
स्तन॑यत्य॒वस्फू॑र्जति प॒वमा॑ने वा॒याव॑मावास्याया॒ स्वा॑द्ध्य॒याय॑म॒धीते॑
तप॑ ए॒व तत्त॑प्यते तपो॑ हि स्वा॑द्ध्य॒याय॑ इत्यु॒त्तमं॑ नाक॒ञ् रो॑हत्यु॒त्तमः॑

तैत्तिरीय आरण्यकं— चातुर्होत्रचयनम् –(TA 3)

स॒मा॒ना॒नां॑ भ॒वति॑ या॒वन्त॑ ह॒ वा इ॒मां वित्त॑स्य पू॒र्णा द॒दथ्स्व॑र्गं
लोकं॑ ज॒यति॑ ता॒वन्तं लोकं॑ ज॒यति॑ भू॒याँसं॑ चाक्ष॒य्यं चाप॑ पुन॒र्मृत्युं॑
ज॒यति॑ ब्र॒ह्मणः॑ सा॒युज्यं॑ गच्छति ॥ 14 (1)

(No Korvai for this Anuvaakam) (A14)

2.1.15 अनुवाकं – 15

T.A. 2.15.1

तस्य॑ वा ए॒तस्य॑ य॒ज्ञस्य॑ द्वा॒वन॑द्ध्य॒यायौ॑ यदाऽऽत्माऽशु॒चिर्-यद्-देशः॑
समृ॑द्धिर्दे॒वता॑नि य॒ एवं वि॒द्वान् म॒हारा॑त्र उ॒षस्यु॑दि॒ते व्रज॑स्तिष्ठन्-
नासी॑नः श॒यानो॑ऽरण्ये॒ ग्रामे॑ वा या॒वत्तर॑स॒ स्वाद्ध्य॑याय॒मधी॑ते सर्वा॑न्
लो॒काञ्ज॑यति सर्वा॑न् लो॒कान॑नृ॒णोऽनु॑ सञ्च॒रति॑ तदे॒षाभ्यु॑क्ता ॥
अ॒नृणा॑ अ॒स्मिन्न॑नृ॒णाः पर॑स्मि॒स्तृती॑ये लो॒के अ॒नृणाः॑ स्याम ।
ये दे॒वया॑ना उ॒त पि॒तृया॑णाः सर्वा॑न् प॒थो अ॒नृणा॑ आक्षी॒येमे॒त्यग्निं॑
वै जा॒तं पा॒प्मा ज॒ग्राह॑ त॒न्देवा॑ आहु॒तीभिः॑ पा॒प्मान॑मपा॒घ्नन्-नाहु॑तीनां
य॒ज्ञेन॑ य॒ज्ञस्य॑ दक्षि॒णाभिर्-दक्षि॑णानां ब्रा॒ह्मणे॑न ब्रा॒ह्मण॑स्य॒ छन्दो॑भि
श्छ॒न्दसा॑ स्वाद्ध्य॒याये॑नाप॒हत॑पाप्मा स्वाद्ध्य॒यायो दे॒वप॑वि॒त्रं वा ए॒तत्तं॑

॥ योऽनू॒त् सृ॒जत्य॑भा॒गो वा॒चि भव॑त्य॒भा॒गो ना॒के तदे॒षाऽभ्यु॑क्ता ॥
 यस्ति॒त्याज॑ सखि॒विद॑ꣳ सखा॒यं न तस्य॑ वा॒च्यपि॑ भा॒गो अ॑स्ति ।
 यदीꣳ शृ॒णोत्य॑ल॒कꣳ शृ॒णोति॑ न हि प्र॒वेद॑ सु॒कृत॑स्य पन्था॒मिति॑
 तस्मा॑त् स्वा॒द्ध्यायो॑ऽद्ध्येत॒व्यो यं यं॑ क्र॒तुम॑धी॒ते तेन॑तेनास्येष्टं
 भव॑त्य॒ग्नेर्-वा॒यो-रा॑दि॒त्यस्य॑ सायु॒ज्यं ग॑च्छति॒ तदे॒षाऽभ्यु॑क्ता ॥
 ये अ॒र्वाङु॑त वा पु॒राणे॑ वेदं वि॒द्वाꣳस॑म॒भितो॑ वदन्त्यादि॒त्यमे॒व ते
 परि॑वदन्ति॒ सर्वे॑ अ॒ग्निं द्वि॒तीयं॑ तृ॒तीयं॑ च हꣳस॒मिति॑ याव॒तीर्वै
 दे॒वता॑स्ताः सर्वा॑ वेद॒विदि॑ ब्राह्म॒णे व॑सन्ति॒ तस्मा॑द् ब्राह्म॒णेभ्यो॑
 वेद॒विद्भ्यो॑ दि॒वेदि॒वे नम॑स्कुर्यान्नाश॒लीलं॑ की॒र्तये॑दे॒ता ए॒व दे॒वताः॑

प्रीणाति ॥ 15 (6) (No Korvai for this Anuvaakam) (A15)

2.1.16 अनुवाकं – 16

T.A. 2.16.1

रि॒च्यत॑ इ॒व वा ए॒ष प्रे॒व रि॒च्यते॑ यो या॒जय॑ति॒ प्रति॑ वा गृ॒ह्णाति॑
 या॒जयि॑त्वा प्रति॒गृह्य॑ वाऽन॒श्नन् न्निः॑ स्वा॒द्ध्यायं॑ वे॒दम॑धी॒यीत॑ त्रि॒रात्रं॑

तैत्तिरीय आरण्यकं— चातुर्होत्रचयनम् –(TA 3)

ॐ॑ वा॒ सा॒वि॒त्रीं॑ गा॒य॒त्री-म॒न्वा॒तिरे॒चय॑ति॒ वरो॑ दक्षि॒णा वरे॑णै॒व वरः॑
स्पृ॒णो॒त्या॒त्मा हि॑ वरः ॥ 16 (1)

(No Korvai for this Anuvaakam) (A16)

2.1.17 अनुवाकं – 17

T.A. 2.17.1

दु॒हे ह॒ वा ए॒ष छ॒न्दा॒सि॒ यो या॒जय॑ति॒ स येन॑ य॒ज्ञक्र॒तुना॑ या॒जये॒थ्
सोऽर॑ण्यं॒ परेत्य॑ शु॒चौ देशे॑ स्वा॒द्ध्याय॑-मे॒वैन॑-म॒धीय॑न्नासी॒त
तस्या॑न॒शनं॑ दी॒क्षा स्था॒नमु॒पस॒द आ॒सन॑ सु॒त्या वाग्जु॑हूर्मन॑
उप॒भृद्ध॑तिर्दधु॒वा प्रा॒णो ह॒विः सा॒मा॒ध्वर्युः॑ स वा ए॒ष य॒ज्ञः
प्रा॒णदक्षि॑णोऽन॒न्तदक्षि॑णः॒ समृ॑द्धतरः ॥ 17 (1)

(No Korvai for this Anuvaakam) (A17)

2.1.18 अनुवाकं – 18

T.A. 2.18.1

क॒ति॒धाऽव॑की॒र्णी प्र॒वि॒शति॑ चतु॒र्धेत्या॑हुर्-ब्र॒ह्मवा॑दि॒नो म॒रुतः॑
प्रा॒णैरि॒न्द्रं ब॒लेन॑ बृ॒हस्प॑तिं ब्र॒ह्मव॑र्च॒सेना॒ग्नि-मे॒वेत॑रेण॒ सर्वे॑ण॒ तस्यै॒तां
प्राय॑श्चित्तिं॒ वि॒दाञ्च॑कार सु॒देवः॑ का॒श्यपो॑ यो
ब्र॒ह्मचा॑र्य॒वकि॑रेद॒मावा॑स्याया॒ रात्र्या॑म॒ग्निं प्र॒णीयो॑पस॒माधा॒य

द्विरा॒ज्यस्यो॒पघा॑तं जु॒होति॑ का॒माव॑की॒र्णोऽस्म्य॑व॒कीर्णोऽस्मि॑ का॒म
का॒माय॑ स्वा॒हा का॒माभि॑द्रु॒ग्धोऽस्म्य॑भि॒द्रुग्धोऽस्मि॑ का॒म का॒माय॑
स्वा॒हेत्य॒मृतं॑ वा आ॒ज्यम॒मृतमे॒वात्मन्॑ ध॒त्ते हु॒त्वा प्र॑य॒ताञ्ज॒लिः
कवा॑तिर्य॒ङ्गु॒ग्निम॒भि म॑न्त्रयेत॒ सं मा॑ सिञ्चन्तु म॒रुतः॑ स॒मिन्द्रः॑
सं॒बृ॒हस्प॑तिः ।

सं मा॒ऽयम॒ग्निः सि॑ञ्च॒त्वायु॑षा च॒ बले॑न॒ चायु॑ष्मन्तं करोत॒ मेति॑ प्रति॒
हा॒स्मै म॒रुतः॑ प्रा॒णान् द॑धति॒ प्रती॑न्द्रो॒ बलं॑ प्रति॒ बृ॒हस्प॑तिर् ब्र॒ह्मव॑र्च॒सं
प्रत्य॑ग्निरि॒तर॒थ्सर्व॑ सर्व॒तनु॑र्भू॒त्वा सर्व॑मायुरेति॒ त्रिर॑भिमन्त्रयेत॒
त्रि॒षत्या॒ हि दे॒वा योऽपू॑त इ॒व म॑न्येत॒ स इ॒त्थं जु॑हुयादि॒त्थ—
म॒भि॒मन्त्र॑येत॒ पुनी॑त ए॒वात्मान॑—मायुरे॒वात्मन्॑ ध॒त्ते व॒रो दक्षि॑णा व॒रेणै॒व
व॒रं स्पृ॑णोत्या॒त्मा हि व॑रः ॥ 18 (2)

(No Korvai for this Anuvaakam) (A18)

2.1.19 अनुवाकं – 19

T.A. 2.19.1

भूः प्र॒पद्ये॑ भुवः प्र॒पद्ये॑ स्वः प्र॒पद्ये॑ भूर्भुवः॒स्वः प्र॒पद्ये॑ ब्र॒ह्म प्र॒पद्ये॑
ब्र॒ह्मको॒शं प्र॒पद्ये॑ऽमृतं॒ प्र॒पद्ये॑ऽमृतको॒शं प्र॒पद्ये॑ चतुर्जालं॒ ब्र॒ह्मको॒शं यं॑

तैत्तिरीय आरण्यकं— चातुर्होत्रचयनम् –(TA 3)

मृत्युर्नावपश्यति तं प्रपद्ये देवान् प्रपद्ये देवपुरं प्रपद्ये परीवृतो
वरीवृतो ब्रह्मणा वर्मणाऽहं तेजसा कश्यपस्य यस्मै नमस्तच्छिरो
धर्मो मूर्द्धानं ब्रह्मोत्तरा हनुर्यज्ञोऽधरा विष्णुर् हृदयं सम्वत्सरः
प्रजननमश्विनौ पूर्वपादावन्निर्मद्ध्यं मित्रावरुणा वपरपादावग्निः
पुच्छस्य प्रथमं काण्डं तत इन्द्रस्ततः प्रजापतिरभयं चतुर्थं स वा
एष दिव्यः शाक्वरः शिशुमारस्तं ह य एवं वेदाप पुनर्मृत्युं जयति
जयति स्वर्गं लोकं नाद्ध्वनि प्रमीयते नाप्सु प्रमीयते नाग्नौ
प्रमीयते नानपत्यः प्रमीयते लघ्वान्नो भवति ध्रुवस्त्वमसि ध्रुवस्य
क्षितमसि त्वं भूतानामधिपतिरसि त्वं भूतानां श्रेष्ठोऽसि त्वां
भूतान्युपपर्यावर्तन्ते नमस्ते नमः सर्वं ते **नमो नमः ॥

[***PaaTa Bhedam* – नमो नमः शिशुकुमाराय नमः] 19 (1)

(No Korvai for this Anuvaakam) (A19)

2.1.20 अनुवाकं – 20

T.A. 2.20.1

नमः प्रा॒च्यै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒ नमो॑
दक्षि॑णायै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒ नमः॑
प्र॒ती॒च्यै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒ नमः॑
उ॒दी॒च्यै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒ नमः॑
ऊ॒र्ध्वा॒यै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒
नमो॑ऽध॒रायै॑ दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒
नमो॑ऽवा॒न्तरा॑यै दि॒शे या॒श्च दे॒वता॑ ए॒तस्यां॑ प्र॒तिव॑सन्त्ये ता॒भ्यश्च॑ नमो॒
नमो॑ गङ्गा॒यमु॒नयो॑र्म॒द्ध्ये ये॑ व॒सन्ति॑ ते मे प्र॒सन्ना॑त्मान॒स्चिरं॑ जी॒वितं॑
व॒र्द्धय॑न्ति॒ नमो॑ गङ्गा॒यमु॒नयो॑र्मु॒निभ्य॑श्च॒ नमो॑ नमो॑
गङ्गा॒यमु॒नयो॑र्मु॒निभ्य॑श्च॒ नमः॑ ॥ 20 (1)

(No Korvai for this Anuvaakam) (A20)

तैत्तिरीय आरण्यकं— चातुर्होत्रचयनम् –(TA 3)

Prapaataka Korvai with starting Padams of 1 to 20 Anuvaakams :-

(सह – रक्षा॑सि – यद् दे॒वाः स॒प्तद॑श – यददी॒व्यन् प॑ञ्चद॒शा –
यु॒ष्टे च॑तुस्त्रि॒ंशद् – वैश्वान॑राय षड्वि॒ंशति॑र्-वा॒तर॑शना ह –
कू॒श्मा॒ण्डै- र॒जान्. ह – प॑ञ्च – ब्रह्म॑य॒ज्ञेन – ग्रामे॑ – म॒द्ध्यन्दि॑ने
– तस्य॑ वै मेघ – स्तस्य॑ वै द्वौ – रिच्य॑ते – दु॒हे ह –
क॒ति॒धाऽव॑कीर्णी – भूर् – नमः॑ प्राच्यै वि॒ंशतिः॑)

Korvai with starting Padams of 1, 11, 21 Series of Dasinis :-

(सह – ब्रह्म॑य॒ज्ञेन वि॒ंशतिः॑)

First and Last Padam in TA, 2nd Prapaatakam :-

(सह॑ वै – मु॒निभ्यश्च॑ नमः॑)

॥ हरिः॑ ओम् ॥

॥ कृष्ण यजुर्वेदीय तैत्तिरीय ब्राह्मणे आरण्यके द्वितीयः प्रपाठकः

समाप्तः ॥

=====

Appendix (of expansions)

T.A. 2.3.1 – "यन्मयि माता{17}"

यन्मयि माता गर्भे सति । एनश्चकार यत्पिता ।

अग्निर्मा तस्मादेनसः ॥ {17} ({17} appearing in T.B.3.7.12.3)

T.A. 2.3.1 – "यदा पिपेष{18}" "यदन्तरिक्षं{19}"

"यदाशसा{20}" "ऽतिक्रामामि{21}" "त्रिते देवा{22}"

यदा पिपेष मातरं पितरं । पुत्रः प्रमुदितो धयन् ।

अहिंसितौ पितरौ मया तत् । तदग्ने अनृणो भवामि ॥ {18}

({18} appearing in T.B.3.7.12.4)

यदन्तरिक्षं पृथिवीमुत द्यां । यन्मातरं पितरं वा जिहिंसिम ।

अग्निर्मा तस्मादेनसः ॥ {19}

({19} appearing in T.B.3.7.12.4)

यदाशसा निशसा यत्पराशसा । यदेनश्च कृमा नूतनं यत्पुराणं ।

अग्निर्मा तस्मादेनसः ॥ {20} ({20} appearing in T.B.3.7.12.4)

तैत्तिरीय आरण्यकं— चातुर्होत्रचयनम् –(TA 3)

अतिक्रामामि॑ दुरि॑तं य॑देनः । ज॒हामि रि॒प्रं प॒रमे स॒धस्थे॑ । यत्र॑ यन्ति॑
सु॒कृ॒तो नापि॑ दु॒ष्कृतः॑ । त॒मारो॑हामि सु॒कृतां॑ नु लो॒कं ॥ {21}
({21} appearing in T.B.3.7.12.5)

त्रि॒ते दे॒वा अ॑मृज॒तै-त॑देनः । त्रि॒त ए॒तन्म॑नुष्येषु मा॒मृजे॑ ।
ततो॑ मा॒ यदि॑ कि॒ञ्चि॑दान॒शे । अ॒ग्नि॒र्मा तस्मा॑दे॒नसः॑ ॥ {22}
({22} appearing in T.B.3.7.12.5)

T.A. 2.3.1 – "दि॒वि जा॒ता{23}" "य॒दाप॑{24}"

दि॒वि जा॒ता अ॒प्सु जा॒ताः । या जा॒ता ओष॑धी॒भ्यः ।
अथो॑ या अ॒ग्नि॒जा आ॒पः । ता नः॑ शु॒न्धन्तु॑ शु॒न्धनीः॑ ॥ {23}

य॒दापो॑ न॒क्तं दुरि॑तं च॒राम॑ । यद्वा दि॒वा नू॒तनं॑ य॒त्पु॒राणं॑ ।
हि॒रण्य॑-व॒र्णास्त॑त उ॒त्पु॒नीत॑ नः ॥ {24}
(Both {23} and {24} appearing in T.B.3.7.12.6)

T.A. 2.3.1 – "इ॒मं मे॑ वरु॒ण{25}" "त॒त्त्वा या॑मि{26}"

इ॒मं मे॑ वरु॒ण श्रु॒धी ह॒वम॒द्या च॑ मृ॒डय॑ । त्वा॒मव॒स्युरा॑ च॒के ॥ {25}

त॒त्त्वा या॑मि ब्र॒ह्मणा॑ व॒न्दमा॒न-स्त॒दा शा॒स्ते य॑ज॒मानो॑ ह॒विर्भिः॑ ।

अहे॑ड॒मानो॑ वरु॒णेह॑ बो॒द्ध्यु॑रु॒शस॑ मा न॒ आयुः॑ प्र॒मोषीः॑ ॥ {26}

(Both {25} and {26} appearing in T.S.2.1.11.6)

T.A. 2.3.1 – "त्वं नो॑ अ॒ग्ने{27}" "स॒त्वं नो॑ अ॒ग्ने{28}"

त्वं नो॑ अ॒ग्ने वरु॒णस्य॑ वि॒द्वान् दे॒वस्य॑ हे॒डोऽव॑ या॒सि सी॒ष्टाः ।

यजि॑ष्ठो वह्नि॑ तमः॑ शो॒शुचा॑नो वि॒श्वा द्वे॑षा॒सि प्र॑मु॒मुग्ध्य॑स्मत् ॥ {27}

स त्वं॑नो अ॒ग्नेऽव॑मो भ॒वोती॑ नेदि॒ष्ठो अ॒स्या उ॒षसो॑ व्यु॒ष्टौ ।

अव॑ यक्ष्व नो॑ वरु॒ण ररा॑णो वी॒हि मृ॒डीक॑ सु॒हवो॑ न ए॒धि ॥ {28}

(Both {27} and {28} appearing in T.S.2.5.12.3)

तैत्तिरीय आरण्यकं— चातुर्होत्रचयनम् –(TA 3)

T.A. 2.3.1 – "त्वमग्ने अयासि{29}"

त्वमग्ने अयासि । अया सन्मनसा हितः । अया सन् हव्यमूहिषे ।
अया नो धेहि भेषजम् । इष्टो अग्निराहुतः । स्वाहाकृतः पिपर्तु नः ।
स्वगा देवेभ्य इदं नमः ॥ {29} ({29} appearing in T.B.2.4.1.9)

T.A. 2.4.1 – "अव ते हेड{30}" "उदुत्तम{31}"

अव ते हेडो वरुण नमोभिरव यज्ञेभिरीमहे हविर्भिः ।
क्षयन्नस्मभ्यमसुर प्रचेतो राजन्नेनासि शिश्रथः कृतानि ॥ {30}

उदुत्तमं वरुण पाशमस्मदवाधमं विमद्ध्यमञ् श्रथाय ।
अथा वयमादित्य व्रते तवाऽनागसो अदितये स्याम ॥ {31}

(Both {30} and {31} appearing in T.S.1.5.11.3)

T.A. 2.4.1 – "मिमं मे वरुण{32}"

इमं मे वरुण श्रुधी हवमद्या च मृडय । त्वामवस्युरा चके ॥ {32}
({32} appearing in T.S.2.1.11.6)

T.A. 2.4.1 – "तत्त्वा॑ यामि{33}"

{33} is same as {26} above

T.A. 2.4.1 – "त्वं नो॑ अग्ने{34}"

{34} is same as {27} above

T.A. 2.4.1 - "सत्त्वं नो॑ अग्ने{35}"

{35} is same as {28} above

तैत्तिरीय आरण्यकं— चातुर्होत्रचयनम् –(TA 3)

Details of Dasini & Vaakyams for Prapaatakam 2 (TA 2.1)

	Dasini	Vaakyams
Anuvakam 1	1	1
Anuvakam 2	1	1
Anuvakam 3	1	17
Anuvakam 4	1	15
Anuvakam 5	1	34
Anuvakam 6	1	26
Anuvakam 7	1	1
Anuvakam 8	1	1
Anuvakam 9	1	1
Anuvakam 10	1	1
Anuvakam 11	1	1
Anuvakam 12	1	2
Anuvakam 13	1	3
Anuvakam 14	1	1
Anuvakam 15	1	6
Anuvakam 16	1	1
Anuvakam 17	1	1
Anuvakam 18	1	2
Anuvakam 19	1	1
Anuvakam 20	1	1
Total →	20	117

Total as per grantha books	22	117
----------------------------	----	-----

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

3 कृष्ण यजुर्वेदीय तैत्तिरीय आरण्यके तृतीयः प्रपाठकः

3.1 तृतीयः प्रपाठकः – चातुर्होत्रचयनम्

3.1.1 अनुवाकं – 1

T.A.3.1.1

चित्तिः॑ सुक् । चित्तमा॑ज्यम् । वाग्वेदिः॑ । आधी॑तं बर्हिः॑ ।
केतो॑ अग्निः । विज्ञा॑तमग्निः । वाक्पति॑रु॒होता॑ ॥ मन॑ उपव॒क्ता ।
प्रा॒णो ह॒विः । सा॒मा॒ध्व॒र्युः () ॥ वाचस्प॑ते वि॒धे नाम॑न् ।
वि॒धेम॑ ते नाम॑ । वि॒धेस्त्व॑-म॒स्माकं॑ नाम॑ । वाचस्प॑तिः सोमं॑ पिबतु ।
आ॒ऽस्मासु॑ नृ॒म्णं॑ धा॒थ्स्वाहा॑ ॥ 1 (15) (अ॒ध्व॒र्युः पञ्च॑ च) (A1)

3.1.2 अनुवाकं – 2

T.A.3.2.1

पृ॒थि॒वी हो॒ता ॥ द्यौर॑ध्व॒र्युः । रु॒द्रोऽग्नी॑त् । बृ॒हस्प॑ति-रुपव॒क्ता ॥
वाचस्प॑ते वा॒चो वी॒र्ये॑ण । संभृ॑तत-मे॒नाय॑क्ष्यसे ।
यज॑मानाय॒ वार्य॑म् । आ सुव॑स्करस्मै ।

वा॒चस्प॑तिः सोमं पि॒बति॑ ।

ज॒जन॑दिन्द्रमिन्द्रि॒याय॑ स्वाहा ॥ 2 (10) (पृ॒थि॒वी॒ हो॒ता द॑श) (A2)

3.1.3 अनुवाकं – 3

T.A.3.3.1

अ॒ग्निर् होता ॥ अ॒श्विना॑ऽध्व॒र्यू । त्वष्टा॑ऽग्नीत् । मि॒त्र उप॑व॒क्ता ॥

सोमः॑ सोम॒स्य पु॑रोगाः । शु॒क्रः शु॒क्रस्य॑ पु॒रोगाः ।

श्रा॒तास्त॑ इन्द्र॒ सोमाः॑ । वा॒तापे॑र् हव॒नश्रु॑तः स्वाहा ॥ 3 (8)

(अ॒ग्निर् होता॑ऽष्टौ) (A3)

3.1.4 अनुवाकं – 4

T.A.3.4.1

सू॒र्य ते॑ चक्षुः । वा॒तं प्रा॑णः । द्यां पृ॒ष्ठम् । अ॒न्तरि॑क्षमा॒त्मा ।

अ॒ङ्गैर् य॒ज्ञम् । पृ॒थि॒वीर् शरी॑रैः ॥ वा॒चस्प॑तेऽच्छि॒द्रया॑ वा॒चा ।

अच्छि॒द्रया॑ जु॒ह्वा । दि॒वि दे॒वावृ॑ध् हो॒त्रामे॑रयस्व स्वाहा ॥ 4 (9)

(सू॒र्य ते॑ नव) (A4)

3.1.5 अनुवाकं – 5

T.A.3.5.1

महा॑ह॒विर् होता॑ । स॒त्यह॑वि-र॒द्ध्वर्युः॑ । अ॒च्युत॑पाजा अ॒ग्नीत् ।
अ॒च्युत॑मना उपव॒क्ता । अ॒नाधृ॑ष्यश्चाप्रतिधृ॒ष्यश्च॑ य॒ज्ञस्या॑भिगरौ ।
अ॒यास्य॑ उ॒द्गाता॑ ॥ वाच॑स्पते ह॒द्विधे॑ नाम॒न् । वि॒धेम॑ ते नाम॒ ।
वि॒धेस्त्वम॒स्माकं॑ नाम॒ । वाच॑स्पतिः सोम॑मपात् () ।
मा दै॒व्यस्त॑न्तु॒ र॒छेदि॒ मा म॑नु॒ष्यः । नमो॑ दि॒वे ।
नमः॑ पृथि॒व्यै स्वाहा॑ ॥ 5 (13) (अ॒पात् त्रीणि॑ च) (A5)

3.1.6 अनुवाकं – 6

T.A.3.6.1

वाग्धो॑ता । दी॒क्षा प॒त्नी । वातो॑ऽद्ध्वर्युः । आपो॑ऽभिगरः । मनो॑ ह॒विः ।
तप॑सि जुहोमि ॥ भूर्भुव॑स्सुवः । ब्र॒ह्म स्वय॑म्भु ।
ब्र॒ह्मणे॑ स्वय॑म्भुवे स्वाहा ॥ 6 (9) (वाग्धो॑ता नव॑) (A6)

3.1.7 अनुवाकं – 7

T.A.3.7.1

ब्रा॒ह्मण॑ एक॒होता॑ । स य॒ज्ञः । स मे॑ ददातु प्र॒जां प॒शून् पु॒ष्टिं य॑शः ।
य॒ज्ञश्च॑ मे भूयात् ॥ अ॒ग्निर् द्वि॒होता॑ । स भ॒र्ता ।

स॒ मे॑ द॒दातु॑ प्र॒जां प॒शून् पु॒ष्टिं यँ॑शः । भ॒र्ता च॑ मे भूयात् ॥

पृ॒थि॒वी त्रि॑हो॒ता । स प्र॑ति॒ष्ठा । 7 (10)

T.A.3.7.2

स॒ मे॑ द॒दातु॑ प्र॒जां प॒शून् पु॒ष्टिं यँ॑शः । प्र॒ति॒ष्ठा च॑ मे भूयात् ॥

अ॒न्त॒रि॒क्षं च॑तु॒र्हो॒ता । स वि॒ष्ठाः ।

स॒ मे॑ द॒दातु॑ प्र॒जां प॒शून् पु॒ष्टिं यँ॑शः । वि॒ष्ठाश्च॑ मे भूयात् ॥

वा॒युः प॒ञ्च॑हो॒ता । स प्रा॑णः ।

स॒ मे॑ द॒दातु॑ प्र॒जां प॒शून् पु॒ष्टिं यँ॑शः । प्रा॑णश्च॑ मे भूयात् ॥ 8 (10)

T.A.3.7.3

च॒न्द्र॒माः ष॑ड्ढो॒ता । स ऋ॒तून् क॑ल्पयाति ।

स॒ मे॑ द॒दातु॑ प्र॒जां प॒शून् पु॒ष्टिं यँ॑शः । ऋ॒तव॑श्च॑ मे कल्पन्ताम् ॥

अ॒न्नं स॑प्तहो॒ता । स प्रा॑णस्य प्रा॒णः ।

स॒ मे॑ द॒दातु॑ प्र॒जां प॒शून् पु॒ष्टिं यँ॑शः ।

प्रा॑णस्य॑ च॑ मे प्रा॒णो भू॑यात् ॥ द्यौ॒र॒ष्ट॒हो॒ता । सो॒ऽना॑धृ॒ष्यः । 9 (10)

T.A.3.7.4

स॑ मे॑ ददा॑तु प्र॒जां प॒शून् पु॒ष्टिं यँ॑शः । अ॒ना॒धृ॒ष्यश्च॑ भूया॑सम् ॥
आ॒दि॒त्यो न॑व॒होता । स॑ ते॒ज॒स्वी ।
स॑ मे॑ ददा॑तु प्र॒जां प॒शून् पु॒ष्टिं यँ॑शः । ते॒ज॒स्वी च॑ भूया॑सम् ॥
प्र॒जाप॑तिर् द॒श॒होता । स॑ इ॒दं सर्व॑म् ।
स॑ मे॑ ददा॑तु प्र॒जां प॒शून् पु॒ष्टिं यँ॑शः ।
सर्वं॑ च॑ मे॑ भूया॑त् () ॥ 10 (10)

(प्र॒ति॒ष्ठा-प्रा॒णश्च॑ मे॑ भूया॑-द॒ना॒धृ॒ष्यः-सर्वं॑ च॑ मे॑ भूया॑त्) (A7)

Special Korvai

(ब्रा॒ह्म॒णो य॒ज्ञोऽग्नि॑र्भ॒र्ता पृ॑थि॒वी प्र॒ति॒ष्ठाऽन्तरि॑क्षं वि॒ष्ठा वा॒युः
प्रा॒णश्च॒न्द्र॒मा ऋ॒तून॑न् इ॒दं स॑ प्रा॒णस्य॑ प्रा॒णो द्यौर॑ना॒धृ॒ष्य आ॒दि॒त्यः
स॑ ते॒ज॒स्वी प्र॒जाप॑तिः स॑ इ॒दं सर्व॑म् सर्वं॑ च॑ मे॑ भूया॑त्)

3.1.8 अनुवाकं – 8

T.A.3.8.1

अ॒ग्निर् य॒जुर्भिः॑ । स॒वि॒ता स्तोमैः॑ । इ॒न्द्र उ॒क्थाम॑दैः ।
मि॒त्राव॑रु॒णावा॑शिषा॑ । अ॒ङ्गिर॑सो धि॒ष्णियै॑र॒ग्निभिः॑ ।

तैत्तिरीय आरण्यकं— चातुर्होत्रचयनम् –(TA 3)

म॒रुतः॑ स॒दोह॑वि॒र्द्धाना॑भ्याम् । आपः॑ प्रो॒क्षणी॑भिः ।

ओष॑धयो ब॒र्हिषा॑ । अ॒दि॒तिर्वे॒द्या॑ । सोमो॑ दी॒क्षया॑ ॥ 11 (10)

T.A.3.8.2

त्वष्टे॑द्धमे॒न । विष्णु॑र् य॒ज्ञेन॑ । वस॑व आ॒ज्येन॑ । आ॒दि॒त्या दक्षि॑णाभिः ।

विश्वे॑ दे॒वा ऊ॒र्जा । पू॒षा स्व॑गा॒कारे॑ण । बृ॒हस्प॑तिः पु॒रोध॑या ।

प्र॒जाप॑तिरु॒द्गी॒थेन॑ । अ॒न्तरि॑क्षं प॒वित्रे॑ण । वा॒युः पा॒त्रैः () ।

अ॒ह॒७ श्र॒द्धया॑ ॥ 12 (11) (दी॒क्षया॑ – पा॒त्रैरेकं॑ च) (A8)

3.1.9 अनुवाकं – 9

T.A.3.9.1

से॒नेन्द्र॑स्य । धे॒ना बृ॒हस्प॑तैः । प॒त्थ्या पू॒ष्णः । वा॒गवा॑योः ।

दी॒क्षा सोम॑स्य । पृ॒थिव्य॑ग्नेः । वसू॑नां गा॒यत्री॑ । रु॒द्राणां॑ त्रि॒ष्टुक् ।

आ॒दि॒त्यानां॑ जग॑ती । विष्णो॑रनु॒ष्टुक् । 13 (10)

T.A.3.9.2

वरु॑णस्य वि॒राट् । य॒ज्ञस्य॑ प॒ङ्क्तिः॑ । प्र॒जाप॑ते॒रनु॑मतिः । मि॒त्रस्य॑ श्र॒द्धा ।

स॒वि॒तुः प्र॑सूतिः । सूर्य॑स्य म॒रीचिः॑ । च॒न्द्रम॑सो रोहि॒णी ।

ऋ॒षी॑णामरु॒न्धती॑ । प॒र्जन्य॑स्य वि॒द्युत् । च॒तस्रो॑ दि॒शः () ।

च॒त॒स्रो॒ऽवा॒न्तर॒दि॒शाः । अ॒हश्च॑ रा॒त्रिश्च॑ । कृ॒षिश्च॑ वृ॒ष्टिश्च॑ ।

त्वि॒षिश्चा॒पचि॒तिश्च॑ । आ॒पश्चौष॑धयश्च ।

ऊ॒र्क्च॑ सू॒नृता॑ च दे॒वानां॑ प॒त्नयः॑ ॥ 14 (16)

(अ॒नुष्टु॒ग् – दि॒शः षट्च॑) (A9)

3.1.10 अनुवाकं – 10

T.A.3.10.1

दे॒वस्य॑ त्वा स॒वितुः॑ प्र॒सवे॑ । अ॒श्विनो॑र् बा॒हुभ्या॑म् ।

पू॒ष्णो ह॑स्ता॒भ्यां प्र॑तिगृह्णामि ।

राजा॑ त्वा व॒रुणो॑ नयतु दे॒वि दक्षि॑णेऽ॒ग्नये॑ हि॒रण्यम्॑ ।

तेना॑मृ॒तत्व॑म॒श्याम् । वयो॑ दा॒त्रे । मयो॑ म॒ह्यम॑स्तु प्र॒तिग्रही॑त्रे ।

क इ॒दं क॑स्मा अ॒दात् । का॒मः का॒माय॑ । का॒मो दा॑ता । 15 (10)

T.A.3.10.2

का॒मः प्र॑तिग्रही॒ता । का॒मो॑ स्मु॒द्रमा॑वि॒श । का॒मेन॑ त्वा प्र॒तिगृह्णामि॑ ।

का॒मैत॑त्ते । ए॒षा ते॑ का॒म दक्षि॑णा । उ॒त्ता॒नस्त्वा॑ऽऽङ्गी॒रसः॑ प्र॒तिगृह्णा॑तु ।

सो॒माय॑ वा॒सः । रु॒द्राय॑ गा॒म् । व॒रुणा॑याश्च॒म् ।

प्र॒जाप॑तये॒ पुरु॑षम् । 16 (10)

T.A.3.10.3

मन॑वे॒ तल्प॑म् । त्वष्ट्रे॒ऽजाम् । पू॒ष्णेऽवि॑म् । निर्ऋ॑त्या अश्व॑तरग॒र्दभौ॑ ।
हि॒मव॑तो ह॒स्तिन॑म् । ग॒न्धर्वा॑-फ॒स्सरा॑भ्यः-स्रग॑लङ्क॒रणे॑ ।
विश्वे॑भ्यो दे॒वेभ्यो॑ धा॒न्यम् । वा॒चेऽन्न॑म् । ब्र॒ह्मण॑ ओ॒दन॑म् ।
समु॒द्राया॑पः । 17 (10)

T.A.3.10.4

उ॒त्ता॒नाया॑ङ्गीर॒सायानः॑ । वै॒श्वान॑राय रथ॑म् ॥
वै॒श्वान॑रः प्र॒त्नथा॑ नाक॒मारु॑हत् । दि॒वः पृ॒ष्ठं भ॑न्द॒मानः॑ सु॒मन्म॑भिः ।
स पू॒र्वव॑ज्जनय॒ज्जन्त॑वे॒ धन॑म् । स॒मान॑म॒ज्मा परि॑याति जा॒गृविः॑ ॥
राजा॑ त्वा वरु॑णो नयतु दे॒वि दक्षि॑णे वै॒श्वान॑राय रथ॑म् ।
तेना॑मृत॒त्वम॑श्याम् । वयो॑ दा॒त्रे ।
मयो॑ म॒ह्यम॑स्तु प्रति॒ग्रही॑त्रे () । 18 (10)

T.A.3.10.5

क इ॒दं क॑स्मा अ॒दात् । का॒मः का॑माय । का॒मो दा॑ता ।
का॒मः प्रति॑ग्रही॒ता । का॒मꣳ समु॑द्रमावि॒श । का॒मेन॑ त्वा प्रति॑गृह्णामि ।
का॒मैत॑त्ते । ए॒षा ते॑ का॒म दक्षि॑णा ।

उ॒त्ता॒नस्त्वाऽऽङ्गी॒रसः॑ प्र॒तिगृ॑ह्णातु ॥ 19 (9)

(दा॒ता – पु॒रुष॑ – मा॒पः – प्र॒तिग्र॑ही॒त्रे – +न॒व॑ च) (A10)

3.1.11 अनुवाकं – 11

T.A.3.11.1

सु॒वर्णं॑ घ॒र्मं परि॑वेद वे॒नम् । इन्द्र॑स्या॒त्मानं॑ द॒शधा॑ चरन्तम् ।
अ॒न्तः स॒मु॒द्रे॑ म॒नसा॑ चरन्तम् । ब्र॒ह्माऽन्व॑विन्दद् द॒शहो॑ता॒रम॑र्णं ॥
अ॒न्तः प्र॑विष्टः शा॒स्ता ज॑ना॒नाम् । एकः॑ स॒न्बहु॑धा वि॒चारः॑ ।
श॒त॒ꣳ शु॒क्राणि॑ यत्रै॒कं भ॑वन्ति । सर्वे॑ वे॒दा यत्रै॒कं भ॑वन्ति ।
सर्वे॑ हो॒तारो॑ यत्रै॒कं भ॑वन्ति ।

स॒ मान॑सी॒न आ॒त्मा ज॑ना॒नाम् । 20 (10)

T.A.3.11.2

अ॒न्तः प्र॑विष्टः शा॒स्ता ज॑ना॒नाꣳ सर्वा॑त्मा ।
सर्वाः॑ प्र॒जा यत्रै॒कं भ॑वन्ति ।
च॒तुर्हो॑तारो॑ यत्र स॒म्पदं॑ गच्छन्ति दे॒वैः ।
स॒ मान॑सी॒न आ॒त्मा ज॑ना॒नाम् ॥ ब्र॒ह्मेन्द्र॑म॒ग्निं ज॑गतः प्र॒तिष्ठा॑म् ।
दि॒व आ॒त्मानꣳ स॒वि॒तारं॑ बृ॒हस्प॑तिम् ।

चतुर्॑.हो॒तारं॑ प्र॒दि॒शोऽनु॑ क्लृ॒प्तम् । वा॒चो वी॒र्यं॑ तप॒साऽन्व॑विन्दत् ॥

अ॒न्तः प्र॒विष्टं॑ क॒र्तार॑मे॒तम् ।

त्वष्टा॑रꣳ रू॒पाणि॑ वि॒कुर्व॑न्तं वि॒पश्चि॑म् । 21 (10)

T.A.3.11.3

अ॒मृत॑स्य प्रा॒णं य॒ज्ञमे॒तम् । चतुर्॑.हो॒तृणा॑-मा॒त्मानं॑ क॒वयो॑ नि॒चिक्वुः॑ ॥

अ॒न्तः प्र॒विष्टं॑ क॒र्तार॑मे॒तम् । दे॒वानां॑ ब॒न्धु नि॒हितं॑ गुहा॒सु ।

अ॒मृते॑न क्लृ॒प्तं य॒ज्ञमे॒तम् । चतुर्॑.हो॒तृणा॑मा॒त्मानं॑ क॒वयो॑ नि॒चिक्वुः॑ ॥

श॒तं नि॒युतः॑ परि॒वेद॑ वि॒श्वा वि॒श्ववा॑रः । वि॒श्वमि॑दं वृ॒णाति॑ ।

इ॒न्द्रस्या॑त्मा नि॒हितः॑ पञ्च॒होता॑ ।

अ॒मृतं॑ दे॒वाना॑मा॒युः प्र॒जाना॑म् ॥ 22 (10)

T.A.3.11.4

इ॒न्द्रꣳ रा॒जानꣳ स॒वितार॑मे॒तम् । वा॒योरा॑त्मानं क॒वयो॑ नि॒चिक्वुः॑ ।

र॒श्मिꣳ र॒श्मी॑नां म॒ध्ये त॑प॒न्तम् । ऋ॒तस्य॑ प॒दे क॒वयो॑ नि॒पान्ति॑ ॥

य आ॑ण्डको॒शे भु॒वनं॑ बि॒भर्ति॑ । अ॒निर्भि॑ण्णः स॒न्नथ॑ लो॒कान् वि॒चष्टे॑ ।

यस्या॑ण्डको॒शꣳ शु॒ष्ममा॑हुः प्रा॒णमु॑ल्बम् । तेन॑ क्लृ॒प्तोऽमृ॑तेना॒हम॑स्मि ॥

सुवर्णं॑ को॒शं॑ रज॒सा परी॑वृतम् ।

दे॒वानां॑ वसु॒धानीं॑ वि॒राज॑म् । 23 (10)

T.A.3.11.5

अमृत॑स्य पू॒र्णान्ता॑मु क॒लां वि॑चक्षते । पाद॑ षड्ढो॑तुर्न किला॑वि वि॒थ्से ॥

येन॑र्तवः पञ्च॒धोत॑ क्लृ॒प्ताः । उ॒त वा ष॒ड्धा मन॑सोत क्लृ॒प्ताः ।

तं षड्ढो॑तारमृ॒तुभिः क॑ल्पमानम् । ऋ॒तस्य॑ प॒दे क॒वयो॑ नि॒पान्ति॑ ॥

अ॒न्तः प्र॑विष्टं क॒र्तार॑मेतम् । अ॒न्तश्च॒न्द्रम॑सि॒ मन॑सा च॒रन्त॑म् ।

स॒हैव स॒न्तं न वि॑जानन्ति दे॒वाः ।

इन्द्र॑स्यात्मा॒नं श॒तधा॑ च॒रन्त॑म् ॥ 24 (10)

T.A.3.11.6

इन्द्रो॑ रा॒जा ज॑गतो य ई॒शे । स॒प्तहो॑ता स॒प्तधा॑ वि॒क्लृप्तः॑ ॥

प॒रेण॑ त॒न्तुं प॑रिषि॒च्यमा॑नम् । अ॒न्तरा॑दित्ये॒ मन॑सा च॒रन्त॑म् ।

दे॒वानां॑ हृद॒यं ब्र॑ह्माऽन्ववि॒न्दत् ॥ ब्र॒ह्मैतद्ब्र॑ह्मण॒ उज्ज॑भार ।

अ॒र्कं श्रो॑तन्तं स॒रिर॑स्य म॒ध्ये ॥ आ यस्मि॑न्स॒प्त पे॑रवः ।

मे॒हन्ति॑ बहु॒ला श्रि॑यम् । ब॒ह्वश्चा॑मिन्द्र॒ गोम॑तीम् ॥ 25 (10)

T.A.3.11.7

अ॒च्यु॒तां॑ ब॒हु॒ला॒७ श्रि॒यम्॑ । स॒ ह॒रि॒र्व॒सु॒वि॒त्त॒मः॑ । पे॒रु॒रि॒न्द्रा॒य पि॒न्व॒ते ॥
ब॒ह्व॒श्रा॒मि॒न्द्र गो॒म॒तीम्॑ । अ॒च्यु॒तां॑ ब॒हु॒ला॒७ श्रि॒यम्॑ ।
म॒ह्य॒मि॒न्द्रो नि॒य॒च्छ॒तु ॥ श॒त॒७ श॒ता अ॒स्य॑ यु॒क्ता ह॒री॒णाम्॑ ।
अ॒र्वा॒ङा॒या॒तु व॒सु॒भी र॒श्मि॒रि॒न्द्रः॑ । प्र॒म॒७ह॒माणो॑ ब॒हु॒ला॒७ श्रि॒यम्॑ ।
र॒श्मि॒रि॒न्द्रः स॒वि॒ता मे॒ नि॒य॒च्छ॒तु ॥ 26 (10)

T.A.3.11.8

घृ॒तं ते॒जो म॒धु॒म॒दि॒न्द्रि॒यम् । म॒य्य॒य॒म॒ग्नि॒र्द॒धातु॑ ॥
ह॒रिः प॒त॒ङ्गः प॒ट॒री सु॒पर्णः॑ । दि॒वि॒क्ष॒यो न॒भ॒सा य ए॒ति ।
स न॒ इ॒न्द्रः का॒म॒व॒रं द॒दातु॑ ॥ प॒ञ्चा॒रं च॒क्रं प॒रि॒व॒र्त॒ते पृ॒थु ।
हि॒र॒ण्य॒ज्यो॒तिः स॒रि॒र॒स्य म॒द्ध्यै॑ । अ॒ज॒स्रं ज्यो॒ति॒र्न॒भ॒सा सर्प॑देति ।
स न॒ इ॒न्द्रः का॒म॒व॒रं द॒दातु॑ ॥
स॒प्त यु॒ज्ज॒न्ति र॒थ॒मे॒कच॒क्रम् । 27 (10)

T.A.3.11.9

ए॒को अ॒श्वो व॒ह॒ति स॒प्त॒ना॒मा । त्रि॒ना॒भि च॒क्र॒म॒ज॒र॒म॒न॒र्वम्॑ ।
ये॒ने॒मा वि॒श्वा भु॒व॒ना॒नि त॒स्थुः॑ ॥ भ॒द्रं प॒श्य॒न्त॒ उप॑सेदु॒रग्रे॑ ।

तपो दीक्षामृषयः सुवर्विदः । ततः क्षत्रं बलमोजश्च जातम् ।

तदस्मै देवा अभि सन्नमन्तु ॥ श्वेतो रश्मिं बोभुज्यमानम् ।

अपां नेतारं भुवनस्य गोपाम् ।

इन्द्रं निचिक्युः परमे व्योमन् ॥ 28 (10)

T.A.3.11.10

रोहिणीः पिङ्गला एकरूपाः । क्षरन्तीः पिङ्गला एकरूपाः ।

शतो सहस्राणि प्रयुतानि नाव्यानाम् ॥ अयं यश्चेतो रश्मिः ।

परि सर्वमिदं जगत् । प्रजां पशून् धनानि । अस्माकं ददातु ॥

श्वेतो रश्मिः परि सर्वं बभूव । सुवन्मह्यं पशून् विश्वरूपान् ॥

पतङ्गमक्तमसुरस्य मायया ॥ 29 (10)

T.A.3.11.11

हृदा पश्यन्ति मनसा मनीषिणः । समुद्रे अन्तः कवयो विचक्षते ।

मरीचीनां पदमिच्छन्ति वेधसः ॥ पतङ्गो वाचं मनसा बिभर्ति ।

तां गन्धर्वोऽवदद् गर्भे अन्तः । तां द्योतमानाः स्वर्यं मनीषाम् ।

ऋतस्य पदे कवयो निपान्ति ॥ ये ग्राम्याः पशवो विश्वरूपाः ।

वि॒रूपाः स॒न्तो बहु॑धै॒करूपाः ।

अ॒ग्निस्ता॑ अ॒ग्रे प्र॑मु॒मोक्तु॑ दे॒वः । 30 (10)

T.A.3.11.12

प्र॒जाप॑तिः प्र॒जया॑ स॒म्वि॑दानः ॥ वी॒त॑ स्तु॒केस्तु॑के ।

यु॒वम॒स्मासु॑ निय॑च्छतम् । प्र॒प्र य॒ज्ञप॑तिं ति॒र ॥

ये ग्रा॒म्याः प॒शवो॑ वि॒श्वरू॑पाः । वि॒रूपाः स॒न्तो बहु॑धै॒करूपाः ।

तेषा॑ स॒प्ताना॑मिह र॒न्तिर॑स्तु ।

रा॒यस्पोषा॑य सु॒प्रजा॑स्त्वाय सु॒वीर्या॑य ॥

य आ॒रण्याः प॒शवो॑ वि॒श्वरू॑पाः ।

वि॒रूपाः स॒न्तो बहु॑धै॒करूपाः () । 31 (10)

T.A.3.11.13

वा॒युस्ता॑ अ॒ग्रे प्र॑मु॒मोक्तु॑ दे॒वः । प्र॒जाप॑तिः प्र॒जया॑ स॒म्वि॑दानः ॥

इ॒डा॒यै सृ॒प्तं घृ॒तव॑च्च॒राच॑रम् । दे॒वा अ॒न्ववि॑न्दन् गुहा॑हि॒तम् ॥

य आ॒रण्याः प॒शवो॑ वि॒श्वरू॑पाः । वि॒रूपाः स॒न्तो बहु॑धै॒करूपाः ।

तेषां सप्तानामिह रन्तिरस्तु ।

रायस्पोषाय सुप्रजास्त्वाय सुवीर्याय ॥ 32 (8)

(आत्मा जनानां – विकुर्वन्तं विपश्चिं – प्रजानां – वसुधानीं
विराजं – चरन्तं – गोमतीं – मे नियच्छ – त्वेकचक्रं – व्योमन्
– मायया – देव – एकरूपा – +अष्टौ च) (A11)

3.1.12 अनुवाकं – 12

T.A.3.12.1

सहस्रशीर्षा पुरुषः । सहस्राक्षः सहस्रपात् ।

स भूमिं विश्वतो वृत्वा । अत्यतिष्ठद्-दशाङ्गुलम् ॥

पुरुष एवेदं सर्वम् । यद्-भूतं यच्च भव्यम् । उतामृतत्वस्येशानः ।

यदन्नेनातिरोहति ॥ एतावानस्य महिमा ।

अतो ज्यायाश्च पुरुषः । 33 (10)

T.A.3.12.2

पादोऽस्य विश्वा भूतानि । त्रिपादस्यामृतं दिवि ॥

त्रिपादूर्ध्व उदैत्पुरुषः । पादोऽस्येहाभवात् पुनः ।

ततो विष्वङ् व्यक्रामत् ।

सा॒श॒ना॒न॒श॒ने॒ अ॒भि॒ ॥ तस्मा॑द् वि॒रा॒ड॒जा॒य॒त॒ ।

वि॒रा॒जो॒ अ॒धि॒ पू॒रु॒षः॑ ।

स जा॒तो अत्य॑रिच्यत । प॒श्चा॒द् भू॒मि॒म॒थो पु॒रः॑ ॥ 34 (10)

T.A.3.12.3

यत्पु॑रुषेण ह॒वि॒षा॑ । दे॒वा य॒ज्ञ॒म॒त॒न्व॒त॒ । व॒स॒न्तो अ॒स्या॒सी॒दा॒ज्य॑म् ।

ग्री॒ष्म इ॒ध्मः॑ श॒र॒द्ध॒विः॑ ॥ स॒प्ता॒स्या॒सन् परि॑धयः ।

त्रि॒स्स॒प्त स॒मि॒धः॑ कृ॒ताः॑ । दे॒वा यद्-य॒ज्ञं त॑न्वा॒नाः॑ ।

अ॒ब॒ध्नन् पु॑रुषं प॒शुम् ॥ तं य॒ज्ञं ब॒र्हि॒षि प्रौ॑क्षन् ।

पु॑रुषं जा॒त॒म॒ग्र॒तः॑ । 35 (10)

T.A.3.12.4

ते॒न दे॒वा अ॒य॒ज॒न्त॑ । सा॒ध्या ऋ॒षय॑श्च॒ ये ॥

तस्मा॑द् य॒ज्ञा॒थ् स॒र्व॒हु॒तः॑ । स॒म्भृ॑तं पृष॒दा॒ज्य॑म् ।

प॒शू॒स्ता॒श्च॒क्रे वा॒य॒व्यान्॑ ।

आ॒र॒ण्यान् ग्रा॒म्याश्च॒ ये ॥ तस्मा॑द् य॒ज्ञा॒थ् स॒र्व॒हु॒तः॑ ।

ऋ॒चः॑ सा॒मा॒नि ज॒ज्ञि॑रे ।

छन्दा॑ऽसि ज॒ज्ञिरे॑ तस्मात्॑ ।

यजु॑-स्तस्मादजायत ॥ 36 (10)

T.A.3.12.5

तस्माद॑श्वा अजायन्त । ये के॑ चो॒भयाद॑तः । गावो॑ ह ज॒ज्ञिरे॑ तस्मात्॑ ।

तस्मा॑ ज्जा॒ता अजा॑वयः ॥ यत् पु॒रुषं॑ व्य॒दधुः॑ । क॒ति॒धा व्य॑कल्पयन् ।

मुखं॑ किम॒स्य कौ॑ बा॒हू । का॒वूरू॑ पा॒दावु॑च्येते ॥

ब्रा॒ह्म॒णोऽस्य॑ मुखमासीत् । बा॒हू रा॒ज॒न्यः कृ॒तः । 37 (10)

T.A.3.12.6

ऊ॒रू तद॑स्य यद्-वै॒श्यः । प॒द्भ्या॑ऽशू॒द्रो अजा॑यत ॥

च॒न्द्र॒मा म॑नसो जा॒तः । चक्षोः॑ सू॒र्यो अजा॑यत । मु॒खादि॑न्द्रश्चा॒ग्निश्च॑ ।

प्रा॒णाद् वा॒युरजा॑यत ॥ ना॒भ्या आ॑सीदन्तरि॒क्षम् ।

शी॒र्ष्णो द्यौः॑ स॒मव॑र्तत । प॒द्भ्यां भू॑मिर् दि॒शः श्रो॑त्रात् ॥

तथा॑ लो॒काऽअ॑कल्पयन् ॥ 38 (10)

T.A.3.12.7

वेदा॑हमे॒तं पु॒रुषं॑ म॒हान्त॑म् । आ॒दि॒त्यव॑र्णं तम॒सस्तु॑ पा॒रे ।

सर्वा॑णि रू॒पाणि॑ वि॒चित्य॑ धी॒रः । ना॒मानि॑ कृ॒त्वाऽभि॑वदन्॒ यदा॑स्ते ॥

तैत्तिरीय आरण्यकं— चातुर्होत्रचयनम् –(TA 3)

धा॒ता पु॒रस्ता॒द्यमु॒दाज॒हार । श॒क्रः प्र॒विद्वान् प्र॒दिश॒श्चत॒स्रः ।
तमे॒वं वि॒द्वान॒मृत॑ इ॒ह भ॑वति । नान्यः पन्था॒ अय॑नाय विद्यते ॥
य॒ज्ञेन॑ य॒ज्ञम॑यजन्त दे॒वाः । तानि॑ धर्मा॒णि प्र॒थमा॑न्यासन् () ।
ते ह॒ नाकं॑ म॒हिमा॑नः सचन्ते ।
यत्र॑ पूर्वे सा॒द्ध्याः सन्ति॑ दे॒वाः ॥ 39 (12) (पु॒रुषः॑ – पु॒रु॑ – ऽग्र॒तो॑
– ऽजा॑यत – कृ॒तो॑ – ऽक॒ल्पय॑न् – ना॒सन् द्वे च॑) (A12)

Special Korvai

(ज्या॒यान॒धि पू॒रुषः॑) (अ॒न्यत्र॑ पु॒रुषः॑)

3.1.13 अनुवाकं – 13

T.A.3.13.1

अ॒द्भ्यः सम्भू॑तः पृथि॒व्यै रसा॑च्च । वि॒श्वक॑र्मणः सम॒वर्त॑ताधि ।
तस्य॑ त्वष्टा वि॒दध॑द्-रूपमेति । तत् पु॒रुष॑स्य वि॒श्वमा॑जा॒नम॑ग्रे ॥
वेदा॒हमे॒तं पु॒रुषं॑ म॒हान्त॑म् । आ॒दि॒त्यव॑र्णं तम॒सः पर॑स्तात् ।
तमे॒वं वि॒द्वान॒मृत॑ इ॒ह भ॑वति । नान्यः पन्था॒ विद्य॑तेऽय॒नाय॑ ॥
प्र॒जाप॑तिश्चरति गर्भे॑ अ॒न्तः । अ॒जाय॑मानो बहु॒धा विजा॑यते । 40 (10)

T.A.3.13.2

तस्य॑ धीराः॑ परि॑जानन्ति॑ योनि॑म् । मरी॑चीनां प॒दमि॑च्छन्ति वे॒धसः॑ ॥
यो दे॒वेभ्य॑ आ॒तप॑ति । यो दे॒वानां॑ पु॒रोहि॑तः । पूर्॒वो यो दे॒वेभ्यो॑ जा॒तः ।
नमो॑ रु॒चाय॑ ब्रा॒ह्मये ॥ रुचं॑ ब्रा॒ह्मं ज॒नय॑न्तः । दे॒वा अग्रे॑ तदब्रुवन् ।
यस्त्वै॒वं ब्रा॒ह्मणो॑ वि॒द्यात् । तस्य॑ दे॒वा अस॑न्वशे () ॥
ही॒श्च ते ल॒क्ष्मीश्च॑ प॒त्न्यौ । अ॒हो॒रा॒त्रे पा॒र्श्वे । नक्ष॑त्राणि रू॒पम् ।
अ॒श्विनौ व्या॑त्तम् । इ॒ष्टं म॑निषाण ।
अ॒मुं म॑निषाण । स॒र्वं म॑निषाण ॥ 41 (17)

(जा॒यते॑ – व॒शे स॒प्त च॑) (A13)

3.1.14 अनुवाकं – 14

T.A.3.14.1

भ॒र्ता सन् भ्रि॒यमा॑णो बिभ॑र्ति । ए॒को दे॒वो बहु॑धा नि॒विष्टः॑ ।
यदा॑ भा॒रं त॒न्द्रय॑ते स भ॒र्तुम् । नि॒धाय॑ भा॒रं पुन॑रस्तमेति ॥
तमे॒व मृ॒त्युम॒मृतं॑ तमाहुः । तं भ॒र्तारं॑ तमु॒ गोप्ता॑रमाहुः ।
स भृ॒तो भ्रि॒यमा॑णो बिभ॑र्ति । य ए॒नं वे॒द स॒त्येन॑ भ॒र्तुम् ॥
सद्यो॑ जा॒तमु॒त ज॑हात्येषः । उ॒तो ज॑रन्तं न ज॑हात्ये॒कम् ॥ 42 (10)

T.A.3.14.2

उ॒तो ब॒हू॒ने॒क॒म॒ह॒र्ज॒हा॒र । अ॒त॒न्द्रो॒ दे॒वः स॒द॒मे॒व प्रा॒र्थः ॥
य॒स्त॒द्वे॒द य॒त आ॒ब॒भू॒व । स॒न्धां च॒ या॒ꣳ स॒न्द॒धे ब्र॒ह्म॒णै॒षः ।
र॒म॒ते त॒स्मिन्नु॒त जी॒र्णे श॒या॒ने । नैनं॑ ज॒हा॒त्य॒ह॒स्सु पू॒र्व्येषु॑ ॥
त्वा॒मा॒पो अ॒नु सर्वा॑श्चरन्ति जा॒न॒तीः । व॒थ्सं प॒य॒सा पु॒ना॒नाः ।
त्व॒म॒ग्निꣳ ह॒व्य॒वा॒हꣳ स॒मि॒न्त्से ।
त्वं भ॒र्ता मा॒तरि॑श्चा प्र॒जाना॑म् ॥ 43 (10)

T.A.3.14.3

त्वं यँ॑ ज॒स्त्वमु॑ वे॒वासि॑ सो॒मः । तव॑ दे॒वा ह॒व॒मा॒य॒न्ति॑ सर्वे॑ ।
त्वमे॒को॒ऽसि॑ ब॒हू॒ननु॑ प्र॒विष्टः॑ । नम॑स्ते अ॒स्तु सु॒हवो॑ म ए॒धि ॥
नमो॑ वा॒मस्तु॑ शृ॒णु॒तꣳ ह॒वं मे॑ । प्रा॒णा॒पा॒ना॒व॒जि॒रꣳ स॒ंच॒र॒न्तौ ।
ह॒व्यामि॑ वां ब्र॒ह्म॒णा तू॒र्तमे॑तम् । यो मां॑ द्वा॒ष्टि तं॑ ज॒हि तं॑ यु॒वाना॑ ॥
प्रा॒णा॒पा॒नौ स॒म्वि॑दानौ ज॒हितम्॑ ।
अ॒मु॒ष्या॒सु॒ना मा॑ स॒ङ्ग॒सा॒थां () ॥ 44 (10)

T.A.3.14.4

तं मे दे॒वा ब्र॒ह्म॒णा स॒म्वि॒दानौ । व॒धाय॑ दत्तं तमह॑ ह॒नामि॑ ॥
अस॑ज्ज॒जान॑ स॒त आ॒ब॒भूव॑ । यं यं॑ ज॒जान॑ स उ गो॒पो अ॒स्य ।
यदा॑ भा॒रं त॒न्द्रय॑ते स भ॒र्तु॑म् । प॒रास्य॑ भा॒रं पु॒नर॒स्तमे॑ति ॥
तद्वै त्वं प्रा॒णो अ॒भवः॑ । म॒हान्भो॑गः प्र॒जाप॑तेः ।
भुजः॑ क॒रिष्य॑माणः । यद्दे॒वान्प्रा॑णयो न॒व () ॥ 45 (10)

(ए॒कं – प्र॒जानां॑ – ग॒साथां॑ – न॒व) (A14)

3.1.15 अनुवाकं – 15

T.A.3.15.1

ह॒रि॒ ह॒रन्त॑म॒नुय॑न्ति दे॒वाः । वि॒श्वस्ये॑शानं वृ॒षभं॑ म॒तीना॑म् ।
ब्र॒ह्म स॒रूप॑म॒नु मे॒दमा॑गात् । अ॒यनं॑ मा वि॒वधी॑र् वि॒क्रम॑स्व ॥
मा छि॑दो मृ॒त्यो मा व॑धीः । मा मे॒ बलं॑ वि॒वृहो॑ मा प्र॒मोषीः॑ ।
प्र॒जां मा मे॑ री॒रिष॑ आयु॒रुग्र॑ । नृ॒चक्ष॑सं त्वा ह॒विषा॑ वि॒धेम॑ ॥
स॒द्यश्च॑क॒मानाय॑ । प्र॒वेपा॑नाय मृ॒त्यवे॑ ॥ 46 (10)

T.A.3.15.2

प्रा॒स्मा आ॒शा अ॒शृण्व॑न् । का॒मेना॑ज॒नय॑न् पु॒नः ॥
का॒मेन॑ मे॒ काम॑ आ॒गात् । हृ॒दया॑द्बृ॒हद॑यं मृ॒त्योः ।

यदमी॑षाम॒दः प्रि॒यम् । तदै॒तूप॒ माम॒भि ॥

परं॑ मृ॒त्यो अनु॑ परे॒हि पन्था॑म् । यस्ते॒ स्व इ॒तरो दे॒वयाना॑त् ।

चक्षु॑ष्मते शृण्व॒ते ते ब्रवी॑मि ।

मा नः॑ प्र॒जाꣳ री॒रिषो॑ मोत॒ वी॒रान् () ॥ प्र पू॒र्व्यं मन॑सा॒ वन्द॑मानः ।

नाध॑मानो वृष॒भं चर्ष॑णीनाम् । यः प्र॒जाना॑मे॒करा॑ण्मा॒नुषी॑णाम् ।

मृ॒त्युं य॑जे प्रथम॒जामृ॒तस्य॑ ॥ 47 (14)

(मृ॒त्यवे॑ – वी॒राꣳश्च॒त्वारि॑ च) (A15)

3.1.16 अनु॒वाकं – 16

T.A.3.16.1

तर॑णिर् वि॒श्वदर्श॑तो ज्योति॒ष्कृ॒दसि॑ सूर्य । वि॒श्वमाभा॑सि रोच॒नम् ।

उप॒या॒मगृ॑हीतोऽसि॒ सूर्या॑य त्वा॒ भ्राज॑स्वत ए॒ष ते यो॒निः सूर्या॑य

त्वा॒ भ्राज॑स्वते ॥ 48 (3)

(No Korvai for this Anuvaakam) (A16)

3.1.17 अनुवाकं – 17

T.A.3.17.1

आ॒ प्या॒यस्व॑ मदि॒न्त॒म॒ सोम॑ वि॒श्वाभि॑रू॒तिभिः॑ ।

भवा॑ नः स॒प्रथ॑स्त॒मः ॥ 49 (2)

(No Korvai for this Anuvaakam) (A17)

3.1.18 अनुवाकं – 18

T.A.3.18.1

ई॒यु॒ष्टे ये॑ पू॒र्व॒त॒राम॑प॒श्यन् व्यु॑च्छ॒न्तीमु॑ष॒सं म॒र्त्या॒सः ।

अ॒स्माभि॑रू॒ नु प्र॑ति॒चक्ष्या॑ऽभू॒दो ते य॑न्ति॒ ये अ॑प॒रीषु॑ प॒श्यान् ॥ 50 (2)

(No Korvai for this Anuvaakam) (A18)

3.1.19 अनुवाकं – 19

T.A.3.19.1

ज्यो॑तिष्म॒तीं त्वा सा॑दयामि ज्यो॑तिष्कृ॒तं त्वा सा॑दयामि ज्यो॑तिर्वि॒दं
त्वा सा॑दयामि भा॒स्व॒तीं त्वा सा॑दयामि ज्व॒ल॒न्तीं त्वा सा॑दयामि
म॒ल्म॒लाभ॑व॒न्तीं त्वा सा॑दयामि दी॒प्य॒मा॒नां त्वा सा॑दयामि रो॒च॒मा॒नां
त्वा सा॑दयाम्यज॒स्रां त्वा सा॑दयामि बृ॒हज्ज्यो॑तिषं त्वा सा॑दयामि
बो॒ध॒य॒न्तीं त्वा सा॑दयामि जा॒ग्र॒तीं त्वा सा॑दयामि ॥ 51 (1)

(No Korvai for this Anuvaakam) (A19)

तैत्तिरीय आरण्यकं— चातुर्होत्रचयनम् –(TA 3)

3.1.20 अनुवाकं – 20

T.A.3.20.1

प्र॒या॒साय॒ स्वा॒हाऽऽया॒साय॒ स्वा॒हा वि॒या॒साय॒ स्वा॒हा स॒म्य॑या॒साय॒
स्वा॒हो॒द्या॒साय॒ स्वा॒हाऽव॒या॒साय॒ स्वा॒हा शु॒चे स्वा॒हा शो॒काय॒ स्वा॒हा
तप्य॒त्वै स्वा॒हा तप॑ते स्वा॒हा ब्र॒ह्म॒ह॒त्यायै॒ स्वा॒हा स॒र्वस्मै॒
स्वा॒हा ॥ 52 (1) (No Korvai for this Anuvaakam) (A20)

3.1.21 अनुवाकं – 21

T.A.3.21.1

चि॒त्त॒ꣳ स॒न्ता॒नेन॑ भ॒वं य॑क्ना रु॒द्रं त॒नि॒म्ना प॒शु॒पति॑ꣳ
स्थू॒ल॒हृ॒दये॒नाग्नि॑ꣳ हृ॒दये॒न रु॒द्रं लो॑हि॒तेन॑ श॒र्वं म॑त॒स्नाभ्यां॑
महा॑दे॒वम॒न्तः पा॒र्श्वेनौ॑षि॒ष्ठह॑नꣳ शि॒ङ्गी॒निको॑श्याभ्याम् ॥ 53 (1)
(No Korvai for this Anuvaakam) (A21)

=====

Prapaataka Korvai with starting Padams of 1 to 21 Anuvaakams :-

(चित्तिः – पृथि – व्यग्निः – सूर्यं ते चक्षुर् – महाहविर् होता –
वाग्धोता – ब्राह्मण एकहोता – ऽग्निर्यजुर्भिः – सेनेन्द्रस्य –
देवस्य – सुवर्णं घर्म – सहस्रशीर्षा – ऽद्भ्यो – भर्ता –
हरिं – तरणि – राप्याय – स्वेयुष्टे ये – ज्योतिष्मतीं –
प्रयासाय – चित्त मेकविंशतिः)

Korvai with starting Padams of 1, 11, 21 Series of Dasinis :-

(चित्ति – रग्निर्यजुर्भिः – रन्तः प्रविष्टः – प्रजापति – स्तस्य धीरा
– ज्योतिष्मतीं त्रिपञ्चाशत्)

Or

(चित्ति – रग्निर्यजुर्भिः – रन्तः प्रविष्टः – प्रजापति प्रजया सँविदान
– स्तस्य धीरा – ज्योतिष्मतीं – त्रिपञ्चाशत्)

तैत्तिरीय आरण्यकं— चातुर्होत्रचयनम् –(TA 3)

First and Last Padam in TA, 3rd Prapaatakam :-

(चित्तिः – शिङ्गीनिकोश्याभ्यां)

॥ हरिः ओम् ॥

॥ कृष्ण यजुर्वेदीय तैत्तिरीय ब्राह्मणे आरण्यके तृतीयः प्रपाठकः

समाप्तः ॥

तैत्तिरीय आरण्यके तृतीयः प्रपाठकः – (TA 3)

Details of Dasini & Vaakyams for Prapaatakam 3 (TA 3)

	Dasini	Vaakyams
Anuvakam 1	1	15
Anuvakam 2	1	10
Anuvakam 3	1	8
Anuvakam 4	1	9
Anuvakam 5	1	13
Anuvakam 6	1	9
Anuvakam 7	4	40
Anuvakam 8	2	21
Anuvakam 9	2	26
Anuvakam 10	5	49
Anuvakam 11	13	128
Anuvakam 12	7	72
Anuvakam 13	2	27
Anuvakam 14	4	40
Anuvakam 15	2	24
Anuvakam 16	1	3
Anuvakam 17	1	2
Anuvakam 18	1	2
Anuvakam 19	1	1
Anuvakam 20	1	1
Anuvakam 21	1	1
Total →	53	501

Total as per grantha books Anuvaakam 21	53	Not given
---	----	-----------

ओं नमः परमात्मने, श्री महागणपतये नमः

श्री गुरुभ्यो नमः, हरिः ओं

4 कृष्ण यजुर्वेदीय तैत्तिरीय आरण्यके प्रथमः प्रपाठकः

4.1 चतुर्थः प्रपाठकः – पितृमेधमन्त्राः

4.1.1 अनुवाकम् – 1

(As per some schools, 4th parapatakam starts with “नमो वाचे या चोदिता” which please note. For ready reference please refer to the table attached after Page No.7)

T.A.4.1.1

परे॒यु॒वा॒ꣳसं॑ प्र॒वतो॑ म॒हीर॑नु बहु॒भ्यः॑ पन्था॑-मन॒पस्प॑शानम् ।
वै॒व॒स्व॒तꣳ स॒ङ्ग॒म॒नं॑ ज॒नानां॑ य॒मꣳ रा॒जानꣳ ह॒विषा॑ दु॒वस्य॑त ॥
इ॒दं त्वा॒ वस्त्रं॑ प्र॒थमं॑ न्वा॒ग॒न्न॒पै॒त॒दू॒ह॒ यदि॒हा॒बि॒भः॑ पु॒रा ।
इ॒ष्टा॒पूर्त॑मनु॒ संप॑श्य दक्षि॒णां य॑था ते द॒त्तं बहु॑धा वि ब॒न्धुषु॑ ॥
इ॒मौ यु॑न॒ज्मि॑ ते व॒ह्नी अ॑सु॒नी॒थाय॑ वोढ॒वै ॥
या॒भ्यां य॑म॒स्य सा॑दनꣳ सु॒कृतां॑ चापि॑ गच्छ॒तात् ॥
पू॒षा त्वे॒त॒श्च॒याव॑यतु प्र॒वि॒द्वा-न॑न॒ष्ट॒प॒शुर्-भु॑व॒नस्य॑ गो॒पाः ।
स त्वै॒ते॒भ्यः॑ परि॒ददा॑त् पि॒तृ॒भ्योऽग्नि॑र्दे॒वे॒भ्यः॑ सु॒वि॒द॒त्रे॒भ्यः॑ ॥

पू॒षे॒मा आ॒शा अनु॒वेद॒ सर्वाः॒ सो अ॒स्मा॒ अभय॑तमेन नेषत् ।
स्व॒स्ति॒दा अ॒घृ॒णिः॒ सर्व॑वी॒रो-ऽप्र॑युच्छन्पु॒र ए॒तु प्र॑वि॒द्वान् ॥ 1 (10)

T.A.4.1.2

आयु॑र्-वि॒श्वायुः॑ परि॒पास॑ति त्वा पू॒षा त्वा पा॒तु प्र॑प॒थे पु॒रस्ता॑त् ।
यत्रा॑सते सु॒कृ॒तो यत्र॑ ते य॒युस्तत्र॑ त्वा दे॒वः स॒वि॒ता द॑धातु ॥
भुव॑नस्य पत इ॒दं ह॒विः ॥ अ॒ग्नये॑ रयि॒मते॒ स्वाहा॑ ॥
पुरु॑षस्य स॒याव॑र्यपे॒दघा॑नि मृ॒ज्महे॑ ।
यथा॑ नो अ॒त्र ना॒परः पु॒रा ज॒रस॑ आयति ॥
पुरु॑षस्य स॒याव॑रि वि ते प्रा॒णम॑सि॒स्रस॑म् ।
शरी॑रेण म॒हीमि॑हि स्व॒धये॑हि पि॒तृनु॑प प्र॒जया॒ऽस्मानि॑हाव॒ह ॥
मैवं॑ मा॒स्ता प्रि॒येऽहं॑ दे॒वी स॒ती पि॒तृलो॒कं य॑दैषि ।
वि॒श्ववा॑रा न॒भसा॒ सम् व्य॑यन्त्यु॒भौ नो॑ लो॒कौ
पय॑साऽभ्याववृ॒थस्व ॥ 2 (10)

T.A.4.1.3

इ॒यं ना॑री प॒तिलो॒कं वृ॑णा॒ना नि॑प॒द्यत॒ उप॑ त्वा म॒र्त्यं प्रे॑तम् ।
वि॒श्वं पु॒राण॑मनु॒ पाल॑यन्ती तस्यै॑ प्र॒जां द्र॑विणं चे॒ह धे॑हि ॥

तैत्तिरीय आरण्यकं— पितृमेधमन्त्राः –(TA 4)

उ॒दी॒र्घ्व॑ ना॒र्य॒भि जी॒व॒लो॒क-मि॒ता॒सु-मे॒तमु॒प॒शे॒ष ए॒हि ।
ह॒स्त॒ग्रा॒भस्य॑ दि॒धि॒षो-स्त्वमे॒तत् प॒त्यु॒र्ज॒नि॒त्वम॒भि सं॒ब॒भू॒व ॥
सु॒व॒र्णं॑ ह॒स्ता॒दा॒द॒दा॒ना मृ॒तस्य॑ श्रि॒यै ब्र॒ह्म॒णे ते॒ज॒से ब॒लाय॑ ।
अ॒त्रै॒व त्वमि॒ह व॒यं सु॒शे॒वा वि॒श्वाः स्पृ॒धो अ॒भिमा॑ती॒र्जये॑म ॥
ध॒नु॒र् ह॒स्ता॒दा॒द॒दा॒ना मृ॒तस्य॑ श्रि॒यै क्ष॒त्रा॒यौ॒ज॒से ब॒लाय॑ ।
अ॒त्रै॒व त्वमि॒ह व॒यं सु॒शे॒वा वि॒श्वाः स्पृ॒धो अ॒भिमा॑ती॒र्जये॑म ।
म॒णिं॑ ह॒स्ता॒दा॒द॒दा॒ना मृ॒तस्य॑ श्रि॒यै वि॒शे पु॒ष्ट्यै॑ ब॒लाय॑ ।
अ॒त्रै॒व त्वमि॒ह व॒यं सु॒शे॒वा वि॒श्वाः स्पृ॒धो अ॒भिमा॑ती॒र्जये॑म ॥ 3 (10)

T.A.4.1.4

इ॒मम॒ग्ने च॒म॒सं मा वि॒जी॒ह्वरः॑ प्रि॒यो दे॒वाना॑मु॒त सो॒म्याना॑म् ।
ए॒ष यश्च॑म॒सो दे॒व॒पा॒नस्तस्मि॑न् दे॒वा अ॒मृ॒ता मा॒दय॑न्ताम् ॥
अ॒ग्ने॒र्व॒र्म परि॑ गो॒भिर्व्य॑यस्व संप्रो॒र्णुष्व॑ मे॒दसा॑ पी॒वसा॑ च ।
ने॒त्वा धृ॒ष्णु॒र् ह॒रसा॑ ज॒र्ह॒षा॒णो द॒धद्-वि॒धक्ष्य॑न्-पर्य॒ङ्घ्या॑तै ॥
मै॒नम॒ग्ने वि॒द॒हो माऽभि॑शो॒चो माऽस्य॑ त्वचं॑ चि॒क्षि॒पो मा शरी॑रम् ।
य॒दा शृ॒तं क॒रवो॑ जा॒तवे॒दोऽथे॑मे॒नं प्र॑हि॒णु॒तात् पि॒तृ॒भ्यः॑ ॥

शृ॒तं यँ॒दा क॒रसि॑ जा॒तवे॒दोऽथे॑मे॒नं प॒रिद॑त्तात् पि॒तृभ्यः॑ ।

य॒दा गच्छा॑-त्यसु॒नीति॑-मे॒ताम॑था दे॒वानां॑ वँ॒शनी॑र्भ॒वाति॑ ॥

सूर्यं॑ ते चक्षु॒र्-गच्छ॑तु वा॒तमा॒त्मा द्यां च॑ गच्छ

पृ॒थि॒वीं च॑ ध॒र्मणा॑ ।

अ॒पो वा गच्छ॑ यदि तत्र ते हि॒तमोष॑धीषु प्र॒तिति॑ष्ठा शरी॒रैः () ॥

अ॒जो भा॒गस्त॑पसा तं तप॒स्व तं ते शो॒चिस्त॑पतु तं ते अ॒र्चिः ।

यास्ते॑ शि॒वास्त॑नुवो जा॒तवे॒दस्ताभि॑र्-वहे॒मꣳ सु॒कृतां॑ यत्र लो॒काः ॥

अयं॑ वै त्वम॒स्मादधि॑ त्वमे॒तदयं॑ वै तद॒स्य यो॒निर॑सि ।

वैश्वा॒नरः पु॒त्रः पि॒त्रे लो॒ककृ॑-ज्जा॒तवे॒दो वहे॒मꣳ सु॒कृतां॑

यत्र लो॒काः ॥ 4 (14)

(वि॒द्वा-न॒भ्याव॑वृ॒थ्स्वा - भि॒मा॒तीर्ज॑ये॒म - शरी॑रैश्च॒त्वारि॑ च) (A1)

4.1.2 अनुवाकम् – 2

T.A.4.2.1

य ए॒तस्य॑ प॒थो गो॒प्तार॑स्तेभ्यः स्वाहा य ए॒तस्य॑ प॒थो र॑क्षि॒तार॑स्तेभ्यः
स्वाहा य ए॒तस्य॑ प॒थोऽभि॑र॒क्षितार॑-स्तेभ्यः स्वाहाऽऽख्या॑त्रे

तैत्तिरीय आरण्यकं— पितृमेधमन्त्राः –(TA 4)

स्वाहाऽपाख्यात्रे स्वाहाऽभिलालपते स्वाहाऽपलालपते स्वाहाऽग्नये
कर्मकृते स्वाहा यमत्र नाधीमस्तस्मै स्वाहा ॥
यस्त इद्धं जभरथ् सिष्विदानो मूर्द्धानं वा ततपते त्वाया ।
दिवो विश्वस्माथ् सीमघायत उरुष्यः ॥
अस्मात्त्वमधि जातोऽसि त्वदयं जायतां पुनः ।
अग्नये वैश्वानराय सुवर्गाय लोकाय स्वाहा ॥ 5 (5)

(य एतस्य त्वत् पञ्च) (A2)

4.1.3 अनुवाकम् – 3

T.A.4.3.1

प्र केतुना बृहता भात्यग्निराविर्-विश्वानि वृषभो रोरवीति ।
दिवश्चिदन्तादुप मामुदा-नडपामुपस्थे महिषो ववर्द्ध ॥
इदं त एकं पर ऊत एकं तृतीयेन ज्योतिषा सम्विशस्व ।
सम्वेशनस्तनुवै चारुरेधि प्रियो देवानां परमे सधस्थे ॥
नाके सुपर्णमुप यत् पतन्तः हृदा वेनन्तो अभ्यचक्षत त्वा ।
हिरण्यपक्षं वरुणस्य दूतं यमस्य योनौ शकुनं भुरण्युम् ॥

अति॑द्र॒व सा॒रमे॒यौ श्वा॒नौ च॒तुर॒क्षौ श॒बलौ सा॒धुना॑ प॒था ।
 अथा॑ पि॒तृन्त् सु॒विद॒न्नाꣳ अ॒पीहि॑ य॒मेन॑ ये स॒धमा॑दं म॒दन्ति॑ ॥
 यौ ते॑ श्वा॒नौ यम॑ र॒क्षितारौ॑ च॒तुर॒क्षौ प॒थिर॒क्षी नृ॒चक्ष॑सा ।
 ताभ्याꣳ राज॑न् परि॒ देह्येनꣳ स्व॒स्ति चा॒स्मा
 अन॑मी॒वं च॑ धेहि ॥ 6 (10)

T.A.4.3.2

उ॒रुण॒सा-व॒सुतृ॒पा-वु॒लुम्ब॒लौ य॒मस्य॑ दू॒तौ च॒रतो॑ व॒शाꣳ अ॒नु ।
 ताव॒स्मभ्यं॑ दृ॒शये॑ सू॒र्याय॑ पु॒नर्द॒त्ताव॑सु॒मद्ये॑ह भ॒द्रम् ॥
 सोम॑ ए॒केभ्यः॑ प॒वते॑ घृ॒तमे॒क उपा॑सते ।
 येभ्यो॑ म॒धु प्र॒धाव॑ति ताꣳ-श्चि॒देवा॑पि॒गच्छ॑तात् ॥
 ये यु॒द्ध्यन्ते॑ प्र॒धने॑षु शू॒रासो॑ ये त॒नुत्य॑जः ।
 ये वा स॒हस्र॑दक्षि॒णास्ताꣳ श्चि॒देवा॑पि॒गच्छ॑तात् ॥
 तप॑सा ये अ॒नाधृ॑ष्या-स्तप॑सा ये सु॒वर्ग॑ताः ।
 तपो॑ ये च॒क्रिरे॑ म॒हत्ताꣳ-श्चि॒देवा॑पि॒गच्छ॑तात् ॥

अ॒श्म॒न्वती॑ रे॒वतीः॑ स॒ञ्भ॒ध्व-मु॒त्तिष्ठ॑त॒ प्र॒तर॑ता स॒खायः॑ ।

अ॒त्रा ज॒हाम॑ ये अ॒सन्न॑शे॒वाः शि॒वान् व॒यम॒भि वा॒जानु॑त्तरेम ॥ 7 (10)

T.A.4.3.3

यद्वै दे॒वस्य॑ स॒वितुः॑ प॒वित्र॑ सह॒स्र॒धारं॑ वि॒त॒त॒मन्त॑रि॒क्षे ।

येना॒पुना॑-दि॒न्द्रम॑ना॒र्त-मा॒र्त्ये तेना॒हं मा॑ सर्व॒तनुं॑ पुनामि ॥

या रा॒ष्ट्रात् प॒न्नादप॑ यन्ति॒ शाखा॑ अ॒भि॒मृता॑ नृ॒पति॑मि॒च्छमा॑नाः ।

धा॒तुस्ताः॑ सर्वाः॒ पव॑नेन पू॒ताः प्र॒जया॑ऽस्मान्-र॒य्या वर्च॑सा

स॒ञ्सृ॑जाथ ॥

उ॒द्वयं॑ तम॒सस्प॑रि प॒श्यन्तो॑ ज्योति॒रुत्त॑रम् ।

दे॒वं दे॒वत्रा॑ सूर्य॒मग॑न्म ज्योति॒रुत्त॑मम् ॥ धा॒ता पु॑नातु स॒विता॑ पु॒नातु॑ ।

अ॒ग्नेस्तेज॑सा सूर्य॒स्य वर्च॑सा ॥ 8 (8)

(धे - ह्यु॑त्तरे - मा॒ष्टौ च) (A3)

4.1.4 अनुवाकम् – 4

T.A.4.4.1

यं ते॑ अ॒ग्निम॑म॒न्थाम॑ वृ॒षभा॑ये॒व प॑क्त॒वे ।
इ॒मं त॑ꣳ श॒मयाम॑सि क्षी॒रेण॑ चोद॒केन॑ च ॥
यन्त्व॑म॒ग्ने स॒मद॑ह॒स्त्वमु॑ नि॒र्वाप॑या पुनः॑ ।
क्या॒म्बूर॑त्र जा॒यतां॑ पा॒कदू॒र्वा व्य॑ल्क॒शा ॥
शी॒ति॒के शी॑ति॒काव॑ति ह्रा॒दुके॑ ह्रा॒दुका॑वति ।
मण्डू॑क्या सु॒सङ्ग॑मये॒मꣳ स्व॑ग्निꣳ श॒मय॑ ॥
शं ते॑ ध॒न्वन्या॑ आ॒पः श॑मु ते स॒न्त्वनू॑क्याः ॥
शं ते॑ स॒मुद्रि॑या आ॒पः श॑मु ते स॒न्तु व॑र्ष्याः ॥
शं ते॑ स्र॒वन्ती॑-स्त॒नुवे॑ श॑मु ते स॒न्तु कू॑प्याः ॥
शं ते॑ नी॒हारो॑ व॒र्षतु॑ श॑मु पृ॒ष्वाऽव॑शीयताम् ॥ 9 (10)

T.A.4.4.2

अ॒व सृ॑ज पुन॒रग्ने॑ पि॒तृभ्यो॑ यस्त॒ आहु॑तश्चरति स्व॒धाभिः॑ ।
आयु॑र्व॒सान॒ उप॑ यातु शेषꣳ सङ्गच्छतां त॒नुवा॑ जा॒तवे॑दः ॥
सङ्गच्छ॑स्व पि॒तृभिः॑ सꣳ स्व॒धाभिः॑ स॒मिष्टा॑पूर्तेन॒ पर॑मे व्योमन् ।

यत्र भूम्यै वृणसे तत्र गच्छ तत्र त्वा देवः सविता दधातु ॥
 यत्ते कृष्णः शकुन आतुतोद पिपीलः सर्प उत वा श्वापदः ।
 अग्निष्टद्-विश्वादनृणं कृणोतु सोमश्च यो ब्राह्मणमाविवेश ॥
 उत्तिष्ठात-स्तनुवꣳ सम्भरस्व मेह गात्रमवहा मा शरीरम् ।
 यत्र भूम्यै वृणसे तत्र गच्छ तत्र त्वा देवः सविता दधातु ॥
 इदं त एकं पर ऊत एकं तृतीयेन ज्योतिषा सम्विशस्व ।
 सम्वेशन-स्तनुवै चारुरेधि प्रियो देवानां परमे सधस्थे () ॥
 उत्तिष्ठ प्रेहि प्रद्रवौकः कृणुष्व परमे व्योमन् ।
 यमेन त्वं यम्या सम्विदानोत्तमं नाकमधि रोहेमम् ॥
 "अश्मन्वती रेवतीर्{36}" "यद्वै देवस्य सवितुः पवित्रम्{37}"
 "या राष्ट्रात् पन्ना{38}" "दुद्वयं तमसस्परि{39}"
 "धाता पुनातु{40}" ॥
 अस्मात्त्वमधि जातोऽस्ययं त्वदधिजायताम् ।
 अग्नये वैश्वानराय सुवर्गाय लोकाय स्वाहा ॥ 10 (15)

(अवशीयताञ् – सधस्थे पञ्च च) (A4)

4.1.5 अनुवाकम् – 5

T.A.4.5.1

आया॑तु दे॒वः सु॒मना॑भि-रू॒तिभिर्-य॒मो ह॒वेह॑ प्र॒यता॑भि॒रक्ता॑ ।
आसी॑दताञ् सु॒प्रय॑तेह ब॒र्हिष्यू॑र्जा॒य जा॒त्यै म॑म श॒त्रुह॑त्यै ॥
यमे॑ इ॒व य॑त॒माने॑ यदै॒तं प्र॑वा॒म्भर॑न् मा॒नुषा॑ दे॒वय॑न्तः ।
आसी॑दतञ् स्व॒मु लो॒कं वि॑दाने स्वा॒सस्थे॑ भ॒वत॑मि॒न्दवे॑ नः ॥
य॒माय॑ सोमञ् सु॒नुत॑ य॒माय॑ जुहु॒ता ह॒विः ।
यमञ् ह॑ य॒ज्ञो ग॑च्छत्य॒ग्निदू॑तो अ॒रङ्क॑तः ॥
य॒माय॑ घृ॒तव॑द्धवि॒र्जुहो॑त प्र च तिष्ठ॑त ।
स नो॑ दे॒वेष्वा॑य॒मद्-दी॒र्घमा॑युः प्र जी॒वसे॑ ॥
य॒माय॑ म॒धुम॑त्तमञ् रा॒ज्ञे ह॒व्यं जु॑होत॒न ।
इ॒दं न॑म ऋ॒षिभ्यः॑ पू॒र्वजे॑भ्यः पू॒र्वेभ्यः॑ प॒थिकृ॑द्भ्यः ॥ 11 (10)

T.A.4.5.2

योऽस्य॑ कौ॒ष्ठ्य ज॑गतः पा॒र्थिव॑स्यै॒क इ॒द्वशी॑ ।
य॒मं भ॑ङ्ग्यश्र॒वो गा॑य॒ यो रा॑जाऽन॒परो॑द्ध्यः ॥

य॒मं गाय॑ भ॒ङ्ग्य॒श्रवो॑ यो रा॒जाऽन॒परो॒द्ध्यः॑ ।
 ये॒नापो॑ न॒द्यो ध॒न्वा॒नि ये॒न द्यौः॑ पृ॒थि॒वी दृ॒ढा ॥
 हि॒र॒ण्य॒क॒क्ष्यान्-थ्सु॒धुरान्॑. हि॒र॒ण्य॒क्षा-न॒यश्श॒फान्॑ ।
 अ॒श्वा-न॒नश्य॑तो दा॒नं य॒मो रा॒जाऽभि॒तिष्ठ॑ति ॥
 य॒मो दा॑धार पृ॒थि॒वीं य॒मो वि॒श्वमि॒दं जग॑त् ।
 य॒माय॑ स॒र्वमि॒त्रस्थे॑ यत् प्रा॒णद्-वा॒युरक्षि॑तम् ॥
 यथा॑ पञ्च॒ यथा॑ षड् यथा॑ पञ्च॒दश॑र्षयः ।
 य॒मं यो॑ वि॒द्याथ्स॑ ब्रू॒याद्य॒थैक॑ ऋ॒षिर्वि॒जान॑ते ॥ 12 (10)

T.A.4.5.3

त्रि॒क॒द्रु॒केभिः॑ प॒तति॑ षडु॒र्वी-रे॒कमि॒द्-बृ॒हत् ।
 गा॒य॒त्री त्रि॒ष्टुप्छ॒न्दा॒सि सर्वा॑ ता य॒म आ॒हिता॑ ॥
 अ॒हर॒हर्न॑यमा॒नो गा॒मश्च॑ पु॒रुषं॑ जग॑त् ।
 वैव॑स्वतो न तृ॒प्यति॑ पञ्च॒भिर्मा॒नवैर्य॑मः ॥
 वैव॑स्वते वि॒विच्य॑न्ते य॒मे रा॒जनि॑ ते ज॒नाः ।
 ये चे॒ह स॒त्येने॑च्छन्ते य उ॒ चानृ॑तवादिनः ॥

ते राजन्निह विविच्यन्तेऽथा यन्ति त्वामुप ।

देवाञ्च ये नमस्यन्ति ब्राह्मणाञ्चापचित्यति ॥

यस्मिन् वृक्षे सुपलाशे देवैः संपिबते यमः ।

अत्रा नो वि॒श॒पतिः पि॒ता पु॒रा॒णा अनु॒वे॒नति () ॥ 13 (10)

(प॒थि॒कृ॒द्भ्यो – वि॒जा॒नते – अनु॒वे॒नति) (A5)

4.1.6अनुवाकम् – 6

T.A.4.6.1

वै॒श्वा॒नरे॒ ह॒वि॒रि॒दं जु॒हो॒मि सा॒ह॒स्र-मु॒थ्सं॑ श॒तधा॒रमे॒तम् ।

तस्मि॒न्नेष॑ पि॒तरं॑ पि॒ताम॒हं प्र॒पि॒ताम॒हं बि॒भर॑त् पि॒न्वमा॑ने ॥

द्र॒प्सश्च॑स्क॒न्द पृ॒थि॒वीम॒नु द्या॒मिम॒ञ्च यो॒निम॒नु यश्च॑ पू॒र्वः ।

तृ॒ती॒यं यो॒निम॒नु स॒ञ्चर॑न्तं द्र॒प्सं जु॒हो॒म्यनु॑ स॒प्त हो॒त्राः ॥

इ॒मं स॒मु॒द्रं श॒तधा॒रमु॒थ्सं व्य॒च्यमा॑नं भु॒वन॑स्य म॒द्ध्ये ।

घृ॒तं दु॒हा॒नाम॑दि॒तिं ज॒नाया॒ग्ने मा हि॑सीः प॒रमे॑ व्यो॒मन् ॥

अ॒पेत॑ वी॒त वि॒च सर्प॑तातो॒ येऽत्र॑ स्थ पु॒रा॒णा ये च॒ नू॒तनाः ।

अ॒हो॒भिर॒द्भि-र॒क्तु॒भिर्-व्य॒क्तं य॒मो द॒दा-त्व॑व॒सान॑मस्मै ॥

स॒वि॒तै॒तानि॒ शरी॑राणि पृथि॒व्यै मा॒तुरु॒पस्थ॒ आद॑धे ।

तेभि॑र्-यु॒ज्यन्ता-म॒घ्नियाः ॥ 14 (10)

T.A.4.6.2

शुनं॑ वा॒हाः शुनं॑ ना॒राः शुनं॑ कृष॒तु लाङ्ग॑लम् ।

शुनं॑ वर॒त्रा ब॑द्ध्यन्ता॒ं शुन॑-म॒ष्ट्रा-मु॒दिङ्ग॑य शुना॒सीरा॑

शुन॑म॒स्मासु॑ ध॒त्तम् ॥

शुना॑सीरावि॒मां वा॒चं य॑द्-दि॒वि च॑क्र॒थुः प॑यः ।

तेने॑मा-मु॒पसि॑ञ्चतम् ॥

सी॒ते व॑न्दा॒महे॑ त्वा॒र्वाची॑ सु॒भगे॑ भव ।

यथा॑ नः सु॒भगा॑ स॒सि यथा॑ नः सु॒फला॑ स॒सि ॥

स॒वि॒तै॒तानि॒ शरी॑राणि पृथि॒व्यै मा॒तुरु॒पस्थ॒ आद॑धे ।

तेभि॑रदि॒ते शं॑ भव ॥

विमु॑च्य॒ध्व-म॒घ्निया॑ दे॒वया॑ना॒ अता॑रिष्म॒ तम॑स॒स्पार॑म॒स्य ।

ज्योति॑रापाम॒ सुव॑रगन्म () ॥ 15 (10)

T.A.4.6.3

प्र वा॒ता वा॒न्ति प॒तय॑न्ति वि॒द्युत॑ उदोष॑धीर्जिहते॑ पि॒न्वते॑ सु॒वः ।
 इ॒रा वि॒श्वस्मै॑ भुव॑नाय जायते॑ यत् प॒र्जन्यः॑ पृथि॒वीꣳ रे॒तसाऽव॑ति ॥
 यथा॑ य॒माय॑ हा॒र्म्य-मव॑पन् पञ्च॑मा॒नवाः॑ ।
 एवं॑ व॒पामि॑ हा॒र्म्यं यथाऽऽ॒साम॑ जी॒वलो॒के भू॑रयः ॥
 चि॒तः स्थ॑ परि॒चित॑ ऊ॒र्ध्वचि॑तः श्रय॑द्ध्वं पि॒तरो॑ दे॒वता॑ ॥
 प्र॒जाप॑तिर्वः सादय॑तु तया॑ दे॒वतया॑ ॥
 "आ प्या॑यस्व{41}" "सं ते{42}" ॥ 16 (7)

(अ॒घ्निया - अ॒गन्म - +स॒प्त च) (A6)

4.1.7 अनुवाकम् – 7

T.A.4.7.1

उ॒त्ते त॒भ्नोमि॑ पृथि॒वीं त्वत्प॑रीमं लो॒कं नि॒दध॑न्मो अ॒हꣳ रि॒षम् ।
 ए॒ताꣳ स्थू॑णां पि॒तरो॑ धा॒रय॑न्तु तेऽत्रा॑ य॒मः सा॒दना॑त्ते मि॒नोतु॑ ॥
 उ॒प॒सर्प॑ मा॒तरं॑ भू॒मिमे॑ता-मु॒रुव्य॑चसं पृथि॒वीꣳ सु॒शेवा॑म् ।
 ऊ॒र्णम्र॑दा यु॒वति॑र् दक्षि॒णाव॑त्येषा त्वा पा॒तु निर्ऋ॑त्या उ॒पस्थे॑ ॥
 उ॒च्छ्म॑ञ्चस्व पृथि॒वि मा वि॑बा॒धिथाः॑ सू॒पाय॑नाऽस्मै भव॑ सू॒पव॑ञ्च॒ना ।

मा॒ता पु॒त्रं य॑था सि॒चाऽभ्ये॑नं भूमि वृणु ॥

उ॒च्छ॒मज्ज॑माना पृथि॒वी हि तिष्ठ॑सि स॒हस्र॑मि॒त उप॑ हि श्रय॑न्ताम् ।

ते गृ॒हासो॑ मधु॒श्रुतो॑ विश्वाहा॒स्मै शर॑णाः स॒न्त्वत्र॑ ॥

ए॒णीर्धा॑ना हरि॒णी-रर्जु॑नीः सन्तु धे॒नवः॑ ।

ति॒लव॑त्सा ऊ॒र्जम॑स्मै दुहा॒ना विश्वाहा॑ स॒न्त्वन॑पस्फुरन्तीः ॥ 17 (10)

T.A.4.7.2

ए॒षा ते य॑मसादने स्व॒धा नि॑धीयते गृ॒हे । अक्षि॑तिर्नाम ते असौ ॥

इ॒दं पि॒तृभ्यः॑ प्र॒भरे॑म ब॒र्हिर् दे॒वेभ्यो॑ जी॒वन्त॑ उत्त॒रं भरे॑म ।

तत्त्व॑मारोहासो मे॒ध्यो भ॑वं य॒मेन॑ त्वं य॒म्या स॑म्वि॒दानः॑ ॥

मा त्वा वृ॒क्षौ सं॑बाधि॒ष्टां मा मा॒ता पृ॑थि॒वि त्व॑म् ।

पि॒तृन् हि यत्र॑ गच्छा॒स्येधा॑सं य॒मरा॑ज्ये ॥

मा त्वा वृ॒क्षौ सं॑बाधे॒थां मा मा॒ता पृ॑थि॒वी म॒ही ।

वै॒वस्व॑त॒र्हि गच्छा॑सि य॒मरा॑ज्ये वि॒राज॑सि ॥

न॒ळं प्ल॑वमा॒रोहै॑तं न॒ळेन॑ प॒थोऽन्वि॑हि ।

स त्वं न॒ळप्ल॑वो भू॒त्वा स॑न्त॒र प्र॑त॒रोत्त॑र ॥ 18 (10)

T.A.4.7.3

स॒वि॒तै॒तानि॑ श॒री॒राणि॑ पृ॒थि॒व्यै मा॒तु॒रु॒प॒स्थ आ॒द॒धे ।

ते॒भ्यः पृ॒थि॒वि शं॑ भव ॥

षड्भो॑ता सूर्यं॑ ते चक्षु॑र् गच्छतु॒ वा॒त॒मा॒त्मा द्वां च॑ गच्छ॒ पृ॒थि॒वीं
च॒ ध॒र्म॒णा ।

अ॒पो वा॑ गच्छ॒ यदि॒ तत्र॑ ते हि॒त॒मोष॑धीषु॒ प्र॒ति॒ति॒ष्ठा श॒री॒रैः ॥

परं॑ मृत्यो॒ अनु॒ परे॑हि पन्थां॒ यस्ते॒ स्व इ॒तरो॑ दे॒व॒या॒नात् ॥

चक्षु॑ष्मते शृण्व॒ते ते॑ ब्रवीमि॒ मा नः॑ प्र॒जाꣳ री॒रिषो॑ मोत॒ वी॒रान् ॥

शं वा॒तः शꣳ हि॒ ते घृ॒णिः श॒मु ते॑ स॒न्त्वोष॑धीः ।

क॒ल्प॒न्तां मे॑ दि॒शः श॒ग्माः ॥

पृ॒थि॒व्यास्त्वा॒ लो॒के सा॒द॒या॒म्य॒मुष्य॑ श॒र्मा॒सि पि॒तरो॑ दे॒वता॑ () ।

प्र॒जा॒प॒ति॒स्त्वा सा॒द॒य॒तु तया॑ दे॒व॒तया॑ ॥

अ॒न्त॒रि॒क्ष॒स्य त्वा॑ दि॒व॒स्त्वा दि॒शां त्वा॑ ना॒क॒स्य त्वा॑ पृ॒ष्ठे ब्र॒ध्न॒स्य त्वा॑

वि॒ष्ट॒पे सा॒द॒या॒म्य॒मुष्य॑ श॒र्मा॒सि पि॒तरो॑ दे॒वता॑ ।

प्र॒जा॒प॒ति॒स्त्वा सा॒द॒य॒तु तया॑ दे॒व॒तया॑ ॥ 19 (12)

(अ॒न॒प॒स्फुर॑न्ती – रु॒त्तर – दे॒वत॑या द्वे च) (A7)

4.1.8 अनुवाकम् – 8

T.A.4.8.1

अ॒पू॒प॒वा॒न् घृ॒त॒वा॒ञ्च॒रुरे॑ह सी॒द॒तू॒त्त॒भ्नु॒वन् पृ॒थि॒वीं द्या॒मु॒तो॒परि॑ ।

यो॒नि॒कृ॒तः प॒थि॒कृ॒तः स॒पर्य॑त ये दे॒वानां॑ घृ॒तभा॑गा इ॒ह स्थ॑ ।

ए॒षा ते॑ य॒मसा॑दने स्व॒धा नि॒धी॒यते॑ गृ॒हेऽसौ॑ ।

द॒शाक्ष॑रा ता॒ञ् रक्ष॑स्व तां गो॒पाय॑स्व तां ते॒ परि॑ द॒दामि॑ तस्यां॑ त्वा॒ मा
द॒भन् पि॒तरो॑ दे॒वता॑ ।

प्र॒जाप॑तिस्त्वा सा॒दय॑तु तया॑ दे॒वत॑या ॥

अ॒पू॒प॒वा॒-ञ्छृ॒त॒वा॒न्-क्षी॒र॒वा॒न्-द॒धि॒वा॒न्-म॒धु॒मा॒ञ्च॒रुरे॑ह

सी॒द॒तू॒त्त॒भ्नु॒वन्-पृ॒थि॒वीं द्या॒मु॒तो॒परि॑ ।

यो॒नि॒कृ॒तः प॒थि॒कृ॒तः स॒पर्य॑त ये दे॒वानां॑ शृ॒तभा॑गाः क्षी॒रभा॑गा

द॒धिभा॑गा म॒धुभा॑गा इ॒ह स्थ॑ ।

ए॒षा ते॑ य॒मसा॑दने स्व॒धा नि॒धी॒यते॑ गृ॒हेऽसौ॑ ।

श॒ताक्ष॑रा स॒हस्रा॑क्षरा-ऽयु॒ताक्ष॑रा-ऽच्यु॒ताक्ष॑रा तां॑ रक्ष॒स्व तां॑
गो॒पाय॑स्व तां॑ ते परि॒ददामि॑ तस्यां॑ त्वा मा द॒भन्
पि॒तरो॑ दे॒वता॑ ।

प्र॒जाप॑तिस्त्वा सादय॒तु तया॑ दे॒वतया॑ ॥ 20 (10)

(अ॒पूप॑वा॒नसौ॑ द॒श) (A8)

4.1.9 अनुवाकम् – 9

T.A.4.9.1

ए॒तास्ते॑ स्व॒धा अ॒मृताः॑ करोमि॒ यास्ते॑ धा॒नाः परि॑कि॒राम्य॑त्र ।
तास्ते॑ य॒मः पि॒तृभिः॑ सम्॒विदा॑नोऽत्र धे॒नूः का॑म॒दुघाः॑ करोतु ॥
त्वा॒मर्जु॑नौष॒धीनां॑ पयो॒ ब्रह्मा॑ण इ॒द्विदुः॑ ।
तासां॑ त्वा म॒द्ध्य॑दा॒ददे॑ च॒रुभ्यो॑ अ॒पिधा॑तवे ॥
दूर्वा॑णां स्त॒म्बमा॑हरै॒तां प्रि॒यत॑मां म॒म ।
इ॒मां दि॑शं म॒नुष्या॑णां भूयि॒ष्ठाऽनु॑ वि रो॒हतु॑ ॥
काशा॑नां स्त॒म्बमा॑हर रक्ष॒साम॑प॒हत्यै॑ ।
य ए॒तस्यै॑ दि॒शः प॒राभ॑वन्न॒घाय॑वो यथा॒ ते ना॑भवान् पुनः॑ ॥

दर्भाणां॑ स्तम्बमा॑हर पितॄ॑णामोषधीं॑ प्रियाम् ।

अन्व॑स्यै मूलं॑ जीवा॑दनु काण्ड॑मथो फलम् ॥ 21 (10)

T.A.4.9.2

"लोकं॑ पृ॒ण{43}" "ता॑ अ॒स्य सू॒ददो॑हसः{44}" ॥

शं वा॑तः श॒हि ते॒ घृ॒णिः श॒मु ते॒ स॒न्त्वो॑षधीः ।

कल्प॑न्तां ते दि॒शः सर्वाः॑ ॥ इ॒दमे॒व मेतो॑ऽपरा॒-मा॒र्तिमा॑राम काञ्च॒न ।

तथा॑ तद॒श्विभ्यां॑ कृ॒तं मि॒त्रेण॑ वरु॒णेन॑ च ॥

वर॑णो वा॒रया॑दिदं दे॒वो वन॑स्पतिः ।

आ॒र्त्यै नि॒र्ऋ॒त्यै द्वे॒षाच्च॑ वन॒स्पतिः॑ ॥

वि॒धृति॑रसि वि॒धारया॑स्मद॒घा द्वे॒षा॒सि श॒मि श॒मया॑स्मद॒घा द्वे॒षा॒सि

यव॑ यव॒यास्मद॑घा द्वे॒षा॒सि ॥

पृ॒थि॒वीं ग॑च्छान्तरि॒क्षं ग॑च्छ दि॒वं ग॑च्छ दि॒शो ग॑च्छ सु॒वर्ग॑च्छ

सु॒वर्ग॑च्छ दि॒शो ग॑च्छ दि॒वं ग॑च्छान्तरि॒क्षं ग॑च्छ पृ॒थि॒वीं ग॑च्छापो

वा ग॑च्छ यदि॒ तत्र॑ ते हि॒तमो॑षधीषु प्र॒तिति॑ष्ठा शरी॒रैः ॥

"अ॒श्मन्व॑ती रेव॒तीर्{43}" "यद्वै दे॒वस्य॑ सवि॒तुः प॒वि॒त्रम्{44}"

"यँ॑ रा॒ष्ट्रात्प॒न्ना{45}" "दु॒द्वयं॑ तम॒सस्परि॑{46}"

धा॒ता पु॒नातु॑{47}"() ॥ 22 (10)

(अथो॑ फ॒लम् – धा॒ता पु॒नातु॑) (A9)

4.1.10 अनुवाकम् – 10

T.A.4.10.1

आ॒रो॒ह॒तायु॑र्-ज॒रसं॑ गृ॒णा॒ना अ॒नुपूर्वं॑ यँत॒मा॒ना यति॑ष्ट ।

इ॒ह त्व॑ष्टा सु॒जनि॑मा सु॒रलो॑ दी॒र्घमा॑युः क॒रतु॑ जी॒वसे॑ वः ॥

यथाऽ॒हान्य॑नुपूर्वं॑ भव॒न्ति यथ॑र्तव ऋ॒तुभि॑र्-यन्ति॑ क्लृ॒प्ताः ।

यथा न पूर्व॑मप॒रो ज॒हात्ये॒वा धा॒त॒रायू॑षि क॒ल्पयै॑षाम् ॥

न हि ते अ॒ग्ने त॒नुवै॑ क्रू॒रं च॒कार॑ म॒र्त्यः ।

क॒पिर्-ब॑भ॒स्ति तेज॑नं पु॒नर्ज॑रायु गौ॒रिव॑ ।

अप॑ नः शो॒शुच॑द॒घम॑ग्ने शु॒शुद्ध्य॑ र॒यिम् ।

अप॑ नः शो॒शुच॑द॒घं मृ॒त्यवे॑ स्वा॒हा ॥

अ॒न॒ड्वा॒ह-म॒न्वा॒रभा॒महे॑ स्व॒स्तये॑ ।

स न॒ इन्द्र॑ इव॒ दे॒वेभ्यो॑ वह्निः॒ संपा॑रणो भव ॥ 23 (10)

T.A.4.10.2

इ॒मे जी॒वा वि॒मृतै॑राववर्ति॒न्नभू॑द्-भ॒द्रा दे॒वहू॑तिं नो अ॒द्य ।

प्रा॒ज्जो॒ऽगमा॑ नृ॒तये॑ ह॒साय॑ द्रा॒घीय॑ आ॒युः प्र॒तरां॑ द॒धानाः॑ ॥

मृ॒त्योः प॒दं यो॑पयन्तो॒ यदै॒म द्रा॒घीय॑ आ॒युः प्र॒तरां॑ द॒धानाः॑ ।

आ॒प्याय॑मानाः प्र॒जया॑ ध॒नेन॑ शु॒द्धाः पू॒ता भव॑थ य॒ज्ञिया॑सः ॥

इ॒मं जी॒वेभ्यः॑ परि॒धिं द॑धामि॒ मा नो॑ नु गा॒दप॑रो अ॒र्द्धमे॑तम् ।

श॒तं जी॒वन्तु॑ श॒रदः॑ पु॒रूची॑स्ति॒रो मृ॒त्युं द॑द्महे॒ पर्व॑तेन ॥

इ॒मा ना॒रीर॑वि॒धवाः॑ सु॒पत्नी॑राज्ज॒नेन॑ स॒र्पिषा॑ संमृ॒शन्ता॑म् ।

अ॒नश्र॑वो॒ अन॑मी॒वाः सु॒शेवा॑ आ॒रोह॑न्तु॒ जन॑यो॒ योनि॑म॒ग्रै ॥

यदा॒ज्जनं॑ त्रै॒ककु॑दं जा॒तं हि॒मव॑तस्परि॒ ।

तेना॒मृत॑स्य॒ मूले॑ना॒राती॑र्-ज॒म्भया॑मसि () ॥

यथा॒ त्व-मु॑द्भि॒नथ्-स्यो॑ष॒धे पृ॑थि॒व्या अ॑धि॒ ।

ए॒वमि॒म उ॒द्भि॒न्दन्तु॑ की॒र्त्या य॑श॒सा ब्र॑ह्मवर्च॒सेन॑ ॥

अ॒जोऽस्य॑जा॒स्मद॒घा द्वे॑षा॒सि यवो॑ऽसि यवया॒स्मद॒घा
द्वे॑षा॒सि ॥ 24 (13) (भव – जम्भयामसि त्रीणि च) (A10)

4.1.11 अनुवाकम् – 11

T.A.4.11.1

अप॑ नः शो॒शुच॑द॒घम॒ग्ने शु॒शुद्ध्या॑ र॒यिं । अप॑ नः शो॒शुच॑द॒घम् ॥
सु॒क्षेत्रि॑या सु॒गातु॑या व॒सूया॑ च यजामहे । अप॑ नः शो॒शुच॑द॒घम् ॥
प्र यद्-भ॒न्दिष्ठ॑ ए॒षां प्रा॒स्माका॑सश्च सूर॒यः । अप॑ नः शो॒शुच॑द॒घम् ॥
प्रय॑द॒ग्नेः सह॑स्वतो वि॒श्वतो॑ यन्ति सूर॒यः । अप॑ नः शो॒शुच॑द॒घम् ॥
प्रय॑त्ते अ॒ग्ने सूर॑यो जा॒र्येम॑हि प्र ते व॒यम् ।

अप॑ नः शो॒शुच॑द॒घम् ॥ 25 (10)

T.A.4.11.2

त्व॒ हि वि॒श्वतो॑मुख वि॒श्वतः॑ परि॒भूर॑सि । अप॑ नः शो॒शुच॑द॒घम् ॥
द्विषो॑ नो वि॒श्वतो॑मु॒खाति॑ नावेव पारय । अप॑ नः शो॒शुच॑द॒घम् ॥
स नः॑ सिन्धु॒मिव॑ नावया॒ति पर्षा॑ स्वस्तये । अप॑ नः शो॒शुच॑द॒घम् ॥
आपः॑ प्रव॒णादिव॑ यती-रपा॒स्मथ्-स्य॑न्दताम॒घम् ।
अप॑ नः शो॒शुच॑द॒घम् ॥ उ॒द्वना-दु॒दकानी॑वापा॒स्मथ्-स्य॑न्दताम॒घम् ।

अप॑ नः॑ शो॑शुच॑द॒घम् () ॥ आ॒न॒न्दा॒य प्र॒मो॒दा॒य पु॒न॒रा॒गा॒ऽस्वा॒नृ॒हान् ।
 अप॑ नः॑ शो॑शुच॑द॒घम् ॥ न वै तत्र॑ प्र॒मी॒यते॑ गौ॒रश्चः॑ पु॒रु॒षः प॒शुः ।
 यत्रे॒दं ब्र॑ह्म क्रि॒यते॑ परि॒धिर्जी॑वना॒य क॒मप॑ नः॑ शो॑शुच॑द॒घम् ॥ 26 (14)

(अ॒घ – म॒घम् च॒त्वारि॑ च) (A11)

4.1.12 अनुवाकम् – 12

T.A.4.12.1

अप॑श्याम यु॒वति॑-मा॒चर॑न्तीं मृ॒ताय॑ जी॒वां परि॑णीयमा॒नाम् ।
 अ॒न्धेन॑ या तम॒सा प्रा॑वृ॒ताऽसि॑ प्रा॒चीम॑वा॒ची-म॒वय॑न्-नरि॒ष्ट्यै ॥
 मयै॒तां मा॒ऽस्तां भ्रि॑यमा॒णा दे॒वी स॒ती पि॒तृलो॒कं य॑दै॒षि ।
 वि॒श्ववा॑रा नभ॒सा स॒म्व्य॑यन्त्यु॒भौ नो॑ लो॒कौ प॒यसा॑ऽऽवृ॒णीहि ॥
 रयि॑ष्ठा॒मग्नि॑-म॒धुम॑न्त-मूर्मि॒णमूर्जः॑ सन्तं त्वा प॒यसो॑प॒सऽस॑देम ।
 स॒ऽर॒य्या स॒मु वर्च॑सा स॒चस्वा॑ नः स्व॒स्तये॑ ॥
 ये जी॒वा ये च॑ मृ॒ता ये जा॒ता ये च॑ जन्त्याः ॥
 तेभ्यो॑ घृ॒तस्य॑ धा॒रयि॑तुं म॒धुधा॑रा व्यु॒न्दती ॥
 मा॒ता रु॒द्राणां॑ दु॒हिता॑ वसू॒नाऽस्व॑साऽऽदि॒त्याना॑म-मृ॒तस्य॑ ना॒भिः ।

प्र॒णु॒वोचं॑ चि॒कि॒तु॒षे ज॒नाय॑ मा ग॒मना॑ग॒मदि॑तिं व॒धिष्ट॑ () ॥

पि॒ब॒तू॒दकं॑ तृ॒णान्य॑त्तु । ओ॒मु॒थ् सृ॒जत॑ ॥ 27 (12)

(व॒धिष्ट॑ द्वे च॑) (A12)

=====

Prapaataka Korvai with starting Padams of 1 to 12 Anuvaakams :-

(प॒रे॒यु॒वा॒ꣳसं॒ प्र॒ वि॒द्वान्॑ भु॒वन॒स्या॒भ्या॒व वृ॒थ्स्वा॒ जो॒ भा॒गो॒ऽयं॑ वै
चतु॑श्चत्वारि॒ꣳशत् ।

य ए॒तस्य॒ त्वत् पञ्च॑ ।

प्र॒के॒तु॒ने॒दन्ते॒ नाके॑ सु॒पर्णं॑ यौ ते ये यु॒द्ध्यन्ते॒ तप॒साऽश्म॑न्वती
रे॒वतीः॒ सꣳर॒भद्ध्व॑म॒ष्टावि॑ꣳशतिः ।

यं ते॒ यत्त॒ उत्ति॑ष्ठात इ॒दन्त॒ उत्ति॑ष्ठ प्रे॒ह्यश्म॑न्. यद्वा उ॒द्वय॑मयं
पञ्च॑वि॒ꣳशतिः॑ ।

आ॒या॒तु त्रि॑ꣳशत् ।

वै॒श्वान॑रे तस्मिन् द्र॒प्स इ॒मम॑पे॒ताहो॑भिर् यु॒ज्यन्ता॑म॒घ्निया॑ अ॒दिते॑ पा॒रं
व आ॒ प्या॑यस्व स॒प्तवि॑ꣳशतिः ।

उ॒त्ते ऽत॑भ्नो॒म्यक्षि॑तिस्ते॒भ्यः पृ॒थिवि॒ षड्ढो॑ता परं मे श॒ग्माः
पृ॒थि॒व्या अ॒न्तरि॑क्षस्य द्वात्रि॑ꣳशत् ।

अ॒पूप॑वा॒नसौ॒ दश॑ श॒त दश॑ ।

तैत्तिरीय आरण्यके चतुर्थः प्रपाठकः – (TA 4)

ए॒तास्ते॑ ते दि॒शः अ॒ (सर्वा॑ इ॒दम) श्मन् वि॒श्र॒तिः ।
आ॒रो॒हत॑ त॒नुवै॑ कू॒रं च॒कार॑ पु॒नर्मृ॒त्यवे॒ मा नो॑ नु गा॒द् द॒द्म॒ह इ॒मा
ना॒रीः परि॑ त्रयो॒वि॒श्र॒तिः ।
अप॑ नः सु॒क्षेत्रि॒या प्र य॒द्धन् दि॒ष्टः प्र य॒दग्नेः॑ प्र य॒त्ते अ॒ग्ने त्व॑ हि
द्वि॒षः स नः॑ सि॒न्धुमा॑पः प्र॒वणा॑दु॒द् व॒नादा॑न॒न्दाय॒ न वै तत्र॑ (य॒त्रेद॒म्)
चतु॑र्वि॒श्र॒तिः ।
अप॑श्या॒मावृ॑णीहि॒ द्वाद॑श द्वाद॑श ।)

Korvai with starting Padams of 1, 11, 21 Series of Dasinis :-

(प॒रेयु॒वा॒स् – मा॒या – त्वे॒तास्ते॑ स॒प्तवि॒श्र॒तिः)

First and Last Padam in TA, 4th Prapaatakam :-

(प॒रेयु॒वा॒स् – मो॒मुथ्सृ॒जत॑)

॥ हरिः ओम् ॥

॥ कृष्ण यजुर्वेदीय तैत्तिरीय ब्राह्मणे आरण्यके चतुर्थः प्रपाठकः

समाप्तः ॥

=====

Appendix (of expansions)

T.A.4.4.2 – अ॒श्म॒न्व॒ती रे॒वती॑र{36}" "य॒द्वै दे॒वस्य॑ स॒वितुः॑
प॒वि॒त्रम्{37}" "या॑ रा॒ष्ट्रात् प॒न्ना{38}" "दु॒द्वय॑म् त॒मस॑स्परि{39}"
"धा॒ता पु॒नातु॑{40}"

अ॒श्म॒न्व॒ती रे॒वतीः॑ स॒ꣳ र॒भ॒ध्व॒ मु॒त्ति॑ष्ठ॒त प्र॒तर॑ता स॒खायः॑ ।
अ॒त्रा ज॒हाम॑ ये अ॒सन्न॑शे॒वाः शि॒वान् व॒यम॑भि वा॒जानु॑त्तरेम ॥ {36}
(Appearing in T.A.4.3.2)

य॒द्वै दे॒वस्य॑ स॒वितुः॑ प॒वि॒त्रꣳ स॒हस्र॑धा॒रं वि॑त॒तम॑न्तरि॒क्षे । येना॑पु॒ना
दि॒न्द्रम॑ना॒र्त-मा॒र्त्यै तेना॑हं मा॒ꣳ स॒र्वत॑नुं पु॒नामि॑ ॥ {37}
(Appearing in T.A.4.3.3)

या रा॒ष्ट्रात् प॒न्नाद॑प॒ यन्ति॑ शा॒खा अ॒भि॒मृ॒ता नृ॒पति॑मि॒च्छमा॑नाः ।
धा॒तुस्ताः॑ सर्वाः॑ प॒वने॑न पू॒ताः प्र॒जया॑ऽस्मान्-र॒य्या वर्च॑सा
स॒ꣳसृ॑जाथ ॥ {38} (Appearing in T.A.4.3.3)

उ॒द्वयं॑ त॒मस॑स्परि प॒श्यन्तो॑ ज्योति॒रुत्त॑रम् । दे॒वं दे॒वत्रा॑ सूर्य॒मग॑न्म
ज्योति॒रुत्त॑मम् ॥ {39} (Appearing in T.A.4.3.3)

धा॒ता पु॒नातु॑ स॒वि॒ता पु॒नातु॑ । अ॒ग्नेस्तेज॑सा॒ सूर्य॑स्य॒ वर्च॑सा ॥ {40}
(Appearing in T.A.4.3.3)

T.A.4.6.3 - "आ॒ प्याय॑स्व{41}" "सं ते{42}"

आ॒ प्याय॑स्व॒ समे॑तु ते वि॒श्वतः॑ सोम॒ वृष्णि॑यं ।
भवा॒ वाज॑स्य सङ्ग॒थे ॥ {41}

सं ते॒ पया॑सि॒ समु॑ यन्तु॒ वाजाः॑ सं वृ॑ष्णि॒या-न्य॑भि॒माति॑षाहः ।
आ॒प्याय॑मानो अ॒मृता॑य सोम॒ दिवि॑ श्रवा॒स्युत्त॑मा॒नि धि॑ष्व ॥ {42}
(Both {41} and {42} appearing in TS 4.2.7.4)

T.A.4.9.2 – "लो॒कं पृ॒ण{43}" "ता अ॒स्य सू॒ददो॑हसः{44}"

लो॒कं पृ॒ण छि॒द्रं पृ॒णाथो॑ सीद॒ शिवा॑ त्वं ।
इ॒न्द्रा॒ग्नी त्वा॒ बृह॑स्पति॒रस्मिन्॑ योना॒वसी॑षदन् ॥ {43}

ता अ॒स्य सू॒ददो॑हसः॒ सोम॑श्च॒ श्रीण॑न्ति॒ पृश्न॑यः ।
जन्म॑न् दे॒वानां॑ वि॒शस्त्रि॑ष्वा रो॒चने॑ दि॒वः ॥ {44}
(Both {43} and {44} appearing in TS 4.2.4.4)

तैत्तिरीय आरण्यकं— पितृमेधमन्त्राः –(TA 4)

T.A.4.9.2 – "अ॒श्म॒न्वती॑ रेवती॒र्{45}"

"यद्वै॑ देव॒स्य स॒वितुः॑ पवि॒त्रम्{46}" "या॑ रा॒ष्ट्रात्प॒न्ना{47}"

"दु॒द्वयं॑ तम॒सस्परि॑{48}" धा॒ता पु॒नातु॑{49}"

{45} is same as (36) above, {46} is same as (37) above

{47} is same as (38) above. {48} is same as (39) above

{49} is same as (40) above

तैत्तिरीय आरण्यके चतुर्थः प्रपाठकः – (TA 4)

Details of Dasini & Vaakyams for Prapaatakam 4 (TA 4)

	Dasini	Vaakyams
Anuvakam 1	4	44
Anuvakam 2	1	5
Anuvakam 3	3	28
Anuvakam 4	2	25
Anuvakam 5	3	30
Anuvakam 6	3	27
Anuvakam 7	3	32
Anuvakam 8	1	10
Anuvakam 9	2	20
Anuvakam 10	2	23
Anuvakam 11	2	24
Anuvakam 12	1	12
Total →	27	280
<u>Total as per</u> <u>grantha books</u> anuvaakam 21	27	Not given